

Atham wOre
Atham wore ngoul wothothilettat
woleccuo
Lon lonothon

Pul ipokurrot atham enni pokat oLukka, okkwi ipokurrot Atham wolon iloporot loLukka. Iatham enni, kweret tat akka oIeccuo popakkothe tothi'rot, ul iammakothok werekanthet ul woIouth lon iloporot lung cittokit na'ran wen ana akin erene ul w'rek na'ran wen. OLukka peret cakuruk tat akka Kanang ikupupure kainet ul iammakot oIeccuo cittokit a'rungkat nan. Appinappin angwot ana opo'riekin than ana ul wen ittittik.

OLukka peret lon ila pul pothothilettat woIeccuo oPoththuruc pokkothe ana lon ilokkattanthet ul iocokothe lon loMiccie noka'ran koUruccelim. Ana cannan, Kanang ikupupure kittarothekin akin ina itti Kapik kongothe itti lon iloporot loIeccuo laine ul ncik appik, okorronno oka ul woIouth tulluk (Ku'rathal 1-12). OLukka peret tat akka Kanang ikupupure kokat nopul ipamakot oIeccuo oPoluc akwoneko lon iloporot loIeccuo na'ran appik noththok ammakka itti Thurkki ana Makthonia akwocothat ngka'ran koRoma, oLukka pokurrot lon loppot ila oPoluc ana opilingon th'rek thoul iammakot thongkenet. Elli littarot ton aron okatha tat akka okin thongkenet ul kurekkurek lon iloporot loIeccuo ilon kurekkure (Ku'rathal 13-28).

OIeccuo ponekittathe tothi'rot

¹ Pangkin oThiappiloc, iatham win worokit mperenthung a'rupu appik ila oIeccuo pokkothe ana ongene noma'ri ima kurokiet ngre cik ² mono aca'ri akkakat

ica kwonekittathe nan tothi'rot. Ana akka kwarthuk onekittat tothi'rot, kwethet ul wung wothothilettat lon lonthoththomat ngKanang ikupupure iakwapocumot nti ipangken. ³ Ana akka kwocokothethe thiak kicce ana okkuttat, oleccuo pikkatheik ma'ri arrial we'ra (40) ana kummanthet ul enni ncik ana kwongkenekathe ngkathar koppot itti kwokat pakinnio. Kummanthet ul wothothilettat wung ncik ma'ri moppot, akwerekantthet kin lon longili ngoKapik. ⁴ Ana noca'ri c'rek akka kwokat cik akwo'rkoik okin aththungon, kwekathe lon elli ilonthomat itti, "Nokorronno oththe noka'ran koU-rucelim anaruk no'rikot thethet nuthuk itha ongappa ponekkenthet lon cik, ithanon thocckithe anerenenthet non. ⁵ Akka oIuanna pomamuthie pethet non mamuthie ngng'ri anaruk noma'ri motteik, onon thacco mamuthie ngKanang ikupupure."

⁶ Ittina akka okin thokat ithun akin ipittat oleccuo itti, "Ngkwaik pathopakenthet ul woIccereil ngi?"

⁷ Aleccuo i'rekat kin itti, "Lakannoka lon itti onon thina luput ana manna ma'ri ima ngappa ponekketheik mpu'ran pung. ⁸ Anaruk onon thacco pu'ran amma Kanang ikupupure kaat nanon ana onon thaka ul win iimmat lon ngkit ana onon akkaka ierene opilingon lon lin noka'ran koUrucelim ana noththok poIouthia ana noththok poCcamira ana nocapu ncik appik." ⁹ Anakka kwi'rethekin lon elli, kwonekittakathe tothi'rot ntokit ken, akin okathaccek ana nuththe no'rumathok akin okinnimmakathok.

¹⁰ Akin ikkat cik akin okathacceik tothi'rot akka oleccuo pokat cik akwoku'rot tothi'rot. Ittina aul w'rek we'ra iomura akkakat accokkot wakot eret wipuk aco'rot kin. ¹¹ Ai'rekat kin itti, "Ul woCelil, ngintha akka anno-co'rine cen annokathacce tothi'rot, oleccuo pen ikkalu

iponekittathenon, akwonekittat tothi'rot kwakkaprrttako ntan ammakka nthimmarok akwoku'rot tothi'rot.”

OMaththiac popakkothe noka'ran koIoutha kore

¹² Ittina okin thopakkathe noka'ran koUruccelim no-co'rong coCeththun icokat cakannoka ciththan noka'ran koUruccelim. ¹³ Anakka okin thaat akin oku'rat nopan to'ra nakin thokat akin ikkoik. Okkwion ithokat thokat, oPoththuruc, oIuanna, oIakup, Anthrauc, oPilipic, oThthoma, oPerththolomauc, oMaththa, oIakup ukul wAlappaoc, oCcaaman ipokat pongothe lon loththok, ana oIoutha ukul woIakup. ¹⁴ Okin thokat akin aukko tothun appinappin akin oul iari w'rek ana oMeriom onnan poIeccuo ana opangon thoIeccuo ithomura akin a'ra nga'rama.

¹⁵ Noma'ri men oPoththuruc purokathe kapik itho'rküt thoul ioccoke the lon loKapik, awaik mungkut mungkut arrial wa'rakkuruk (120). ¹⁶ Ana kwi'rekathe itti, “Pangkingon, lon latham woKapik lonu itti lakkattat ila Kanang ikupupure kernet oThauth lon loIoutha ook iponu ul ikkun ioccoke the oleccuo. ¹⁷ Ook ipokat oron aththungon ana kwokat iere uraththungon ngulukku ngoKapik.”

¹⁸ Ana akucci ia oIutha poccot nti ilon lung ilokithak, kwokerathe kopon na kwokorthothe calak cung akwiat akwapat akwekat ca ncik acarak othakakat cik anukkuk opporekat thapat. ¹⁹ Ul appik wonoka'ran koUruccelim wocciathe lon len, ana wocciethe ka'ran ken k'ran itti, Akkelthama ikonu itti 'capu coüccük.'

²⁰ Ana oPoththuruc pi'rekathe itti, “Lokurrakot iatham woMocumur itti, 'Aka'ran kung ella pul ipikkoik nan, Ana opilin oneko ka'ran kung kore ngung.’

²¹ Menik laka itti pul pummunta nti iul iokat cik uraththungon noca'ri ica oleccuo pokat iaron, ²² nci nomamuthie moluanna oingkanthet noca'ri ica oleccuo ponekittat nanin akwonekittat tothi'rot. Akka opilin nti ianin ponu itti paka ianin anin otherene opilingon lon lothuroko thoIeccuo nti ithio.”

²³ Ittina okin thonekkekathe ul we'ra cik, oIuccip iponat k'ran itti oParccapa (iponat k'ran cakuruk itti oIuc-thhoc) ana oMaththiac. ²⁴ Menik akin a'rakat nga'rama itti, “Ili Kapik, ngkwina mikit min appik, okenenin nti iul enni we'ra piatha nti akin ipa ngkwummot ntit ²⁵ ipaneko ngre ngopul pothothilettat pung ipa oIoutha poththet nan akweo noka'ran na kwonu itti kwaeo.” ²⁶ Ittina okin thokkwothe mo'rio ana mapanthet oMaththiac akwartakat noul wung wothothilettat iattul ana ikken culukku akin okkat attul ana ikken ke'ra.

2

Thao thoKanang ikupupure

¹ Anakka ca'ri caat coIouth cokamuthe kothokio mil, okin thokat tha'rntakothie ithun noka'ran kulukku. ² Ittina apo're p'rek akkakat accokkot pokanang akokkurarot koppot ntothi'rot ana koppakathe man nakin thokat cik akin ikkoik. ³ Okin thimmakathe a'rupu w'rek wungkot lu're lolik ana wakkakathe a'rat no'ra wen kurekkurek appik ammakka okin thokat cik. ⁴ Kanang ikupupure koppappakathe iakin ana okin thikkatheik akin ere ngkarru ikakin thokat thommat ere ammakka Kanang kiniet kin.

⁵ Ca'ri cen ul woIouth ionat n're noKapik nomo'rong appik imaik nocapu wokat cik aikkoik noka'ran koUruc-celim. ⁶ Anakka okin thocckithe po're pen, acungkut

coul akkakat tothun acikkat cik acoprttakot tit akka okin kurekkurek thocckothe aul iocckothe lon loKapik aere ngkarru koul iokat cik accikot lon len. ⁷ Ittina aul oprttakat tit, akin ipittat itti, “Ul enni woCelil iaik werei? ⁸ Ana tat akka oron occikot akin ere ngkarru konnon. ⁹ Oron thoPrththon ana thoMathion ana thoIlamion ana ul iaik noththok poMaccapaththomia ana iaik noththok polouthia ana poKkaphthokkia ana Piniththic ana pAccia, ¹⁰ ana poPricia ana poMippilia ana poMuccir ana a'ran w'rek woLipia iaik iccik koKirin ana ul iaat noka'ran ko-Roma, ¹¹ (Ul woIouth ana ul iocckothe lon nomikit ila ul woIouth wocckothe) ana ul wonocrakan corirok coKkrit ana Muththu anin occikot akka akin ere ngkarru kin ana akin eret lon ilommaththik ila Kapik kokkothe.” ¹² Okin thikkatheik akin oprttakot tit ana akin ipittarot itti, “Lon elli lonu itti kaththa?” ¹³ Opilingon thokkathe ngure nakin akin i'rekat itti, “Okin thikkot ngapak ngoppot.”

OPoththuruc perene ul

¹⁴ Ittina oPoththuruc purokathe kapik okin oul wung wothothilettat iattul ana ikken culukku, akwikkat cik akwerene ul mpo're cittan itti, “Ul woIouth ana onon appik ithaik cene noka'ran koUruccelim, nokorronnon anerenenon lon elli, nocckothin annokkwat unu ncik nonon ila ni'ret non. ¹⁵ Ul enni wonnikko ngapak amakka onon thi'ret, cingki cckothe ukullaco'rin cocik corrot. ¹⁶ Ilen elli akka pul pothernte lon loKapik oloil pappi'ret akka kwi'ret itti,

¹⁷ 'Noca'ri cothocothakot Kapik ki'ret itti,

Mpethet ul appik Kanang kin ikupupure.
 Nyukul inyomura ana inyari nyere lon
 ammakka ul wothernte lon loul woKapik,
 ul wang iomura wimma lon ilaik
 ana ul iocckat wathantako thathantako.

¹⁸ Ana manna noul iarekinin iomura ana iari,
mpethet ul Kanang ikupupure noma'ri men
ana okin there ammakka ul wothernte lon loul
woKapik.

¹⁹ Mpakene lon ilommatthik tothi'rot
ana lon ilakene lon nocapu thaiken,
ngüccük ana thik ana kucuk keththung ere konica.

²⁰ Cingki cathakka ngi'rimak

ana kwanok ka'riat cik ere ngüccük,
aca'ri carthuk anthan icirik ana cothrik thoIli.

²¹ Ana okwi ipa'ra nga'rama ngk'ran kolli kwa'rettat.”

²² APoththuruc apperekanthet kin akwi'rekat itti, “Ul
woIccereil, noccikot lon elli, oIeccuo poNaccir pokat
pul ipa Kapik kekkiet nan nanon nthokkot thung lon
ilommatthik ana lon ilakene pangken ammakka onon
ngka kon thina. ²³ Pul empi pettathenon ikkun llon
laKapik kinat nan ana ul iokithak wittarohenon ana
onon thokkwothok nthokkwethok nothapak. ²⁴ Anaruk
Kapik kurokierok nti ithio ana elikkok nti ithocokot thiak
thothio, akka thio thellat pu'ran itti tha'rungkot naak.

²⁵ OThauth paperethok akwi'ret itti,

‘Mpimmathe Ili tokit kin.

Akka waik thokkun wothothari win,
Mpakorronno appipo n're.

²⁶ Ittina cikit cin copirat noka ana mpapirane Kapik noka,
ana ka kin cakuruk kikkoik ntho'rikot cik,

²⁷ akka ngkwannoththe naun aniat ciki ippu,
ana manna ngkwannokorronno piak pang apokutta.

²⁸ Ngkwokenerin athar wothikkoik,

ana ngkwakorronnon anopira noka tokit kang.’

²⁹ Pangkingon, mperenenon ncinokkit itti, opiki pon-
non Ili oThauth piot ana kwocikkakat ana tupu tung tei

cene manna inenni. ³⁰ Anaruk kwokat pul pothernte lon loKapik ana kwinat itti Kapik konekkenthok lon cik, nthakkwo mio itti kwanekket pul pothiki thung noprok pung. ³¹ Ana akka kwinat lon ilathokaik, kwerethe thuroko thoMiccie cakuruk itti Kapik kannokorrannok ippu ana manna ka kung kannokutta. ³² Kapik kurokiet oleccuo nti ithio ana onin thimmat lon len ngkit kin. ³³ Kapik kothikkierok pothiakinet cik ana kwoccot Kanang ikupupure ika Kapik kokat konekkethe lon cik itti kethok ana kwekatheron ana iken akka onon thaik thakathacce ana occikot. ³⁴ OThauth pappannoku'rot tothi'rot anaruk kwappi'ret icci itti,

'Ili Kapik wi'rethe Ili win itti,

Ikkik thokkun wothothari win,
³⁵ puccuk analkanthung tho'rak thang,
 acukkwarat kin cik ntacok tang.'

³⁶ Ittina kirnni aul woIccereil ina itti, Kapik kokkothe oleccuo ipanon thokkwethe nothapak Ili ana oMiccie.”

³⁷ Manakka ul wocckithe lon elli, okin thikkat cik akin oprttakot tit akin i'rekat oPoththuruc ana opilingon nti iul wung wothothilettat itti, “Pangkingon, ngintha akka onin okkot?”

³⁸ APoththuruc othiat tit itti, “Nokkaprttako nti ilon ilokithak annocco mamuthie ngk'ran koleccuo oMiccie, alon lon ilokithak occikakinthet non. Ana Kapik kethet non Kanang ikupupure. ³⁹ Akka thonekket lon cik itha Kapik konekketheik thon ana thonyukul nyon ana thoul iaik ciththan, ul appik ia Ili Kapik konnon kakkaro.”

⁴⁰ OPoththuruc perekanthet kin ana a'retto nakin llon loppot lonthoththomat itti, “No'ret ka kon nti ilon loul iokithak wonoma'ri emmi.” ⁴¹ Ana Kapik karttathe noul iocckathe lon loleccuo nomikit ana woccathe mamuthie. Okin thokat athar w'rapuruk (3,000) iarttakothe noul.

Thikkoik thoul ioccokothe lon loKapik

⁴² Okin thi'rikathe ilon lothongkene loul wothothilettat woieccuo akin aukko tothun akin o'rko thu'rit ithun ana thu'rit tholli thocipin ana a'ra nga'rama. ⁴³ Ul wothothilettat woieccuo wokkathe lon ilommaththik lopot ana ul appik woprttakatherit nolon len. ⁴⁴ Okin ithocokathe lon loKapik thokakathe ithun ana akin ikkettot a'rupu ana okkot lon appik tothun. ⁴⁵ Akin okette a'rupu wen akin ikket ul a'rupu iellat a'rupu cik. ⁴⁶ Okin thikkatheik akin ocurttot noppa toKapik appinappin. Ana akin o'rko thu'rit thoili thocipin tothun ana okin tho'rkothe ikaman mmik̄it moporot, ⁴⁷ aul w'rek omerekat Kapik ana opira noka nothoporot thoul iakin thaik. Ana Ili wikkatheik arttot ul nakin appinappin iokat cik a'rettat.

3

OPoththuruc pittiet pul ipakimico

¹ Ca'ri c'rek cokat cik, aPoththuruc ana oIuanna thokat cik akin eo noppa toKapik noc̄ingki ca'rama ac̄ingki cokkothe c'rapuruk cipin. ² Ittina ul w'rek wokat cik aneko pul pokat p'rek pokat pakimico nci ammakka pokwontat, ana kwokat akwonekkettat ic̄ur̄uk icaeo noppa toKapik coccot k'ran itti 'c̄ur̄uk icopeththere,' pul pen pokat apipittittot ul akucci amma waat itti watha'ra nga'rama noppa toKapik. ³ Anakka kwimmat oPoththuruc ana oIuanna akin i'riko noppa toKapik, akwipittat kin akucci. ⁴ APoththuruc ana oIuanna thokathakathok ciki ik̄it, aPoththuruc i'rekathok itti, "Antokatha n̄in." ⁵ Ittina akwokathakat kin papenang akwi're itti kwaik pacco pap'rek nakin.

⁶ APoththuruc i'rekathok itti, "Mpella mallong imallio ana manna thaap anaruk mpethung ia mponu, ngk'ran koleccuo oMiccie poNaccir, uroki anyaro."

⁷ Akwocokathok nukun wothothari akurokiekathok kapik awek othakkakat woporot. ⁸ Akwikkat cik akwirrot kapik noracok ana akwonyaro. Ittina akwomakat kin noppa toKapik akwonyaro ana akworottopo akwomereket Kapik nthopira noka. ⁹ Anakka ul wimmarok akwonyaro ana omereket Kapik, ¹⁰ akin inakathok itti ook ipikikkoik tocürük conoppa toKapik icocot k'ran itti 'cürük icopeththere' akwipittot ul a'rupu ana okin thoprttakatherit ana irro mikit nti ikarak nolon ilokkattanthok.

OPoththuruc pere noppa toKapik

¹¹ Pul ipipitto p'rakatheik naPoththuruc ana oIuanna. Ul appik waprttakatherit ana wollathe takin ithrara thoCiliman irokat noppa toKapik. ¹² Anakka oPoththuruc pimmat lon len akwi'rekat itti, "Ul woIccereil, ngintha akka anon oprttakinthet tit nolon elli? Ngintha akka annokathaccenenin ere onin akkonyarien pul empi mpu'ran pin ana manna akka onin thaik thikkoik thikkoik thoKapik? ¹³ Kapik kAprein ana koIccaak ana koIakup, Kapik kongappan akkothikkiet pul iparekinok priik oIeccuo ipanon thethet nili akwothokkuttat, ana onon thocukkwot nolon itti onon thinak tokit koPilaththoc ipi'ret itti kwelikkok. ¹⁴ Onon thocukkwot nolon itti nthina okkwi ipupupure ana ipoporot tokit koKapik, annipitto itti okkwi ipangwo ul pelikkako. ¹⁵ Onon thokkwothe pul iponu thikkoik ikkun anaruk Kapik kurokierok nti ithio. Onin thimmat ngkit kin. ¹⁶ Nthocokot lon loKapik nocikit ngk'ran koIeccuo pul empi ipanon thimmat ana onon thinak pothakkat poporot. Lon ila nthimmat ana ina, lokkattathe nthocokot lon nocikit lok'ran kung, okat thocokot lon nocikit loIeccuo akkokorronnorok akwothakka poporot, ammakka onon appik thimmat."

¹⁷ APoththuruc apperekat akwi're itti, “Pangkingon, mpina inenni itti lon ilanon ana nili non thokkothe naleccuo, nthokkothe anthommat lon l'rek. ¹⁸ Anaruk kathar engki akka Kapik kokkothe llon ila ki'ret nul wothernte lon loKapik itti oMiccie pung pathocokot thiak. ¹⁹ Nopa'rine lon ilokithak cik onnopakkinthet Kapik, othakka itti alon lon ilokithak occikakinthet non ²⁰ othakka itti akwothiöt oMiccie ipokat ponekkettanethet non cik ana manna oleccuo. ²¹ Kwonu itti kwa'rungkot tothi'rot puccuk aca'ri akkakat ica Kapik othikkie a'rupu appik wie ammakka kwonekkethe lon cik ma'rot nul wung wothernte lon loKapik iupupure. ²² Akka oMucca pi'ret itti, ‘Ili Kapik kon wananenon pul pothernte lon loKapik pammakka oun nti iul won, onon thouu itti nthaccikot lon appik ila akwerenenon. ²³ Okkwi ip'rat occikothok kwapa'rettaik nti iul wung.’

²⁴ OCcamuil ana ul w'rek wothernte lon loKapik iomakothok okin therethe ma'ri emmi. ²⁵ Ana onon thanyukul nyoul wothernte lon loKapik ana nyothonekket lon cik ila Kapik konekkethe cik okin oththen ammakka kwi'rethe Aprein itti, ‘Nti ithiki thang enthi, mpethiët ul cik nocapu appik.’ ²⁶ Anakka Kapik kurokiet oleccuo pul iparekinok, kwothiathok nanon cittokit akwothethienon, nthoprtonon cik nti iathar won iokokithak annopakkinthet Kapik.”

4

OPoththuruc ana oIuanna thaik tokit kocuththun coul woIouth ittittik

¹ Anakka oPoththuruc ana oIuanna thokat cik akin erene ul, menik aul akkakat wonoppa toKapik ana ili woul iangwot cik ana ul woCathukkin. ² Okin thokat

3:23 3.23 Thethinia 18.19 3:25 3.25 Thoku're ncik 22.18; Thoku're ncik 26.4

thannopira noka akka oPoththuruc ana oIuanna thokat cik akin ongekene ul lon lothuroko tholeccuo ana itti okkwion ithocckothe lon lung thuroko. ³ Okin thoc-cokathekin akin onekkeket kin ikorrkkor akin a'riekat kin cik akka cik cokat ceot. ⁴ Anaruk ul iocckithe lon len wocckathe lon loKapik nomikit ana wokat maun athar ukuluk (5,000). ⁵ Ana ngorrot ngen, nili ana ul ittittik woul ana ul iangkene lon lothonce'ret lon cik wa'rn-takathe noka'ran koUruccelim. ⁶ Anan pul iprik ponoppan toKapik ana oKiappa thokat cik ceneket ana cakuruk oIuanna ana Alekenthaler ana ul appik woku'ri ittittik woul wonoppan toKapik. ⁷ Okin thakkarathe oPoththuruc ana oIuanna ana okin thikkatheik akin ipittot kin lon itti, “Onon thokkothe lon elli ngk'ran koththa ana manna mpu'ran poththa?”

⁸ Menik aPoththuruc ngKanang ikupupure noka ak-wi'rekat kin itti, “Nili ana ul ittittik woul, ⁹ amma onin thakkarakat itti onin thipittakat lon iloporot ilokkattant-thet nopul ipokat cik kimico ana tat akka pothikkiettat poporot, ¹⁰ ittina onon thonu itti nthina lon elli, onon ana ul appik woIccereil, ana laik itti pul empi ipaco'ro tokit kon pothakkat poporot ngk'ran koleccuo oMiccie poNaccir ipanon thokkwothe nothapak anaruk Kapik kurokierok nti ithio. ¹¹ OIeccuo ook ipa atham woKapik werethe itti, 'Ook pothok pocillang ipoporot ipanon ul iuno w'rat, ana pothakkathe cillang icrik.’

¹² Tho'rettat thannincat nopul p'rek akka k'ran k'rek kella nocapu ika Kapik kethet ul ikaron o'rettat ngngin.”

¹³ Anakka okin thimmat kathar ika Poththuruc ana oIuanna theret ngngin, akin inakat okin thokat ul iannokurro. Anaruk okin thoprttakathe tit ana okin thaththiat itti ul enni wokat okin oIeccuo. ¹⁴ Anaruk akka

okin thokat akin okathacce pul ipothakkat poporot akka apoco'ro okin oPoththuruc ana oIuanna, okin thellakathe lon l'rek ilakin appi're. ¹⁵ Ittina okin thi'rekathekin itti okin thaeo nnoppa toCuththun coul wolouth ittittik ana okin thikkatheik akin erettarne. ¹⁶ Akin ipittarat itti, "Oron thakkot taththa noul enni? Akka ul appik wonoka'ran koUruccelim wimmat lon ilommatthik ilakin thokkothe ana oron thannocukko nolon ilokkattathe. ¹⁷ Anaruk ntrun oce're lon len akka alopettakot cik iul appik, oron thi'ret kin lon lonthoththomat itti akin oce're therene ul ana okorronno ongekene ul ngk'ran koleccuo."

¹⁸ Ittina okin thakkarathekin nthapat akin i'rekat kin lon lonthoththomat itti akin okorronno ongekene ul ana manna erene ngk'ran koleccuo. ¹⁹ Anaruk oPoththuruc ana oIuanna thi'rekathekin itti "Nipittot kakon liatha akkoco'rotheik itti onin thaccikot non inokorronno Kapiki? ²⁰ Akka onin thannoco'ro nti ilon ilaniin thimmat ana occikot nunu win."

²¹ Menik akin appi'rekat kin lon lonthoththomat cannan akin okorronnat kin akin eo. Okin thokat thanniot kathar ikakin akkma kin ngngin akka ul wokot appik apirane Kapik noka nti ilon ilokkattathe. ²² Akka pul ipothikkiettat poporot llon ilommatthik ponat luput larrothe arrial we'ra cik (40).

Ul iammakot oleccuo wa'ra nga'rama

²³ Anakka oPoththuruc ana oIuanna thelikkakot okin thopakkanthet ul wen akin erekanthet kin lon ila ul ittittik wonoppa toKapik ana ul ittittik woul wi'rethekin. ²⁴ Anakka okin thoccikothe akin ikkat cik akin a'rane Kapik nga'rama mpo're cittan itti, "Ili Kapik, ngk-wokkothe tothi'rot ana capu ana nok inapangka ana a'rupu appik tit. ²⁵ Ngkweret ngKanang ikupupure nthon thopul iparekinung ongappa pin oThauth itti,

‘Ngintha akka ul wokat wuanet ka?

Ana ipot lon cik ilokithak?

²⁶ Nili nonocapu nurokwot ana na'rntakothe ithun anorro illi,
ana iakkwi po'ruttat ngaak.'

²⁷ OIruthuc ana oPilaththoc oPunththioc ana ul iakon-noka woLouth ana ul woLccereil wa'rntakathe noka'ran engki aprttakat ipul iparekinung ipupure oleccuo ipa ngkwothikkiet oMiccie. ²⁸ Okin thokkothe ila pu'ran pang ana ila ngkwonekketheik itti lakkattat alarthuk okkattat.

²⁹ Ana inenni Ili, katha kathar ikakin thaik thi'rilenin ngngin, ethet nin pu'ran pang onin iak wang innere lon lang ella n're. ³⁰ Othie ukun aittiet ul iongo ana okkot lon ilommatththik ngk'ran kokkul wang ikupupure oleccuo.”

³¹ Anakka okin tha'rat nga'rama aka'ran ikakin thokat cik tit kikkatheik aka'rıntittako ncik. Ana Kanang ikupupure ko'rathe nakin appik ana okin thikkatheik akin ere lon loKapik ella n're.

Ul ioccokothe lon loIeccuo wikkettot a'rupu

³² Ana okin appik ithoccokothe lon loKapik thonat lon lulukku nomik'it men ana ima. Okin thokat akin illillo ia'rupu appik ithun iakin thonu, pul pellat ipi're itti a'rupu ia kwonu wung pellek. ³³ Ul wothothilettat woIeccuo wikkatheik aere lon lothuroko thoIli oIeccuo nti ithio mpu'ran poKapik, ana thoporot thoKapik thoppot thokat nakin appik. ³⁴ Pul pellat iakin ipi're itti pellat pap'rek. Akka ul ionat mapu ana manna kaman wokat cik akette kaman k'rek ken ana mapu anane ul wothothilettat wung akucci wen ³⁵ akin ipot tokit ken aikkettat okkwion ithella a'rupu cik. ³⁶ Ammakka oIuccip poul woLaui ponoththok poKupruc pokkothe ook ipa ul wothothilettat

woleccuo wakkarot itti oParnapa ilonu itti 'ukul wothit-tarot.'³⁷ Kwokerot kopon kung ana capu ana kwonakathe akucci akwonekkekat tokit koul wothothilettat woleccuo.

5

Anania ana opari oCceppira

¹ Anaruk pul p'rek pokat cik poccot k'ran itti Anania ana opari itti oCceppira thokettet mapu men cakuruk imakin thaththonat. ² Akin erettaranthet akin opari itti kwammothot akucci w'rek cik woka kung ana a'rek akwonekanthet ul wothothilettat woleccuo akwonekkekat tokit ken. ³ Menik aPoththuruc i'rekathok itti, "Anania, ngkwontha akka pul pothopulut peot nocikit cang ana ngkwammikkothe Kanang ikupupure ana ngkwamu'rut-tot akucci w'rek ia ngkwokerot ncapu ana na'rupu ia ngkwonat ana ngkwi'ret itti ngkwonat appik. ⁴ Capu cokat cang angkwarthuk okero pai? Ana akka kokettat akucci wokat wannoka wangi? Ngintha akkokorronnung akkot lon elli? Ngkwannammikkot pul iponyi anaruk ngkwammikkothe Kapik."

⁵ Anakka Anania poccikothe lon elli, akwapat akwiat. Aul ioccikothe ipat n're nolon len ilokkattathe. ⁶ Ittina aul iou'rit akkakat ai'rikikkathok kicce anakathok athocikkathok.

⁷ Anakka mingki meot ncik m'rapuruk apari akkakat noppa akwommat itti ngimpen akkokat cik. ⁸ OPoththuruc ipittathok itti, "Anti'rethin, cekerek enci icanon thokerot capu ngngin annolle pang?"

Akwi'rekathok itti, "Ii icen enci."

⁹ APoththuruc i'rekathok itti, "Onon therethe ithun annolle pang itti onon thenekke Kanang kolli akaintha? Okatha cene, ul enni waat nthapat watthocikko olle pang ana okin thapponekong cakuruk akin othocikkong."

¹⁰ Ncinang akwapat noracok toPoththuruc akwiat, menik

aul w'rek iou'rit i'rikat ntan noppa athiathok akkwiot ana wonekathok athocikkok iccik kolle. ¹¹ Ittina aul ioccoke the lon loleccuo ipat n're appik ana ul iocciko the lon len ilokkattathe.

Ul wothothilettat wittiet ul woppot

¹² Ul wothothilettat woleccuo wokkathe lon iloporot ana lon ilommaththik iul. Ana ul appik ioccoke the lon loleccuo nomikit wikkatheik a'rntattakot ithrara thoCil-iman iokat wokat noppa toKapik ¹³ Apul ellakat nthapat iponat thiak itti pi'riko iakin anaruk ul appik wikkatheik aeret kin llon loporot. ¹⁴ Anaruk ul iomura ana iari appik warttakathe nan ithocokot lon lolli woppot. ¹⁵ Lon ila ul wothothilettat woleccuo wokko the lokarnnathe ul aanna ul iongo akin ipot nona'rangkal ana nouppu'runge ikathar othakka itti amma oPoththuruc okko ikathar arenek tung o'ro nakin akin othakka thoporot. ¹⁶ Ul wokat cik aukko nna'ran appik iokat iccik koka'ran koUruccelim akin onna ul iongo ana ul iau'rupa iokithak wo'rot nan ana ul wen wittiettakathe appik.

Ul wothothilettat wokkiettathe thiak

¹⁷ Ittina apul iprik ponoppa toKapik ana ul wung ittittik iokat mothok moul woCathukkin wonyirakathe itti okin thiak thakannomerekattat. ¹⁸ Okin thociccokathe ul wothothilettat woleccuo ana okin thonekkekathe ikorrrkor. ¹⁹ Anaruk ngko'ra au'rupa wothothilettat woli anyat kathat korikorrrkor ana woppiekathekin thapat nti ikorrrkor. ²⁰ Ana wi'rekathekin itti, “Ngkonon noppa toKapik annongkene ul lon lothikkoik ithie.”

²¹ Ana ingi'rĩmak akin i'rikat noppa toKapik ammakka okin thi'rettathe akin ikkat cik akin onkene ul. Anakka pul iprik ponoppa toKapik ana ul wung appik waat okin thakkarathe cuththun coul woouth ittittik ana ul ittittik woul wolccereil ana okin thotheiathe ul iangwot

cik itti wathona ul wothonhilettat woIeccuo nti ikorrkkor.
²² Anaruk akka okin thaat noka'ran korikorrrkkor akin okinniat ul wothonhilettat woIeccuo ikorrkkor ana okin thopakkathe akin otherekanthet cuththun itti, ²³ “Onin thaththiot kathat kulukkwakot kicce, ana ul iangwot cik waik wangwot cik anaruk akka onin thanyothe athat, onin thakanniot pul p'rek noppa.” ²⁴ Anakka okin thocikothel lon len aili irik woul iangwot noppa toKapik ana ili irik woul wonoppa toKapik akin oprttakat tit akin i're itti ngintha akkaik panthan nolon elli.

²⁵ Ittina apul p'rek akkakat api'rekat kin itti, “Nantocikothin, ul ianon thonekkethe ikorrkkor waik wangkene ul noppa toKapik.” ²⁶ Ana ili irik woul iangwot cik noppa toKapik ana ul wung thoiingkathe ana okin thonakathe ul wothonhilettat kicce kicce annoka mpu'ran akka okin thonat n're noul akka akinco kin imothok.

²⁷ Anakka okin thonat ul wothonhilettat, okin thonakathekin tokit koCuththun coul woIouth ittittik apul iprik ponoppa toKapik athipipittot kin lon.
²⁸ Apul iprik ponoppa toKapik i'rekat kin itti, “Onin thi'rethenon lon lonthoththomat itti, onon thannongkene ul lon ngk'ran engki aththik ana onon thoppethe lon cik noka'ran koUruccelim ana onon thongothe itti onon tharret lon nocalak cin loüccük ngopul empi.”

²⁹ APoththuruc ana ul wung wothonhilettat w'rek othianthet kin itti “Onin thaccikot lon loKapik onin thannocikot lon lopul iponyi. ³⁰ Kapik kongappan kurokiet oleccuo nti ithio, ook ipanon thokkwothe nthokkwethok nothapak. ³¹ Ook ipa Kapik konekkethe thokkun wung wothonhari noka'ran ikoporot ana othikkiek ili ana pul potho'rettot othakka itti akwokorronno ul woIccereil akkaprttako nti ilon ilokithak ana akwockikinthet kin lon ilokithak. ³² Onin thimmat lon appik ngkit kin ana

cakuruk Kanang ikupupure kimmat ika Kapik kethet ul iaccikothok.”

³³ Anakka okin thocçikothe lon len akin uakat ka cannan ana omekat appik itti okin thangwo kin. ³⁴ Anaruk pul p'rek poPriccin ipoccot k'ran itti oKamalail, pul ipangkene lon lothonce'ret lon cik ana ipa ul othiane cik llon appik purokathe kapik tokit kocuththun coul woIouth ittittik api'rekat ul itti nantonekot ul enni thapat papotteik. ³⁵ Ittina api'rekat kin itti, “Ul woIccereil, nina lon elli papenang ilanon thaik thathokkinthet ul enni. ³⁶ Noma'ri m'rek imeot, oThthothac purokwot ncik akwinnikat itti ook ili irik ana ul wocçikathe lung maun arrial ukuluk ma'ri moco'rin (400) anaruk kwokkuttakathe ana ul wung iokat ammakothok wopettakatheik ana lon len lintakatheik. ³⁷ Ana oIutha poul woCelil pummat ncik cakuruk noma'ri mothothangante ul akwerekanthet ul amakathok woppot ana kwokkuttakathe ana ul iammakothok wopettakatheik appik. ³⁸ Anaruk inenni tokit kon, mpi'ret non itti nokorronno ul enni nokorronno akin eo akka amma lon ilakin okkot lopul iponyi lintat cik. ³⁹ Anaruk amma noKapik, onon thamma akka annoce're ul enni onon thathiot ka kon annothatto iKapik.”

⁴⁰ Ana okin thocçikathe lon lung ana okin thakkarathe ul wothothilettat woIeccuo akin okkwekat kin akin ekat kin lon lonthoththomat itti okin thannere ngk'ran koIeccuo ana okin thelikkathekin. ⁴¹ Ana ul wothothilettat woIeccuo woththekathe nocuththun coul woIouth ittittik awopirat noka akka Kapik kiothekin nakin thekkot nothokinya ithakin thokkiettathe thiak nti ik'ran koIeccuo. ⁴² Nci noca'ri cen okin thikkatheik akin ongkene ul noppa toKapik ana ikaman appinappin, okin thakanno-co'rat nti ithongkene ana erene ul lon iloporot loIeccuo ana itti oIeccuo ook oMiccie.

6

Ul ittarot ie're'rapuruk

¹ Ana noma'ri men akka ul iammakothok oleccuo wokat cik arttakot nan, ul woIouth iokat aere karru kolunanin wikkatheik aerekot noul woIouth iokat aere karru ken koIpranin. Akin i're itti muruma men maik mannikkettat mnothu'rit ithokat cik atha'rntakinthet muruma appinap-pin. ² Ittina aul wung iammakothok iattul ana ikken ke'ra a'rntakat appik tothun akin i'rekat itti, “Lakannoka loporot naniin itti oniin thapa'rine lon lothongkene lon loKapik cik anin okatha lon lothu'rit. ³ Pangkingon, noneko ul we're'rapuruk nti ianon ia nthimmat itti wella lon ilokithak cik ana wonu Kanang ikupupure noka ana winaik ntima annethet kin ngre engngi. ⁴ Aniin i'rikot notha'ra nga'rama ana ongekene lon loKapik.”

⁵ Lon elli lopirikathe ul noka appik. Okin thummathe oIciththippanuc pul iponat thocokot thoIeccuo nocikit thoppot ana Kanang ikupupure, ana cakuruk oPilip-pic ana oProkcoroc ana oNikkanoroc ana oThthimon ana oPariminac, ana oNikkolaoc pAnththakkia ipokat pothakkat pul kathar koul woIouth ana kwocckathe lon nocikit loIeccuo. ⁶ Ana okin thonakanthet kin ul wothothilettat woIeccuo anekket nyaun nakin a'rakanthet kin nga'rama.

⁷ Ittina lon loKapik lopettakatheik. Maun moul iammakot oleccuo marttakathe nan noka'ran koUrucce-lim ana ul woppot wonoppa toKapik occikat lon lothoc-cokot lon nomikit.

OIciththippanuc poccokittathe

⁸ OIciththippanuc ipa Kapik kethet thoporot ana pu'ran ana kwonakathe pu'ran poppot akwikkat cik akwokkot lon ilommaththik iul. ⁹ Ittina aul w'rek wonocuththun ca'rama icocot k'ran itti cuththun coul ielikkakot

thikkatheik akin opllarot okin oIciththippanuc. Okin thokat ul woIouth iaat noka'ran koKirin ana noka'ran koIcikkantharia, ana opilingon cakuruk noththok poKilikkia ana pAccia. ¹⁰ Anaruk okin thannalkathok akka Kanang ikupupure kethethok thinaik nti ica itha kweret nngin.

¹¹ Ittina okin therekekanthet ul w'rek itti wathere ngkarra itti, “Onin thocckithe aIciththippanuc ocungkwo Kapik ana oMucca.” ¹² Akin erekekat ul ana ul ittittik woul ana ul iangkene lon lothonce'ret lon cik. Okin tho'rumathe oIciththippanuc ana okin thocckathok akin onakathok tokit koCutthun coul woIouth ittittik. ¹³ Akin ipat ul cik iathoco'rot lon ngkarra akin i're itti, “Kwannoco'ro nti ithocungkwo tupan toKapik irupupure ana nti ithocungko lon lothonce'ret lon cik. ¹⁴ Ana onin thocckithe cakuruk akwere itti oleccuo empi poNaccir pathokitto ka'ran engki ka'rama ana kwaprto thathumaik itha oMucca ponekkenthet ton cik.”

¹⁵ Ittina ul iokat cik aikkoik cınang noCutthun coul woIouth ittittik wokathakathe oIciththippanuc toca ana okin thimmakathe toca tung ere toca tou'rupa wothothilettat woKapik.

7

Oiciththippanuc perene cutthun coul woIouth ittittik

¹ Ittina pul iprik ponoppan toKapik pipittathe oIciththippanuc itti, “Lon ila ul werethung nngin laik icari?”

² Akwothiat tit itti, “Pangkingon ana ongappan nocikothin, Kapik ikrik kumminthet ongappa ponnon Aprein ncik akka kwokat cik akkwarthuk noththok poMaccappaththomia akkwarthuk urokot noka'ran kAran.

³ Aki'rekathok itti, 'Uroki aththe noththok pang ana noul wang aeo noththok ipa anokeneng.'

⁴ Ittina akwoththekat noththok poPapilonia akurokat nnoka'ran kAran. Anakka oththan piot Kapik kothïathok ntan cene noththok empi nanon thaik inenni. ⁵ Kapik kokat kannethok ka'ran engki itti kaka kung manna cipit cotteik nnan. Anaruk Kapik konekkenthok lon cik itti ook ana thiki thung thana capu. Anaruk ca'ri cen Aprein manna pokat pellat ukul cik. ⁶ AKapik i'rekathok itti, 'Thiki thang thaka kwat noththok poka ipakanoka pen ana thaka iak iarekine ul ana okin thakkietat thiak llon ilokithak luput arrial ukuluk ma'ri mo-co'rin (400). ⁷ Anaruk mpakkma ul iakin thaik tharekine ana okin thappot thapat noththok pen akin atha'ranin nga'rama noka'ran engki.' ⁸ Ittina Kapik konekkekanthet Aprein lon cik llon lothokekkot ana Aprein pokwonathe oIccaak ana kwokekkiekathok akkwonu ma'ri mormor akka kwokwontat. Ana oIccaak pokwonathe oIakup ana kwokekkiekathok ana oIakup pokekkiekathe nyukul nyung inyattul ana ikken ke'ra ammakka thiki thongappan thonnon."

⁹ Alciththippanuc erekat akwi're itti, "Nyukul nyoIakup nyokat nyannopira noka napang pen oluccip ana okin thokerathok akwonekittakat akwothothakkakat piak noththok poMuccir anaruk Kapik kakkokat naak. ¹⁰ Ana ko'rekathok nti ilon appik ilokithak ana kekathok thinaik nti ica ana iniek lon iloporot loPoroun ili wonoththok poMuccir. Menik oPoroun wothikkiekathok pul ipakatha lon lopathok ana kaman kung appik.

¹¹ Ittina ti tommaththik taccokittot thaik to'ratheik noththok poMuccir appik ana noththok poKanaan ana pul pellakathe nti inyukul nyoIakup ipiot thu'rit.

¹² Anakka oIakup poccikothe itti thu'rit thaik noththok poMuccir, kwothiathe nyukul ngung ongappan thonnon anyothokathiek akka ca'ri cen akin antimma pothok poMuccir noca'ri corokit. ¹³ Anakka okin thapakkothe attang, aUuccip erekanthet opangon itti ook okkwen ana oPoroun pinakathe ku'ri koUuccip. ¹⁴ Menik AUuccip othianthet oththan oIakup thon ana ku'ri kung appik akin anthan. Okin thokat arrial w'rapuruk ana alkaire ana ikken ukuluk (75). ¹⁵ Ittina oIakup poingkathe noththok poMuccir na kwiothe ana nyukul ngung ongappan thonnon. ¹⁶ Okin thonekittakathe nnoththok poMuccir akin othocikkako noka'ran koCcekkim ka'ran ika Aprein pappokerothe nyukul nyAmur nakucci.”

¹⁷ Aiciththippanuc erekat akwi're itti, “Anakka ca'ri okko napuththut ica Kapik kakkonekkenthet Aprein lon cik itti kakkinthok lon nan ila kakkonekkenthet cik, amaun moul ikkat cik amarttakot nan kannan noththok poMuccir. ¹⁸ Aili w'rek iee opakkat noili ngonoththok poMuccir iommat oUuccip itti ook okkwen. ¹⁹ Ana wikkatheik akkiet ul woIccereil thiak ana akin opa're oththan ana onnan ponyukul cik othakka itti anyukul ille.

²⁰ Ana noca'ri cen aMucca okwontakat ana kwokat popeththere kannan ana kwikkatheik anak w'rapuruk thoththangon ana okin thokat cik, akin anguttethok tuan thanen. ²¹ Anakka okin thoppiethok thapat, ukul iopari woPoroun wonekathok athupothathok athikkiekathok ukul wung. ²² OMucca pocokkakathe ana kwongkenet-takathe thinaik nti ica appik thoul woMuccir ana kwapingangka ere papenang ana okkot ngre.

²³ Anakka oMucca pokkothe luput arrial we'ra (40) kwomekathe ica cung itti kwathokatha ul wung woIccereil. ²⁴ Menik kwimmakathe pul poMuccir apokkiet pul poIccereil thiak ana kwoingkathe akwotha'rettinok

ana kwokkwathe pul poMuccir mono apiat. ²⁵ OMucca pi'rekathe noucce wung itti ul wung wira wina itti Kapik konarok itti akwatho'ret kin anaruk okin thommat. ²⁶ Ana ngorrot ngen aMucca iat ul w'rek we'ra wolccereil athatto akwi'rekat itti kwapakket kin iku'ri akwi'rekat kin itti, 'Ul wolccereil, onon thaku'ri ana ngintha akka anniettine ka kongo?'

²⁷ Anaruk pul ipokat apokkiet opang thiak oth-iat oMucca api'rekat itti, 'Oththa akkothikkierung ili ana pul ipakkma nin? ²⁸ Ngkwongotho itti ngkwakkwothin ammakka ngkwokkwathe pul poMuccir mecceni?' ²⁹ Manakka oMucca poccikotho elli akwollat eo noththok poMithian na kwaththikkat cik than akwipat pari akwokwonat nyukul than nye'ra inyomura."

³⁰ Aiciththippanuc o'rungkat nan puccuk akwere akwi're itti, "Anakka luput leot ncik arrial we'ra (40) au'rupa wothothilettat woKapik ummanthet oMucca ncik ithampang ithonthomat iccik koco'rong coCcina ithik thokat cik athocco nopira apira okorronno. ³¹ Manakka kwimmat lon len akwikkat cik akwoprttakat tit akwoingkat iccik ken akwothokatha akwocikat po're poKapik api're itti, ³² 'Oun Kapik koththen Kapik kAprein ana oIcaak ana oIakup.' Ittina aMucca ipat n're akwikkat cik akwokkwe ka ana kwommakathe okatha cik.

³³ AKapik i'rekathok itti, 'Ue wok nti iracok tang akka ka'ran engkrik ika ngkwaik paco'ro nan kupupure. ³⁴ Mpimmat thiak itha ul win waik waccokot noththok poMuccir ana mpoccikotho ngeme ngen, ana mpuot ntan ntothi'rot anatho'ret kin ana ngkwanthan anothiothung noththok poMuccir.'

³⁵ Ana oMucca empi ipa ul wung w'rat lon len akka okin thi'rethok itti, 'Oththa akkothikkierung ili

ana pul ipakkma nïn?' Ook ipa Kapik kothïothe akwoka ili wen ana pul ipa'ret kin nthittarot thou'rupa wothothïlettat woKapik iumminthok ncik nopira ipokat cik apok'ro. ³⁶ Ook iponat ul thapat noththok poMuccir ana kwokkothe lon ilommaththik ana nocapu noththok poMuccir nokuthut korok irapangka tocakak ana kwokkathe lon len luput arrial we'ra (40) ithampang ithonthomat.

³⁷ OMucca pen ipi'rethe ul woIccereil itti, 'Kapik kanekkentheth non pul p'rek pothernte lon loKapik nti ianon pammakka oun nti iul wonnon.' ³⁸ OMucca ipokat cik akin oulon iokat thiki thonnon ithampang ithonthomat ana u'rupa wothothïlettat woKapik ierenok nocor'rong coCcina okin ongappan thonnon. Kwoccot lon lothikkoik akwathokeneron.

³⁹ Anaruk ongappan thonnon th'rat occïkothok ana manna okin th'rarok ana mikït men mopakkothe noththok poMuccir. ⁴⁰ Okin thi'rethe Arun itti, 'Okkintheth nïn kapik kïn ikæo tokït kïn akka onïn thomma ngimpen akko'rot naMucca iponat nïn nnoththok poMuccir.'

⁴¹ Ca'ri cen cokat icakin thokkothe purrut ipungkwot ngura, akin a'rane nga'rama ana okin okeccentheth a'rupu wothokiot ngüccük cik ana okene papu pen thothia cik ipakin thokkothe nyaun nyen. ⁴² Anaruk Kapik kokorronnathekin akin ongat lon ilokithak akin a'rane manna mothot morothi'rot nga'rama. Elli laik ammakka lokurrakot iatham woul wothernte lon loKapik ila Kapik ki'ret itti,

'Ul woIccereil, onon thokeccethe a'rupu wothokintheth
Kapik ngüccük cik luput arrial we'ra ithampang,
anaruk onon thannethin.

⁴³ Onon thonekkethe purrut poMalok

ana cothot coKapik kon oRamppan
a'rupu ianon thokkothe nyaun nyon othakka itti
anna'rane nga'rama.

Ittina mpathiot non ikwat ciththan nnoththok poPapil.”

⁴⁴ Alciththippanuc erekat akwi're itti, “Ana thiki thonnon ul woIccereil wonat cü'rük ika kothampang icakene itti Kapik kaik ica oMucca pokkothe ammakka Kapik ki'rethok ana ammakka thungkwo itha kwoken-erok. ⁴⁵ Ana noluput ilomakothe, akka oCeccua pokat ili wothiki thonnon akka okin thorrot iul ia Kapik kokiccenet kin nna'ran wen. Okin thokat cik akin onneko cü'rük akin oince ngngin na'ran iie. Ana co'rungkathe than puccuk mono aca'ri coili oThauth akkakat, ⁴⁶ okkwi ipa Kapik kopirinet noka ana oThauth pipittathe Kapik itti kunine ul woIccereil man na a'rat nga'rama. ⁴⁷ Anaruk oCiliman akkunanthok man men.

⁴⁸ Anaruk Kapik kakkannikkoik ikaman ika ul ionyi wunot nyaun nyen. Pul pothernte lon loKapik pi'ret itti,

⁴⁹ ‘Tothi'rot taporrok pin

ana capu na anonekket tacok arapikot.

Aili i'rekat cakuruk itti, man maraththa imanon thon-
gothe itti nthuninin?

Ana manna itti ka'ran kiatha ika anapikot nan?

⁵⁰ Oun akkakannokkot a'rupu enni appiki?’

⁵¹ Onon enthi ithonthomat ma ana mikit ana ithannoc-
cikot lon loKapik nthammakka oththeni, onon thalikine
Kanang ikupupure cik appinappin. ⁵² Pul pothernte lon
loKapik piatha ipa aththen thannokkiet thiak? Okin
manna thongwot okkwion ithi'ret lon lothao thokkwi
ipoporot tokit koKapik kirrkkir. Ana inenni nthokerorok
ana okkwothok. ⁵³ Onon ithoccot lon lothonce'ret lon cik

nti ikkun wou'rupa wothothilettat woKapik anaruk onon th'rat oreko ngngin.”

Thokincot oIciththippanuc cik mmothok

⁵⁴ Anakka ul ittittik wonoppan toKapik woccikothe lon ila kwi'ret, okin thukathe ka akin ollat ntaak akin ok'rel-lot kinyit thocipit. ⁵⁵ Anaruk oIciththippanuc papponat Kanang ikupupure noka kannan, akwokathakat tothi'rot akwimmakat thrik thoKapik ana oIeccuo akwoco'ro nthokkun wothothari woKapik. ⁵⁶ Ittina akwi'rekat itti, “Mpimmat tothi'rot tanyot ana ukul wopul iponyi waik waco'ro nthokkun wothothari woKapik.”

⁵⁷ Ittina akin o'rumat unu wen ana okin thurokathe kapik akin okkot po're cittan ana ollot taak. ⁵⁸ Akin othathok thapat noka'ran koUrucelim akin othokin-cothok cik mmothok, aul iokat cik iimmat lon len uekat eret wen akin eekat pul p'rek popu'rit ikkun iponu k'ran itti oCcaul.

⁵⁹ Anakka okin thokat cik akin okincok, oIciththippanuc pikkatheik akwa'ra nga'rama itti, “Ili oIeccuo, ocothin kanang kin.” ⁶⁰ Ittina akwapat nocapu ee ungu ncik akwekat ngeme itti, “Ili oIeccuo, occikinthe kin lon ilokithak nti ilon elli ilakin thokkothe.” Anakka kwi'ret elli akwiat.

8

Ul ioccoke the lon loIeccuo wakkiettatt thiak ana opettakot cik

¹ Ana oCcaul pi'rekathe itti oIciththippanuc itti kwio okkuttat nti ikkun. Noca'ri cen, thocokiettatt thiak thoul ioccoke the lon loIeccuo thurokathe ncik noka'ran koUrucelim, aul opettakat cik appik ioccoke the lon loIeccuo noththok poIouthia ana poCcamira, aul wothothilettat woIeccuo wuluk okwentakat. ² Ana ul w'rek ioccoke the lon loIeccuo kannan woathe oIciththippanuc kannan ana

wocikkathok. ³ Ittina oCcaul pikkatheik akwopettot ul cik ioccoke the lon loIeccuo. Kwikkatheik akwonyaro ikaman kulukkuluk akwoiccokot ul iomura ana iari akwothutho akwipot ikorrkor.

OPilippic paik noththok poCcamira

⁴ Ittina aul iokat wopettakotheik na'ran w'rek ikkat cik akin ongekene lon loKapik na'ran appik nakin theot. ⁵ OPilippic puathe noka'ran kokat cik noththok poCcamira ana kwikkatheik akwongkene ul lon loMiccie than. ⁶ Ul wokkwanthet lon lung unu ncik papenang akka wimmat lon ilommatthik ila aPilippic pokkothe. ⁷ U'rupa iokithak wokat cik appore nti iul woppot ana wokat aoo mpo're cittan ana ul wothakkakathe woporot woppot iaimico ana iathurukkwo cakuruk. ⁸ Ittina aul appik noka'ran koUruccelim opirakat noka.

⁹ Pul p'rek pokat cik noka'ran ken poccot k'ran itti oCamaan pappokkinthet ul woCcamira thurukut noka'ran ana oprttakiet ul tit noththok poCcamira appik. Kwokat akwome itti ook puluk akkrük ana kwina lon ncik appik. ¹⁰ Ana ul appik iarran ana ittittik wikkatheik ammakothok ai're itti, "Pul empi ponu pu'ran poKapik ana ook akkaka prik." ¹¹ Ana okin thomakathok akka kwocikittinet kin ma llon lothurukut ila akwokkettet thuputhuput. ¹² Anaruk akka okin thoccoke the lon loPilippic ila kwongkenet iloporot loIeccuo longili ngoKapik ana k'ran koleccuo oMiccie, okin thoccathe mamuthie appik, ul iari ana iomura. ¹³ ACcamaan occokat lon nocikit akwoccat mamuthie cakuruk ana kwomakathe oPilippic na'ran appik na kwonyaro ana kwikkatheik akwoprtta kot tit nolon ila kwimmat ilokkattathe ilommatthik appik.

¹⁴ Anakka ul wothoni'lettat woIeccuo wocikothe noka'ran koUruccelim itti ul wonoththok poCcamira

woccokothē lon loIeccuo, akin othiāt oPoththuruc ana oLuanna.

¹⁵ Anakka okin thaat noththok akin a'rakanthet ul nga'rama itti akin occo Kanang ikupupure nomikīt men ¹⁶ akka Kanang ikupupure kokat kannainekin akka okin thoccot mamuthie tulluk ngk'ran kolli oIeccuo. ¹⁷ Ittina oPoththuruc ana oLuanna thonekkekathe nyaun nakin akin a'rakanthet kin nga'rama ana okin thoccathe Kanang ikupupure.

¹⁸ Manakka oCcamāan pimmat itti okin thoccot Kanang ikupupure nti inyaun nyoul wothothilettat, akwekat kin akucci. ¹⁹ Akwi'rekat kin itti, “Nethin pu'ran emprīk othakka itti okkwi ipa anonekktē nyaun nan akwocco Kanang ikupupure nti ikkun win.”

²⁰ APoththuruc i'rekathok itti, “Nokittako annakucci wang akka ngkwakatha ere itti ngkwakero thoporot thoKapik nakucci wang. ²¹ Ngwella ngre cik cene ilon loKapik akka cikīt cang cakannoka co'rillir tokīt koKapik. ²² Opa'rinet lon ilokithak cik lang a'rane Ili nga'rama amma manna aKapik occikīnthung lon elli ila ngkwokwarttikothē nocikīt. ²³ Mpimmat itti ngkwonu thonyira nocikīt ana lon ilokithak l'rikikkorong.”

²⁴ Ittina aCcamāan i'rekat oPoththuruc itti, “A'ranet Kapik nga'rama, alon ila ngkwi'ret okorronno oka nin cik.”

²⁵ Anakka oPoththuruc ana oLuanna thocothothē lon ana thongkene tholon iloporot loIeccuo, okin thopakkathe noka'ran koUrucelim. Ana nokathar opakkot noka'ran koUrucelim okin thokat akin erene ul lon loIeccuo na'ran woppot iaik noththok poCcamirin.

OPilippic ana pul ponoththok pAththiuppia

²⁶ Au'rupa wothothilettat wolli i'rekat oPilippic itti, “Ui nca opakkot thokkun wothothari amma akatha na aciŋki

ummot ngngin amakot kathar ikaat nnoka'ran koUrucelimo akeo noka'ran koKaca.” ²⁷ Ittina akurokat akweo ana ikathar, akwocurat ipul poul wonoththok pAththiuppia ipathuththakot. Pul pen pokat prik ingili ngoKanthakka ili iopari wonoththok pAththiuppia ook iponat prit pakucci ikkun appik appaat appaththa'ra nga'rama noka'ran koUrucelimo. ²⁸ Anakka kwokat cik akwopakkot noka'ran kung, kwokat ithurumpil ithathuthako maprththa akwikkoik akwakkakaro iatham wopul pothernte lon loKapik oIccaia. ²⁹ Kanang koKapik i'rekat oPilippic itti, “Ngko accot thurumpil enthe're cik.”

³⁰ Ittina oPilippic pi'rikittakathe ana kwocikathe apul akkakaro iatham wopul pothernte lon loKapik oIccaia akwipittathok itti, “Atti ngkwina lon ila ngkwaik pakkakaro?”

³¹ Apul i'rekat itti, “Mpina taththa apul pella ipangkenen lon len.” Kwi'rekatho oPilippic itti kwarrot tothurumpil akwikkoik iccik kung. ³² Pul pen pokat cik apakkakaro lon nti iatham woKapik ili're itti,

“Kwanekitta ere thungkat ithaik inyaun nyoul thakuttat, ana ere thungkat ithaik inyaun nyoul ithaik thathokettat tua, thangoik icci, kwakanni're lon l'rek aththik.

³³ Okin thokkiethok thiak ana okwiethok. Oththa akkeret thiki thung?

Akka thikkoik thung thonekittat nnocapu.”

³⁴ Apul ipathuththakot appipittat oPilippic itti, “I'rethin, pul pothernte lon loKapik paik peret oththa cene paik peret ka kungi ana amma okorronno oka ka kung kwaik peret pul p'rek pokai?” ³⁵ Menik aPilippic oku'rekanthok lon cik nolon len iatham woKapik ana kwikkatheik akwerenok lon iloporot loleccuo. ³⁶ Anakka

okin thokat cik nokathar, akin iat ka'ran k'rek konu ng'ri apul pen i'rekat oPilippic itti, “Katha ng'ri ngei cene mpakannocco mamuthie akaintha?” ³⁷ [APilippic i'rekathok itti, “Amma ngkwocokothe lon ncikit appik ngkwacco mamuthie.” Apul ipathuththakot othiat tit itti, “Mpocokothe lon nocikit itti oIeccuo oMiccie ook ukul woKapik.”] ³⁸ Ana kwi'rekatho pul ipallillie capprththa itti kwaco'ro ana okin aththuththe'ra thorpathe nocapu akin orpat i'ri ana oPilippic pekathok mamuthie. ³⁹ Manakka okin thokat cik akin oku'rot nti i'ri, Kanang kolli konekatho oPilippic ana pul ipathuththakot pakinnimmakathok p'rin anaruk poingkathe appopirat noka kannan. ⁴⁰ Anaruk oPilippic paththiat ka kung noka'ran kAcuthuth ana kwonyaratho nomo'rong appik akwongkene lon iloporot loeccuo puccuk mono akwoingkat noka'ran koKaiccaria.

9

Thoprtaoik thoCcaul

¹ OCcaul pokat pommaththik papillietto ana i'rille itti kwangwo ul iammakot lon loili oIeccuo. Kwoingkanthet pul iprik ponoppa toKapik ² ana kwipittathok itti kwethok ta'rmacak akweo ngngin nomuththun ma'rama noka'ran koThimacakka othakka itti amma akwiot ul than antoka manna iomura ana iari iaik ilon lokathar koIli oIeccuo akwocccokot akwothipot kin ikorrkkor noka'ran koUruccelim.

³ Anakka akwokko iccik koThimacakka athule'rak th'rek akkakat ntothi'rot accokkot athammrththakathok.

⁴ Akwapat nocapu akwocikat po're api'rethok itti, “Caul, Caul, ngintha akka accokienthin thiak?”

⁵ ACcaul ipittat itti, “Oung oththa, Ili?”

Apore othianthok tit itti, “Oun oIeccuo ipa ngkwaik paccokiet thiak. ⁶ Anaruk inenni urokothe kapik aeo icarac coman athocckot lon ila ngkwonu itti ngkwakkot.”

⁷ Ittina aul iokat cik anyaro okin oCcaul oco'rot akin oprttakat tit. Okin thokat akin occikot po're anaruk pul pellat ipakin thimmat. ⁸ Ittina aCcaul urokat kapik nocapu anaruk akka kwanyothe kit akwokorronno im-makat pap'rek. Menik akin othuthathok akin oingkat noka'ran koThimacakka. ⁹ Ana kwikkatheik ma'ri m'rapuruk akwi'rimathe ana okonno'rkoik ana manna ikko ng'ri.

¹⁰ Ana noka'ran koThimacakka, pul p'rek pokat cik than pung ipammakot lon loIeccuo poccot k'ran itti Anania. AKapik akkarathok ithathantako itti, “Anania.”

Akwothangkat itti, “Oi Ili.”

¹¹ Alli i'rekathok itti, “Ngko tuan toIoutha ikathar ikoco'rotheik accungkur aipitto pul poka'ran koTharccic poccot k'ran itti oCcaul. Kwaik pa'ra nga'rama. ¹² Ana Caul pathantakothe itti kwimmat pul ipoccot k'ran itti Anania appaat ana ponekkethe nyaun naak apa'ranok nga'rama itti akwimmaik.”

¹³ Anania othiat tit itti, “Ili, mpocckithe lon lopul empi ana lon appik ila kwiet ul wang ka kongo noka'ran koUruc-celim. ¹⁴ Ana paat cene llon noul ittittik woul wonoppa toKapik itti kwathocccokot ul appik iaik wangante k'ran koIeccuo akwipot ikorrkkor.”

¹⁵ Anaruk Ili wi'rekatho Anania itti, “Ngko akka pul empi paun akkakarot itti akwotherene ul iakonnoka ul woIouth lon lin ana nili nen ana ul woIccereil. ¹⁶ Mpakenek tat akka akwokkiettat thiak nti ik'ran kin.”

¹⁷ Anania poingkathe tuan toIoutha akwi'rikat noppan. Kwonekkekathe nyaun naCcaul akwi'rekathok itti, “Pangkin, Ili oIeccuo ipumminthung ncik ikathar akka

ngkwokat cik anthan wothiothin othakka itti aimmaik ana ona Kanang ikupupure noka woppot.”¹⁸ Ncinang a'rupu w'rek apat nti ikīt koCcaul wungkwot a'rincikol ana kwimmakatheik ana kurokathe kapik ana kwoccathe mamuthie.¹⁹ Ana kwo'rkkathe thu'rit ana pu'ran popakkanthok ikkwa ana kwikkatheik ma'ri motte noka'ran koThimacakka akin oul woIeccuo iammakothok.

OPoluc pangkene noka'ran koThimacakka

²⁰ Ana kwikkatheik akwere nomuththun ma'rama itti oIeccuo ukul woKapik.²¹ Aul appik iocckithe lon ila kweret woprttakatherit ana wikkathe aipitto itti, “Okorronno oka pul empi ipokkothe lon lokithak noul noka'ran koUruccelim iangante k'ran koIeccuoi? Ana kwannao cene itti kwathoccicokot ul akwipot ikorrkkori ana onekine ul ittittik woul wonoppa toKapiki?”²² Anaruk oCcaul pikkatheik akwarttakot nan no'ron lothere lon iloporot loIeccuo ana kwokenekathe ul woIouth lon noka'ran koThimacakka itti oIeccuo ook oMiccie.

²³ Anakka ma'ri meot ncik moppot, aul woIouth orumettarat itti okin thakkwothok,²⁴ anaruk oCcaul pinakathe nolon len. Ana okin thikkatheik akin occot kīt cik thokathar ikaeo noka'ran koUruccelim icīngki ana ngko'ra othakka itti akin okkwothok.²⁵ Anaruk ul w'rek iammakothok wonekanthok lon ngko'ra ana worpekathok thapat oppiek icuruk cokunthong ngalunthung.

OPoluc pangkene noka'ran koUruccelim

²⁶ Manakka oCcaul paat noka'ran koUruccelim kwoingkanthet ul iammakot oIeccuo anaruk okin thipathe n're nung, okin thakorronno onekket cikīt naak itti pul ipammakot oIeccuo.²⁷ Anaruk oParnapa pipathok ana kwonekanthok ul wothothīlettat woleccuo ana kwerekantset kin lon loCcaul tat akka kwimmathe Ili oIeccuo ikathar akkwaik akeo noka'ran koThimacakka ana

tat akka Ili oIeccuo werenok ana tat akka kwongkenet lon loIeccuo ella n're. ²⁸ Ittina oCcaul pikkatheik akin aththungon akin onyaro noka'ran koUruccelim akwerene ul lon loKapik ngk'ran koIli oIeccuo nci nokkit. ²⁹ Kwokat akwerene ul woIouth iere karru koIunanin ana opllarot llon anaruk okin thokwancathe kathar itti okin itti thakkwothok. ³⁰ Anakka ul iocokothe lon loIeccuo winat lon len okin thoingkathe noka'ran koKaiccaria akin an-tothiothok noka'ran koTharccic.

³¹ Ittina aul appik iocokothe lon loIeccuo noththok poIouthia ana noththok poCelil ana noththok poCcamira wikkatheik woporot noka. Okin thikkatheik akin oth-akka thonthomat ilon loIeccuo ana okin thittarakothe ngKanang ikupupure, okin tharttakathe nan ithocokot lon loKapik ana thikkatheik akin ikkoik akin thonu n're noli.

OPoththuruc pittiet oIniac ana oThapiththa

³² Manakka oPoththuruc pokat cik akwonyaro nomo'rong, kwoingkathe noka'ran ikoccot k'ran itti Lutha akwothokatha ul woKapik. ³³ Ana kwiathe pul p'rek than poccot k'ran itti Iniac pakimico pomma uroko nna'rangkal luput mormor (8). ³⁴ OPoththuruc pi'rekathok itti, "Iniac, oIeccuo oMiccie pothikkierung poporot. Urokothe kapik aneko kuppu'rung kang ikaicat nan." Menik kurokathe accokkot. ³⁵ Aul appik iaik noka'ran koLutha ana koCcaron wimmakathok ana wocokathe lon lolli nomikit.

³⁶ Ana noka'ran kolappa pul p'rek ipocokothe lon loIeccuo ipopari ipoccot k'ran itti Thapiththa ngkarru koIpranin ana oThorckac ngkarru koKrik ilonu itti wallir, ook ipakkettet lon iloporot ana akwittarot ul iaraco. ³⁷ Ana noca'ri cen pokakathe pongo ana piathe ana okin thopakkiekathok ngkathar kothathum thoIouth kicce ana

akin onekkekathok noppa to'ra. ³⁸ Ka'ran koLutha kokat iccik kolappa anakka ul iammakot oIeccuo woccikotho itti oPoththuruc paik noka'ran koLutha, okin thothianthok opilingon the'ra akin othi'rethok itti, "Ainet nin aththaman."

³⁹ OPoththuruc poingkathe akin aththungon anakka okin theot akin onekathok to'ra noppa. Ul w'rek wokot cik ia ollen thillet nan aco'rothok aoo ana ongenek eret ia oThapiththa pappokkotho akka okin thokat cik akin aththungon akkwarthuk io. ⁴⁰ Ittina aPoththuruc othiat kin thapat appik inoppa ana kwocukkwathe nocapu akwa'ra nga'rama ana kwokathakathe ukul iot, ana kwi'rekathe itti, "Thapiththa, urokothe kapik." Ana kwanyathe kit ana kwimmakathe oPoththuruc ana kurokathe kapik. ⁴¹ APoththuruc ittarathok akwonyaro ana kwakkarathe ul iammakot lon loIeccuo ana muruma ana kwonakanthet kin oThapiththa akkwakannio. ⁴² Lon len lappaththatheik appik noka'ran kolappa appik ana ul woppot wocokathe lon lolli. ⁴³ Ana oPoththuruc pikkatheik noka'ran kolappa ma'ri motteik okin opul ipocot k'ran itti oCamaan ipokat apocucco u'rat.

10

OPoththuruc ana oKurnilioth

¹ Pul p'rek pokat cik noka'ran koKaiccaria pocot k'ran itti oKurnilioth kwokat ili woul arrial ukuluk irro wonoththok poliththalia. ² Ook ana ul woruan thanung appik thokat akin a'rane Kapik nga'rama ana opellene Kapik, kwokat akwittarot ul iellat a'rupu cik ana a'rane Kapik nga'rama appinappin. ³ Ana ca'ri c'rek, acingki cokkotho c'rapuruk cipin, akwathantakat itti kwimmat u'rupa kicce wothothilettat woKapik ainok ana wakkaro-rok itti, "Kurnilioth."

⁴ AKurnilioth okathakat u'rupa nn're ana kwi'rekathē itti, “Ili, ngintha akkaik?”

Ana u'rupa wothothēlettat woKapik wothianthok itti, “Nga'rama ngang ana lon iloporot ilakkinthet ul appik lainet Kapik tothi'rot. ⁵ Okwantothe ul we'ra iomura athiōt noka'ran koIappa akin othona pul ipoccot k'ran itti oCamaan iponu k'ran cakuruk itti oPoththuruc. ⁶ Kwaik tuan topul ipacucco u'rat ipoccot k'ran itti oCamaan ana kaman kung kaik nokuthut korok irapangka.”

⁷ Anakka u'rupa wothothēlettat woKapik woththet naak, oKurnilioth pakkarathe ul we'ra wung iarekinok ana pul iprik ipapellene Kapik ana orekinok ana ipokat pul potho'rak. ⁸ Kwi'rekathēkin lon ilokat cik ana kwothiathekin noka'ran koIappa.

OPoththuruc ponu lon ilathothakka

⁹ Ana ngorrot ngen icīngki ippa, okin thoingkathe, anakka akin okko iccik koka'ran koIappa, oPoththuruc poku'rothe to'ra woman akwotha'ra nga'rama. ¹⁰ Ana kwiamakathe ana kwangkathe itti kwa'rkoik anakka okin thokat cik akin okkinthok thu'rit, kwiongkathe inthe. ¹¹ Kwimmakat tothi'rot attanyot ana pap'rek ere kret kittik apuo ntan nocapu ana poccokittathe nthomipit amumoco'rin. ¹² A'rupu wokat tit worua appik, a'rupu iauro nocapu ana u'rupe appik worithi'rot. ¹³ Menik apo're i'rekathok itti, “Poththuruc, uroki angwo a'rupu enni a'rko.”

¹⁴ APoththuruc i'rekat itti, “Ili win, mpannortte a'rupu iothun ammakka thathuma thin thoIouth thaik.”

¹⁵ Apo're pen appi'rekathok itti, “Kirrnni i're a'rupu appik itti wakannoka wo'rillir ia Kapik kothikkiet wo'rillir.”

¹⁶ Lon elli lokkattathe ma'ri m'rapuruk ana kret ikittik konekittakathe tothi'rot accokkot.

¹⁷ Anakka oPoththuruc pokat cik akwoprttakinthet lon lothathantakorit itha kwappathantakot, aul ie'ra ia oKurnilioth pothiothe tuan toCamaan oco'ro icürük.

¹⁸ Akin ipittat itti pul ipoccot k'ran itti, “OCCamaan ana cakuruk itti oPoththuruc paik cenei?” ¹⁹ Manakka oPoththuruc pokat cik akkwarthuk akwokwarttikot lon lothathantakot, Kanang koKapik ki'rekathok itti, “Camaan, ul w'rek w'rapuruk waik wipittong. ²⁰ Urokwi auo thaiken kirnni opelle itti ngkwaeo naththungon akka oun akkothiothe kin naung.”

²¹ OPoththuruc puathe thaiken ana kwi'rekathekin itti, “Oun ipanon thaik thipitto, ngintha akka onon thainet?”

²² Aul othianthok itti, “OKurnilioth ili woul irro akkothiothenin, ook pul ipoporot iponu n're noKapik, ana ul wolouth wongothok. U'rupa wothothiletat woKapik wi'rethok itti kwakkarong ainok tuan thanung othakka itti akwocikot lon ila ngkwonu itti ngkwi'rethok.”

²³ Menik aPoththuruc ikkiekat kin cik tuan.

OPoththuruc paik thoKurniliothon

Ana ngorrot ngen, oPoththuruc purokathe akin aththungon ana ul w'rek wonoka'ran koIappa iocckothe lon loIeccuo omaka kin. ²⁴ Ana ngorrot ngen ng'rek okin thakkakathe noka'ran koKaiccaria. Ana oKurnilioth pokat cik akwo'rikot kin ana kwakkarathe ku'ri kung ana opurukon th'rek ithaik iccik kung. ²⁵ Anakka oPoththuruc pokat cik akwi'riko noppa nakin, oKurnilioth pocurathe iaak ana kwekathe üngkü ncik nocapu akwa'rakanthok nga'rama. ²⁶ Anaruk oPoththuruc purokiekathok kapik ana kwi'rekathekin itti, “Oco'rothe kapik oun iponyi nuthuk.” ²⁷ Anakka okin thokat cik akin ere, oPoththuruc poingkathe noppa ana kwiathe ul noppa woppot.

²⁸ Ana kwi'rekat kin itti, “Onon thina kicce itti lon lothonce'ret lon cik l'rat itti ul wolouth wacikittako

nul iannoka woLouth ana pul poLouth panni'riko noppan toul iannoka woLouth. Anaruk Kapik ki'rethin itti mpannokatha ul appik ere wokithak ana wannoka wo'rillir. ²⁹ Ana akka mpothilanthet itti mpanthan, mpaat anokorronno a'rettakot. Mpantipittot noni, ngintha akka nthothinthet itti mpaine?"

³⁰ OKurnilioth pi'rekathok itti, "Noma'ri moco'rin imeot mpokat cik tuan thanin ana'ra nga'rama acingki cokkothe c'rapuruk cocipin, apul p'rek oco'rat tokit kin ponu eret wallio ere k'ran kocingki, ³¹ api'rekat itti, 'Kurnilioth, Kapik kockikinthung nga'rama ngang ana kokwarikothe thicket thang nuthuk itha ngkwokat cik aikket ul iella a'rupu. ³² Othinthet oCamaan ipocot k'ran cakuruk itti oPoththuruc noka'ran koIappa, kwaik tuan toCamaan pul ipacucco u'rat iponu kaman nokuthut korok irapangka.' ³³ Ittina ilen akka mpothinthet lon accokkot itti ngkwanthan ana loporot akka ngkwocikothel lon ana ngkwaik cene. Ana oron thei tokit koKapik appik aron occikot lon ila Ili wi'rethung itti ngkwathi'ret nin."

³⁴ Menik oPoththuruc pikkatheik akwere akwi're itti, "Inenni mpakatha itti Kapik kakkinthet ul lon lulukku appik okorronno opetto iakin ³⁵ anaruk kangkot ul appik ionu n're nung ana iakkot lon iloco'rothe cik. ³⁶ Onon thina lon ila Kapik kothinthet ul woIccereil, ileret lon iloporot lothomicco loIeccuo oMiccie ook ipa alli woul appik. ³⁷ Onon thina itti ngimpen akkokkattathe noththok poLouthia nciki noththok poCelil ca'ri ica oIuanna pomamuthie pongkenet lon lomamuthie ³⁸ ana tat akka Kapik kethet oIeccuo poNaccir Kanang ikupupure ana pu'ran ana tat akka kwonyarot na'ran akwokkot lon iloporot ana akwittiet ul iapul potholut po'rot nan akka Kapik kokat naak.

³⁹ Oniin thimmat ngkit kin ila kwokkothe noco'rong polouth ana Uruccelim ook ipakin thokkwothe nothapak. ⁴⁰ Anaruk Kapik kurokiekathok nti ithio noma'ri im'rapuruk ana ul wimmakathok. ⁴¹ Anaruk ul wakan-nimmakathok appik anaruk onin ul immat lon ngkit ia Kapik kakkarot ana onin itho'rkot thu'rit ithun noca'ri ica kurokot nti ithio. ⁴² Kwi'rethenin lon lonthomat itti onin thangkene ul lon loKapik ana erene ul itti Kapik konekkethok cik itti ook akka athonce'renthe ul lon cik illet ana iannille. ⁴³ Ook ipa ul appik wothernte lon loKapik werethe lon len itti okkwi ipoccoke the lon lung lon ilokithak lung laccikakinthok ngk'ran koIeccuo.”

⁴⁴ Anakka oPoththuruc pokat cik akkwarthuk akkwaik akwere, Kanang ikupupure kakkakathe noul appik ioc-cikothe lon loKapik. ⁴⁵ Aul ioccoke the lon loIeccuo iokat ul wolouth iaat okin oPoththuruc oprttakat tit akka Kanang ikupupure kaul iakonnoka wolouth woccot cakuruk. ⁴⁶ Akka okin thocckithe akin ere ngkarru ikakin thommat ere ana omereket Kapik ana opirane noka. ⁴⁷ Ittina aPoththuruc i'rekat itti, “Opilin pakaik ipi're itti ul wakorronno occo mamuthie ng'ri akin thoccot Kanang ikupupure ammakka oron thoccori?” ⁴⁸ Ittina kwi'rekathie itti okin thacco mamuthie ngk'ran koIeccuo. Ana okin thipittathok itti kwikkoik, okin aththungon ma'ri motteik.

11

OPoththuruc perene ul ioccoke the lon loIeccuo noka'ran koUruccelim

¹ Ul wothothilettat woleccuo ana ul w'rek ioccoke the lon loIeccuo noththok polouthia appik occikat itti ul iakonnoka ul wolouth woccoke the lon loKapik. ² Anakka oPoththuruc peot oku'rot noka'ran koUruccelim, aul wolouth iokat ioccoke the lon loIeccuo a'rettat iaak

³ ai'rekat itti, “Ngkweot tuan toul iannoka woIouth ana ntho'rkot cik naththungon.”

⁴ OPoththuruc perekanthet kin ilokat cik appik anganna ilokkattathe itti, ⁵ “Mpokat cik noka'ran kolappa ana'ra nga'rama, anakka mpokat cik ana'ra nga'rama anathantakat itti mpimmat papu p'rek pittik ere kret koccokittathe nthomipit moco'rin auo ntan ntothi'rot anthan na mpaik. ⁶ Ana mpokathakathe kicce ana mpaththiat itti wokat a'rupu worua woripira thapat appik, iartta iauro ana u'rupe appik. ⁷ Ana mpocckithe po're p'rek api'rethin itti, ‘Poththuruc uroki, akkwot pap'rek a'rko.’

⁸ Ana mpothiatherit itti, ‘Ili, mpannortte a'rupu iakanoka wo'rillir ana manna mannonekket ithon thin ca'ri culukku.’

⁹ Apo're apperekanthin attang itti, ‘Kirrnni i'ret a'rupu appik itti wakonnoka wo'rillir ia Kapik kokkothe wo'rillir.’

¹⁰ Alon len opakkat tit ma'ri m'rapuruk, a'rupu wen opakkat tothi'rot.

¹¹ Menik aul i'rapuruk iokat wothilathe naun nnoka'ran koKaiccaria oco'ro iccik koman na mpokat cik anikkoik.

¹² Kanang koKapik ki'rekathin itti kirrnni 'ra itti mpa-makot kin, ul enni i'rakkuruk iocckothe lon loleccuo womakathenin ana onin thi'rikathe noppa topul pen ipoccot ka'ran itti oKurnilioth. ¹³ Kwerekantset nin tat akka kwimmat u'rupa wothothilettat woKapik ai'rethok itti, ‘Othinthet oCamaan thon, ipoccot k'ran cakuruk itti oPoththuruc noka'ran koIappa akwanthan. ¹⁴ Kwerenung lon iloporot ila'rethung oung ana ku'ri kang.’

¹⁵ Anakka mpikkot cik anere, Kanang ikupupure kakkakathe nakin ammakka kokat kaiset ton ncinomun.

¹⁶ Ittina anokwarikat lon ila ili wokat wi'ret itti, ‘Oluanna pomamuthie pethettot mamuthie ng'ri anaruk onon thathocco mamuthie ngKanang ikupupure.’ ¹⁷ Ana amma

Kapik kethet kin thethet ithaccura nuthuk ammakka kethet ton ithoccokothē lon lolli oIeccuo oMiccie, oun oththa akka ani're itti mpalkot lon loKapik?"

¹⁸ Manakka okin thocci'kothe lon elli, akin ellakat ilakin 'ra llon loPoththuruc ana okin thopiranthet Kapik noka. Akin i're itti, "Linako nan cakuruk itti Kapik kokorronnot ul iakonnoka woIouth apa'rine lon ilokithak cik acco thikkoik thothupuththuput."

Ul ioccokothē lon loIeccuo noka'ran kAnththakkia

¹⁹ Ana okkwion ithoccokothē lon loIeccuo ithopettakinthet thokkiettāt thiak cik ithainet kin akka oIciththippanuc pokkuttathe okin thoingkathe noththok poPiniccia ana noththok poKupruc ana ka'ran kAnththakkia. Okin thokat akin erene ul woIouth wulluk lon loIeccuo. ²⁰ Anaruk opilingon nti iakin ithoccokothē lon loIeccuo ithokat thonoththok poKupruc ana wononoka'ran koKirin oingkat noka'ran kAnththakkia akin ikkat cik akin erene ul lon iloporot lolli oIeccuo iannoka woIouth. ²¹ Ana pu'ran polli pokat nakin ana ul woccathe lon lolli oIeccuo woppot ana wopakkanthet Ili woppot.

²² Ul ioccokothē lon loIeccuo iokat noka'ran koUrucelīm wocci'kathe lon ilokat cik akin othiat oParnapa noka'ran kAnththakkia. ²³ Anakka kweot ana kwim-makathe lon lothoporot thoKapik ana kwopirakathe noka ana kwikkatheik akwerenekin itti okin tha'rungkwot tit nci'kit culukku. ²⁴ OParnapa pokat poporot ana kwonu Kanang ikupupure koppot noka ana kwonu thocokot lon nocik'it ana ul woppot woccathe lon lolli.

²⁵ Ittina oParnapa poingkathe akwothokwancot oCcaul noka'ran koTharccic, ²⁶ ana akka kwiothok kwonakathok noka'ran kAnththakkia akin okkot cuththun okin oul ioccokothē lon loIeccuo ana okin thongkenekathe ul lon

woppot. Ana ul iammakothok wociettakathe k'ran cit-tokit itti Micciin noka'ran kAnththakkia.

²⁷ Ana noma'ri men aul w'rek wothernte lon loKapik akkakat nnoka'ran koUruccelim akin akkakat noka'ran kAnththakkia. ²⁸ Apul p'rek nti iakin wothernte lon loKapik poccot k'ran itti Akapoc oco'rat kapik ngKanang ikupupure akwi'rekat itti ti takaik noco'rong coRoma appik. Ti ammakka enti tokat cik noca'ri ica oKklauthioc pokat cik noili ana tikko takaik cene noma'ri imanthan cakuruk ittina. ²⁹ Aul iammakothok erekat threk itti okin thacintinthe ul iaik noththok poIouthia alp'rek. ³⁰ Elli ilakin thokkothe, okin tha'rntothe akucci ana okin thothiathe oParnapa ana oCcaul ngngin akin onekine ul ittittik woul wocungkut coul ioccokothe lon loIeccuo noka'ran koUruccelim.

12

Oiakup pokkuttathe ana oPoththuruc ponekkettathe ikorrkor

¹ Ana noca'ri cen alli oIruthuc ikkat cik acciccokot ul w'rek noul ioccokothe lon loIeccuo othakka itti akkiet kin thiak. ² Kwokkwothe oIakup opang poluanna ngk'rittang ikukwit. ³ Anakka kwimmat itti lon len lopiriet ul wolouth noka, kwocokathe oPoththuruc cakuruk. Lon len lokkattathe noca'ri cokamuthe karrakith iella mü'rükül tit. ⁴ Anakka kwocokothok akwonekkekathok ikorrkor, aul irro iokat mungkut moco'rin ana cungkut culukku conat ul woco'rin akin angwothok akamuthe koThaurrot kaman k'rek cik komarttakot akwantothipittakot lon tokit koul. ⁵ Ittina oPoththuruc pikkatheik ikorrkor ana ul ioccokothe lon loIeccuo wikkatheik a'ranok nga'rama appinappin.

⁶ Ana ngko'ra aIruthuc parthuk ona oPoththuruc akwothipittakot lon tokit koul ngorrot ngen, oPoththuruc pokat inthe ana nili nokat cik anangwothok akkwaik

itho'rkit then akkwi'rikikkakot nynyol nye'ra ana ul irro inangwot cik aco'ro icürük cothapat. ⁷ Menik accokkot au'rupa wothothilettat woli ummanthet oPoththuruc ncik ngk'ran kothik akkwathok nti inthe ai'rekathok itti, “Uroki cokocokot.” Ittina anyol apukkat nnonyaun.

⁸ Au'rupa wothothilettat woKapik i'rekathok itti, “Aki eret ana wok ana i'riko ku'rat korikin.” Ana oPoththuruc pokkathe ammakka wi'rethok. U'rupa wothothilettat woKapik wappi'rekathok itti, “Omakothin.” ⁹ OPoththuruc pomakathok thapat nti ikorrkkor ana kwommat itti ngimpen akka u'rupa wothothilettat woKapik waik wokkot ana lon len laik icari ana kwokat akwere itti kwathantakot. ¹⁰ Okin thoppathe noul iokat cik angwot cik akin akkakat nokathat kopaponte ipanekarot icarak coman coUruccelim. Kathat kanyanthet kin prek ana okin thoppatherit. Anakka okin thomakothe kathar papotte, u'rupa wothothilettat woKapik woththekathe naak accokkot.

¹¹ Ittina oPoththuruc inakat nan itti kwokat akwokorronno athantako akwi'rekat itti, “Inenni Kapik kothinthin u'rupa wothothilettat wung atho'rethin nti ilon loIruthuc ana nti ilon ila ul woIouth waik wa'rikot itti lakkattat naun.”

¹² Menik akka kwinat lon ilaik, kwoingathe tuan toMeriom onnan poLuanna ipoccot k'ran cakuruk itti oMarkkoc na ul woppot wokat awa'rntakothe ana wokat a'ra nga'rama. ¹³ APoththuruc okkwat kathat othakka itti akin anyinok, aukul iopari iorekot ioccot k'ran itti oRotha oingkat athanyo. ¹⁴ Anakka woccikothe po're poPoththuruc, apirakat noka ana wollathe opakot tit okorronno anyo athi're itti, “OPoththuruc paik icürük.”

¹⁵ Okin thi'rekathe ukul iopari itti, “Ngkwonu purruri?” Anakka ukul iopari w'rat ere itti oPoththuruc, akin i'rekat

itti, “Aththoka u'rupa wothothilettat woKapik (okorrono oka oPoththuruc).”

¹⁶ Anaruk oPoththuruc po'runkwathe nan akwockwe katham puccuk akin anyat anakka okin thimmarok okin thikkatheik akin oprttakattit. ¹⁷ APoththuruc onthantheikin ukun kapik itti okin thangkoik okorronnokkot po're ana kwerekant het kin tat akka Ili kelikkorok nti ikorrrkor ana kwi'rekathekin itti, “Ni'ret oIakup ana ul ioc-cokothe lon loleccuo w'rek lon len,” ana kwoththekathe nakin akweo noka'ran k'rek.

¹⁸ Ana ngi'rimak alon ommakekat ul irro aikkat cik aprttakot tit aere itti ngintha akka ainet oPoththuruc. ¹⁹ Ana oIruthuc pokwancathe oPoththuruc ana kwanniathok ana kwipittathe ul iokat cik angwot cik lon ilokat cik akwi'rekat lon lonthomat itti okin thangutta.

Thio thoIruthuc

Ittina aIruthuc urokat nnoththok polouthia akwoingkat noka'ran koKaiccaria akwothikkat cik than papotte. ²⁰ Ana kwikkatheik akwa'retto nul wonoka'ran koCcur ana koCcithon. Ittina aul wonoka'ran koCcur ana koCcithon i'rikat lon ithun ana okin thakkakathe akin oingkanthet Ili oIruthuc akin othopakket ku'ri cik okin aththut. Ana akka oPilacoththoc ili wung ittarothonk wangintheit ul lon lothopakkot iku'ri, okin thokat thonu itti okin thapakkot iku'ri akka okin thokat akin occere thu'rit nnoththok pung.

²¹ Ana noca'ri icakin thokat cik thatherene ili nan, Ili oIruthuc akat eret wung woili ana kwikkatheik nopprrok pung akwerene ul appik. ²² Ul wokkwathe kuri itti, “Po're empi pakannoka popul iponyi, po're empi pokapik.” ²³ Ncinang au'rupa wothothilettat woili akkakat athikkiekat ili pongo anangak o'rakkathok icarak akwiat. Akka kwinnikothe itti kwrik noKapik.

²⁴ Anaruk ul wikkatheik arttakot nan ithocokot lon loIeccuo ana lon loKapik appaththakat cik na'ran appik.

²⁵ Anakka oParnapa ana oCcaul thomarttot ngre ngen, okin thokkaprttakathe ntan noka'ran koUrucelime okin oLuanna ipocot k'ran itti oMarkkoc akwittarot kin.

13

OParnapa okin oCcaul thothilathe

¹ Ana iul iocokotho lon loIeccuo noka'ran kAnthakkia, ul wothernte lon loKapik ana ul iangkene wokot cik, oParanapa ana oCcomoun (ipocot k'ran itti cakuruk itti oNeicer ilonu itti pul iponyi), ana oLukkio (ponoka'ran koKirin), ana oManain (ipupokkot okin oIruthuc tothun), ana oCcaul. ² Anakka okin thokat cik akin a'rane Ili nga'rama ana oco'ro nothu'rit, Kanang ikupupure ki'rekathekin itti, "Nokirnninthin oParnapa ana oCcaul akin oreko ngre ia mpakkarinet kin itti okin thathoreko." ³ Anakka okin thomarttot thocokot tho-co'ro nothu'rit ana a'ra nga'rama okin thonekkekathe nyaun nakin ana okin thothiathekin ikathar.

Noththok poKupruc

⁴ Kanang ikupupure kothiathekin ikathar akin oingkat noka'ran koCulukia ana nthan okin thoingkate arrot cik iconthomat coritho'rikit thorok irapangka icocot k'ran itti Kupruc. ⁵ Anakka okin thaat noka'ran koCalamic, okin thongkenekathe lon loKapik nomuththun ma'rama moul woIouth. Ana oLuanna ipocot k'ran cakuruk itti oMarkkoc pokat akin aththut akwittarot kin.

⁶ Akin akkakat okko nocik iconthomat coritho'rikit thorok irapangka icocot k'ran itti Pappoc na akin thiothe pul poIouth iponu thurukut ana pul pothernte lon loKapik ngkarra ipocot k'ran itti ParIeccuo. ⁷ Ana opuruko iponu k'ran itti oCericio oPaoluc. Ili oCericio oPaoluc pokat

pinaik ntica ana wothillakanthet oParnapa ana oCcaul akka kwokat pongothe itti kwaccikot lon loKapik.

⁸ Anaruk oParleccuo iponat k'ran k'rek itti Elimac ngkarru koul woKrik kokat akwa'retto iaParnapa ana oPoluc othakka itti aili oPaoluc okorronno occokot lon loKapik nocikit. ⁹ Ittina oCcaul ipoccot k'ran itti oPoluc papponat Kanang ikupupure noka akwokathakat Elimac akwi'rekat itti, ¹⁰ "Oung ukul wopul pothopolul ana ngkwalikine lon cik iloporot ana ngkwoppethe lon noucce lulluk ilai'riththa ul ngngin. Ngkwaprto lon cik lolli ilaik icat athikkie karra. ¹¹ Ana inenni Ili waik wathattatang, ngkwi'rimat ana ngkwannimma manna imma k'ran kocingki noma'ri motte."

Ncinang ngi'rimak ngo'rumathe pul pen ngenthung ana kwikkatheik akwamarththakat cik akwokwantot cik othakka itti apul p'rek othokok nukun. ¹² Anakka ili oCericio oPaoluc wimmat lon ilokkattathe, kwocckathe lon loKapik akwoprattakat tit nolon lolli ilongkenettat.

OPoluc ana oParnapa noka'ran kAnththakkia iccik koPiccithia

¹³ OPoluc ana ul iakin thokat cik tharrathe ikuppu'rung kono'i'ri akin oththekat noka'ran koPappoc akin oingkat noka'ran koPerca noththok poMippilia na oLuanna ipoccot k'ran cakuruk itti oMarkkoc pappoththet nakin akwopakkot noka'ran koUruccelim. ¹⁴ Ana noka'ran koPerca akin thoi ngkathe noka'ran kAnththakkia ikaik iccik koPiccithia. Ana noca'ri caCcepith okin thoi ngkathe nocuththun ca'rama akin ikkat cik. ¹⁵ Anakka lon lakkakkarakat nti iatham wolon lothonce'ret lon cik loMucca ana nti iatham woul wothernte lon loKapik, anili nonocuththun ca'rama othianthet kin thon itti, "Pangkingon, amma onon akkonu lon l'rek ilittarot ul, annere."

¹⁶ Ittina aPoluc urokat kapik akwonthat ukun kapik akwi'rekat itti, "Ul woIccereil ana ul iannoka ul woIouth ia'rane Kapik nga'rama, nocckothin. ¹⁷ Kapik koul woIccereil kakkarot ongappan thonnon kokat noul ana arttot nakin noca'ri ica ul wokat noththok poMuccir ana kwonakathekin ntan mpu'ran pung ipakorronno alka¹⁸ ana kangwothekin luput arrial we'ra (40) ithampang ithon-thomat. ¹⁹ Ana kwopa'ret ul cik mothok me're'rapuruk nnoththok poKanaan ana kwekathe ul wung mothok men akin opakot nan amoka men. ²⁰ Lon elli appik lonekot luput arrial ukuluk ma'ri moco'rin ana arrial we'ra ana alkaire (450).

Anakka elli locothakothe, Kapik konakanthet kin nili nothoce'ret lon cik anakkma kin puccuk mono aca'ri akkakat copul pothernte lon loKapik oCcamuil. ²¹ Menik aul ipittat ili iakatha lon len ana lon lopathok appik ana Kapik kekathekin oCcaul ukul woKkic wonopothok poPeniemin okkwi ipathoka ili wen luput arrial we'ra (40). ²² Anakka oCcaul popa'rot cik, kwonekkekathe oThauth cik ili wen. Ki'rekathe itti, 'Mpiothe oThauth ukul woIecce pul ipacikit cin caik nan, kwakkot lon appik ila mpongothe itti kwakkot.'

²³ Kapik konakathe oleccuo ipatho'ret ul nti ithiki thoThauth ammakka kokat konekkethe lon cik. ²⁴ Ana akka oleccuo pokat parthuk ao, oIuanna pongkenet ul woIccereil itti wapa'rine lon cik ilokithak akin occo mamuthie appik. ²⁵ Anakka oIuanna pokat cik akwomartto ngre ngung, kwi'rekathekin itti, 'Onon thi're itti oun oththa? Okorronno oka oun pen ipa anno'rikot anaruk kwaik panthan ana oun manna panneko nan itti mpaki'rinok lo'rak lowok woriracok.'"

²⁶ APoluc ikkat akwere itti, "Pangkingon, nyukul nyAprein ana onon ithannoka ul woIouth ana itha'rane

Kapik nga'rama, lon elli loKapik lotho'rettat lainetton.

²⁷ Ul woUruccelim ana nili nen thommat oleccuo, anaruk nthakmak okin thothikkiekathe lon icat loul wothernte lon loKapik ilakkakkarakot noca'ri caCcepith appinappin.

²⁸ Antoka manna itti okin thakinniot lon moloko ilakin okkwothok ngngin. Okin thipittathe oPilaththoc itti kwakkwothok.

²⁹ Manakka okin thokkothe lon appik ilerethok, okin thorpekathok cik ntan nnothapak ana okin thocikkathok ippu.

³⁰ Anaruk Kapik kurokiekathok nti ithio, ³¹ ana ul wung immakothok wimmakathok ma'ri moppot iaat akin aththut nnoththok poCeli'likin ao noka'ran koUruccelim. Ana inenni okin thaul immat lon ngkit woul wonnon.

³² Onin therenenon lon iloporot loIeccuo, ila Kapik konekkenthet ongappan thonnon cik ³³ kothikkienet ton icat ana nyukul nyen nthurokie oIeccuo nti ithio. Ammakka lokurrakot iatham woMocumur itti, 'Oung ukul win

inenni mpothakkanung oththe.'

³⁴ Ana nthere lon itti Kapik kurokiet oIeccuo nti ithio, ana kannokorronnako itti akokuttat li'rettat ngkathar engki, 'Mpethung thupupure ana thethietta ithonekkettanthe oThauth cik.'

³⁵ Li'rettat na'ran w'rek itti, 'Ngkwakannappokorronno okkwi ipupure pang akwokutta.'

³⁶ Akka oThauth pokkothe lon ila Kapik kongothe itti kwakkot iul wung, kwiathe akwocikkakat okin oththangon, ka kung kokuttakathe ippu. ³⁷ Anaruk okkwi ipa Kapik kurokiet nti ithio pakannokutta ka.

³⁸ Ittina pangkingon, mpongothe itti onon thina itti onin thaik thangkenenon itti lon ilokithak lon laccikakot

ngk'ran koIeccuo. ³⁹ Ana onon thonu itti nthina itti okkwi ipoccoke lon len nocikit kwaccikakinthet lon lung ilokithak ila lon lothonce'ret lon cik loMucca lakonnocikinthok. ⁴⁰ Nina nan itti lon ila pul pothernte lon loKapik papperet lakonnoka nanon ili're itti,

⁴¹ 'Onokatha, onon ithakkot ngure noKapik,
 noparttakot tit annillekat,
 akka mpakkot lon l'rek inenni ilanon okorronno occokot
 nomikit antoka
 manna pul p'rek pi'rethenon.'"

⁴² Anakka oPoluc ana oParnapa thokat cik akin eo oththe nocuththun ca'rama, ul wi'rekathekin itti okin thatherenthet lon elli attang noca'ri caCcepith icanthan. ⁴³ Manakka lon lomarttakot ul woppot woIouth ana iokat wannoka woIouth ia'rane Kapik nga'rama womakathe oPoluc ana oParnapa akin erekanthet kin itti okin tha'rungkot ithoporot thoKapik.

⁴⁴ Ana noca'ri caCcepith icomakothe, ul wakkakathe nti icarak coman appik athocikot lon lolli. ⁴⁵ Anakka ul woIouth wimmat cungkut coul ana okin thonyirakathe ana okin thikkatheik akin a'rettakot nolon ilakin theret ana ocungkwo oPoluc llon lokithak.

⁴⁶ Ittina oPoluc ana oParnapa thothianthet kin ella n're itti, "Lokat loporot kannan itti lon loKapik lerettanenon tokit anaruk onon thei th'rat lakene itti onon thanneko nan itti onon thacco thikkoik thothupuththuput ana onin thapakinthet ul iakonnoka woIouth. ⁴⁷ Akka elli akka Ili wi'rethenin itti,

'Mpothikkiet non k'ran koul iannoka woIouth,
 othakka itti annona tho'retta nocapu ncik appik.'"

⁴⁸ Anakka ul iakonnoka woIouth wocikithe lon len, okin thopirakathe noka akin othiakanthet lon lolli cik ana

okin itha Kapik kakkarothe thikkoik thothupuththuput thoccoke the lon loKapik nomikit.

⁴⁹ Lon loKapik lopettakatheik na'ran appik ana ul wocikathe appik. ⁵⁰ Anaruk ul wolouth wikkatheik aereket nili nonoka'ran ana ul iari iokat wakannoka wolouth iokat a'rthan ana iokat a'rane Kapik nga'rama naPoluc okin oParnapa, ana okin thikkatheik akin occokiet oPoluc ana oParnapa thiak ana okin thokiccekathekin noka'ran ken. ⁵¹ Ittina okin thokkwathe tu'rupang noracok ana topakkanthet ul i'rat kin ana okin thoi ngkathe noka'ran ikocot k'ran itti Ikkonia. ⁵² Ana ul iammakothok wopirakathe noka ana Kanang koKapik iupupure wokat nakin.

14

oPoluc ana oParnapa thangkene noka'ran kolkkonja

¹ Anakka oPoluc ana oParnapa thaat noka'ran kolkkonja, okin thoi ngkathe nocuththun ca'rama ammakka oPoluc ana oParnapa okkettet. Okin thoi ngkenekathe ul lon loKapik, ana ul wolouth ana iakonnoka wolouth wocokathe lon loKapik nomikit. ² Anaruk ul wolouth i'rat occokot lon loIeccuo wocikittanthet ul iakonnoka wolouth lon ima, akin 'ra ul iocokothe lon loIeccuo nomikit. ³ Ittina oPoluc ana oParnapa thikkatheik ma'ri moppot akin ongene ul lon lolli ella n're, ana Kapik kekathekin pu'ran akin ikkat cik akin okkot lon ilommaththik ilokenet itti lon lothoporot thoKapik lokat icat. ⁴ Ana ul wonoka'ran willillakatherit mungkut me'ra a'rek wokat okin oul wolouth ana a'rek wokat okin oul wothothilettat woIeccuo.

⁵ Ittina ul wolouth ana iakonnoka wolouth ana nili nen thi'rekathet itti okin thie oPoluc ana oParnapa ka kongo ana okin thokincathekin mmothok. ⁶ Anaruk oPoluc ana oParnapa thinakathe nolon len ana okin thollathe eo noka'ran koLictthra ana koTherpa ikokat

noththok poLikkonia ana na'ran iaik iccik ken. ⁷ Ana okin tho'rungkothe akin ongkene lon iloporot loleccuo than.

Noka'ran koLichthra ana koTherpa

⁸ Ana noka'ran koLichthra, pul p'rek pappokat cik than pakimico nci ammakka pokwontat ana ponnonyaro aththik. ⁹ Ana pikkatheik apocçikot akka oPoluc erene ul ana oPoluc pokathakathok ana kwimmakathe itti kwonu thocçokot lon loleccuo nociküt ana kwathakka poporot. ¹⁰ Akwi'rekathok mpo're cittan itti, "Oco'rothe kapik ac-cokkot," apul urokwat ana pikkatheik aponyaro.

¹¹ Anakka cungkut coul cimmat lon ila oPoluc pokkothe, okin thokkwathe kuri ngkarru koul woLikkonia itti, "Kapik kungkwiet ka kung mpul iponyi ana kainet ton." ¹² Ana okin thocçiekathe oParnapa k'ran itti oCappic k'ran kokapik ken. Ana oPoluc itti Armic akka kwokat pul ipothillathe pokapik ken, ana akka kwokat akwere kannan napilingon. ¹³ Ana man motha'rane oCappic nga'rama mokat thapat nti icarak coman. Ana pul poman motha'rane oCappic nga'rama monnat nyura ana po'ren akwonakat icürük coricarak coman akka ook ana ul wung thongothe itti okin thakinthet oPoluc ana oParanapa a'rupu wothokiot ngüccük cik.

¹⁴ Anakka ul wothothilettat, oPoluc ana oParnapa thocçikothe lon len okin thillillathe eret nnoka akka okin thocçikothe aul ocungko Kapik nthokinthet kin a'rupu wothokiot ngüccük cik ithokat thannoka then anaruk thoKapik tulluk, akin ollat tocungkut akin a'retto itti, ¹⁵ "Ul ngintha akka annokkinthet ittina? Onin ul ionyi ammakka onon, onin thaik thonanet non lon iloporot loleccuo, itti nthapa'rane lon cik illella lon cik, annopakkinthet Kapik ikaik icat ikokkothe tothi'rot ana capu ana tok inapangka ana okkot a'rupu appik tit. ¹⁶ Kokorronnot ul woma'rot appik akkot lon ilakin

thongothe itti okin thakkot. ¹⁷ Anaruk kwokat akwo-kene itti kwaik nthoporot thung, nthapie kapik ana nthora cükkü ana ethet non thu'rit itharako ana kethet non thu'rit thoppot anno'rko ana kopiriet non noka.”

¹⁸ Mommakathe oce're cungkut coul llon len itti wang-winekin a'rupu wothokiot ngüccük cik anaruk akka okin therenet kin itta'rene akin antoco'ro.

¹⁹ Ittina ul w'rek woIouth wakkakathe noka'ran kAn-ththakkia ana kolkkonina ana werekanthet cungkut coul acoprttakat iaPoluc ana okin thokincathok mmothok mono akin othathok thapat noka'ran koLichthra akin i're itti kwiot p'rin. ²⁰ Anaruk akka ul iammakot oIec-cuo wa'rntakathe iccik kung kurokathe ana kwopakkathe icarak coman. Ana ngorrot ngen, ook ana oParnapa thoingkathe noka'ran ikoccot k'ran itti Therpa.

Thopakkot noka'ran kAnththakkia noththok poCcuria

²¹ Menik okin thongkenekathe lon iloporot loIec-cuo noka'ran koTherpa ana ul woppot womakathe lon iloporot loIeccuo. Ana okin thopakkathe noka'ran koLichthra ana noka'ran koIkkonina ana kAnththakkia noththok poPiccithia, ²² akin opo'rie ul iammakothok than ana omareket kin akin o'rungkot ilon lothocokot lon iloporot loIeccuo nomiküt, akin i'rekat kin itti, “Oron thonu itti thakkette ilon ilokithak aron tharthuk i'riko ingili ngoKapik ioporot.” ²³ OPoluc ana oParnapa thokat akin onekket ul cik ittittik woul iakatha lon loul ioc-cokothe lon loIeccuo ana akin a'rane nga'rama na'ran ana oco'ro nti ithu'rit appik ana ethet kin ikkun wollu iakin thonekkethe cükit nan.

²⁴ Anakka oPoluc ana oParnapa theot noka'ran noththok poPiccithia akin akkakat noththok poMippilia.

²⁵ Ana okin thongkenekathe lon loKapik noka'ran koPerca ana okin thoingkathe noka'ran kAththalia.

²⁶ Ana nnan okin tharrathe tok irapangka akin eo noka'ran kAnththakkia ana na ul iammakot lon loKapik wa'ranet kin nga'rama akka okin thocothe ngre ngen nthoporot thoKapik. ²⁷ Manakka okin theot, akin a'rintat ul ioccoke lon loIeccuo tothun akin erekanthet kin lon ila Kapik kokkothe nti inyaun nyen ana tat akka kanyinet ul iakonnoka wolouth kathar kothocokot lon loKapik. ²⁸ Ana okin thikkatheik ceneket puccuk okin oul iammakot oIeccuo.

15

Cuththun coUruccelim

¹ Ul w'rek wuot ntan nnoththok polouthia aeo noka'ran kAnththakkia akin ikkat cik akin ongene ul ioccoke lon loIeccuo itti, "Onon thanno'rettat amma onon thannoekkot ammakka lon lothonce'ret lon cik loMucca." ² Lon len lokorronnathe oPoluc ana oParnapa akin a'retto ana oplarot okin oulon. Ittina akin ummat oPoluc ana oParnapa ana opilingon ithoccoke lon loIeccuo itti akin eo noka'ran koUruccelim akin otheret lon lothoekkot okin oul wothothilettat woIeccuo w'rek iaik noka'ran koUruccelim ana ul ittittik woul ioccoke lon loIeccuo. ³ Ul ioccoke lon loIeccuo wothiathekin ikathar, anakka okin thokat cik akin eo, okin thokathe nocik coPiniccia ana coCamira akin erene ul ioccoke lon loIeccuo tat akka ul iakonnoka wolouth woccoke lon loIeccuo. Lon elli lopiriekathe ul noka kannan. ⁴ Anakka okin thaata noka'ran koUruccelim ul wothothiletat woIeccuo ana ul ioccoke lon loIeccuo ana ul ittittik woul ioccoke lon loIeccuo wikkiekathekin cik papenang. Okin therekanthet kin lon appik ila Kapik kokkothe nti inyaun nyen.

⁵ Menik aul w'rek woPriccin ioccoke lon loIeccuo urokat kapik akin i'rekat itti, "Ul iannoka wolouth wonu

itti wakekkot ana o'rumo nolon lothonce'ret lon cik lo-Mucca.”

⁶ Aul wothonhiletat woIeccuo ana ul ittittik woul oingkat nocuththun akin othokatha lon len. ⁷ Anakka okin theret puccuk aPoththuruc urokat kapik akwi'rekat kin itti, “Pangkingon, onon thina itti noma'ri imeot Kapik kakkarorin nti ianon itti aul iannoka woIouth occikot lon iloporot loIeccuo nti ithon thin akin occokat nomiküt men. ⁸ Ana Kapik ikina miküt moul kokenet lon itti kongothe ul iannoka woIouth kwethet kin Kanang ikupupure ammakka kethet ton cakuruk. ⁹ Kwannopetto iaron ana kwannopetto iakin akka kwimet miküt men nthocokot lon lung nomiküt then. ¹⁰ Ittina onon thontha akka nthongothe itti nthennekke Kapik nthonekset lon ilimün nokalak koul iammakothok ilalkothekin ana manna ilalkothe ongappan ma'rot itti okin thakkot? ¹¹ Akka oron thinan itti oron appik tha'rettat ngkathar kulukku nthoporot thoili oIeccuo ammakka okin o'rettat cakuruk.”

¹² Ul wangkathetik appik akin occikot lon loPoluc ana loParnapa akin eret lon ilommaththik ila Kapik kokkinthet ul iannoka woIouth nynyaun nyen. ¹³ Anakka okin thomarttot lon len, alakup urokat kapik akwi'rekat itti, “Pangkingon, nantokkwinin kunu ncik. ¹⁴ OPoththuruc perenet non lon loca'ri ica Kapik koinet ul iannoka woIouth cittoküt othakka itti akothakkaru opilingon nti iakin akin othakka thung. ¹⁵ Ana lon loul wothernte lon loKapik laik leret lon elli ammakka lokurakot inatham nen itti,

¹⁶ ‘Amma elli lothakothetik ana mpakkaprttako
ana mpathuno cü'rük coThauth

mpuno a'ran ionguttat anoce'rekat cik.

¹⁷ Othakka itti aul w'rek appik aine Ili,
ana ul appik iannoka woIouth ia mpakkarot wainin.

Oun Ili pi're elli.'

¹⁸ Mpokenet lon elli nci ma'rot.

¹⁹ Ilen akka anakatha itti oron thannarittinthe ul iannoka ul wolouth nolon limin iaik waine lon loKapik.

²⁰ Oron thira thakurrinekin aron i'ret kin itti okin thaco'ro nti itho'rko kapa ka'rupu ionguttanet 'ran, ana itti nokorronno a'ro nul nuthuk, ana nokorronno o'rko kapa ka'rupu iannoceccetta ikalak ana okorronno ikko ngüccük ngen. ²¹ Lon lothonce'ret lon cik loMucca longkenettat ncinomun na'ran appik ana akkakarako nomuththun ma'rama appinappin noca'ri caCcepith."

Ka'rmacak ikaine ul iannoka wolouth iocckothe lon loleccuo

²² Menik aul wothothilettat woleccuo ana ul ittittik woul ana ul icckothe lon loleccuo appik i'rikat lon lulukku itti okin thummo ul w'rek wen akin othiöt kin noka'ran kAnththakkia akin oPoluc ana oParanapa. Akin ummat ul we'ra iomura oIoutha iponat k'ran cakuruk itti oParccapa ana oCcila, ul wen wokat ittittik woul iocckothe lon loleccuo nti iapangon appik. ²³ Akin othiät kin ngka'rmacak engki,

Onin ul wothothilettat woleccuo ana ul ittittik ana opangkangon,

Onin thothinthe ul iannoka wolouth iocckothe lon loleccuo noka'ran kAnththakkia ana noththok poCcuria ana poKilikkia:

Thomicco.

²⁴ Onin thocckithe itti ul w'rek weot nnanin cene ana wuethenon kaik ilon ilakin thereket kin llon ilaprttakiet kin tit ana oikkwaro kin ma. ²⁵ Ittina onin appik thi'rikot lon itti onin thummo ul w'rek anin othiäthe non okin opangkingon oPoluc ana oParanapa,

²⁶ ul wen iorekot thiak kannan nti ik'ran kolli oIeccuo oMiccie. ²⁷ Ittina ilen akka onin thiak thathinthet oIoutha ana oCcila akin othi'ret non lon nthon then itti lon ilanin thokurrinet non laik icat. ²⁸ Laka loporot noKanang ikupupure ana naron itti kakorronno okorronno itti lon lainenon limin nnolon ilaron thonu itti oron nthakkot ilaik itti, ²⁹ noco'ro nti itho'rko kapa ka'rupu ionguttanet 'ran, nokorronno ikko nguccuk, nokorronno o'rko kapa ka'rupu iannokecetta ikalak, nokorronno a'ro nul nuthuk. Nokwantot kathar ikanon opa'rine a'rupu iongantettat cik appik.

Thararot.

³⁰ Aul iothilathe oingkat noka'ran kAnththakkia akin akkarat ul tothun appik ioccoothe lon loIeccuo akin ummat ka'rmacac ikonu lon tit ilakin thothilathe ngngin.

³¹ Aul akkakkarat lon len aul opirakat noka nolon len ilokat alomereket kin. ³² AIoutha okin oCcila ithaththokat ul wothernte lon loKapik erekat lon loppot akin omereket ul ngngin ana opo'riekin than. ³³ Anakka okin thikkot papotteik, aul iakin thiak thoccokothe lon loIeccuo othiat kin ikathar lon loporot akin opakkinthet okwion ithokat thothiothekin. ³⁴⁻³⁵ Anaruk oPoluc ana oParnapa tho'rungkatheik noka'ran kAnththakkia, nakin ana opilingon thoppot thikkatheik akin ongkenet ana ere lon lolli.

OPoluc pillakorit okin oParnapa

³⁶ Ana papotteik aPoluc i'rekat oParnapa itti, "A'rik ireo noul na'ran appik iarit thaththongkenet lon loIeccuo irothokatha itti okin tharaththa." ³⁷ Ana OParnapa pangkathe itti kwipo oluanna ipoccot k'ran cakuruk itti oMarkkoc akin eo okin aththungon. ³⁸ Anaruk oPoluc pokathakathe ere loporot itti okin thakannipok akka kwappoththet nakin noththok poMippilia ana kwappannoreko ana kwannittarot kin ire. ³⁹ Akin a'rettat akin

oParnapa kannan mono akin illakat tit aParnapa onekat oMarkkoc akin oingkat okko irok eo noththok poKupruc. ⁴⁰ Anaruk oPoluc ponekathe oCcila akin oingkat aul iocckothe lon loIeccuo ipittat Kapik itti kaka naak ai'rekathok itti, "Athoporot thoKapik oka naung." ⁴¹ Ana kwoingkathe okko noththok poCcuria ana poKilikkia na kwikkot cik akwopo'rie mungkut than moul iocckothe lon loIeccuo kurekkurek.

16

oThimiththaoC paine oPoluc ana oCcila

¹ OPoluc ana oCcila thoi ngkathe noka'ran koTherpa ana noka'ran koLichthra na oThimiththaoC pul ipam-makot oIeccuo pokat ngkaman. Onnan pokat poul woIouth ipocckothe lon loIeccuo anaruk oththan pokat poul iannoka woIouth. ² Ul iocckothe lon loIeccuo wonoka'ran koLichthra ana koikkonia werethok llon loporot. ³ OPoluc pappongothe itti kwipok akin othonyaro akin aththe'ra ana ilen akka kwoekkiekanthok akka ul woIouth iokat cik nomo'rong cinang thinat oThimiththaoC papenang itti kwokat pannokekkot akka oththan pappannoka poul woIouth. ⁴ Anakka okin thokat cik akin okkette nomo'rong, okin thokat akin erene ul iocckothe lon loIeccuo. Okin thokat akin erenekin lon ila ul wothothilettat woIeccuo ana ul ittittik ilakin thi'rikothe tothun noka'ran koUruccelim itti okin thonu itti okin tha'rumo nan. ⁵ Ittina ul iocckothe lon loIeccuo wopo'riettakathe than ithocckot lon nomikit aikkat cik arttakot nan appinappin.

OPoluc pathantakot pul poMakthonia

⁶ OPoluc akin opurukon thoi ngkathe okko nocik coPricia ana coKalaththia akka Kanang ikupupure kokat ki'rethekin itti okin thakorronno eo na'ran wonoththok

pAccia. ⁷ Anakka okin thaat nokwen konoththok poMiccia okin thennekkekathe itti okin thi'riko noththok poP-ithinia anaruk Kanang ikupupure koIeccuo ko'ramittathekin than itti okin thanni'riko. ⁸ Akin okkat noththok poMiccia akin oingkat uo noka'ran koThthruac. ⁹ Ana ingko'ra aPoluc athantakat itti kwimmakat pul p'rek ponoththok poMakthonia apoco'ro apipittothok nthiak itti, "A'rik noththok poMakthonia athittarot nin." ¹⁰ Anakka oPoluc pimmat lon len anin urokat kapik anin oingkat noththok poMakthonia anin i'rekat itti Kapik kakkarot nin itti onin thathongkenekin lon iloporot loIeccuo.

OLithia pothakkat pul polli

¹¹ Onin tharrathe kuppu'rung kono'ri noka'ran koThthruac anin oingkat irok irapangka innoingkat noththok poCcamoththrakkia ana ngorrot ngen innoingkat noka'ran koNiappolic. ¹² Ana nceneket onin thoingkathe noka'ran koPilippi ka'ran ikokat inyaun nyoRoma ana onin thikkatheik than ma'ri ammut.

¹³ Ana noca'ri caCcepith onin thoththekathe noka'ran koPilippi anin eo nokwanthang korue nanin thokat inome itti onin thiot ka'ran ka'rama. Onin thikkathe cik nocapu inikkat cik inere ne ul iari ia'rantakothe cinang.

¹⁴ Ana opilin nti iakin ithokat akin occikot lon pokat pul ipopari ponat k'ran itti oLithia ponoka'ran koThiaththira pokat apokette eret itholo ionat cekerek crik ana kwokat akwa'rane Kapik nga'rama aKapik anyanthok cikit akwocikat lon loPoluc. ¹⁵ Anakka kwocot mamuthie okin oul wung woruan appik kwakkarathenin itti onin thaeo tuan thanung ana kwi'rekathe itti, "Nanthan annathikkoik tuan thanin amma onon akkathata itti oun pul ipocokotho lon loIli." Ana kwo'ramittathenin than ana onin thocckathe lon lung.

oPoluc ana oCcila thaik ikorrkkor

¹⁶ Ana ca'ri c'rek anin thokat cik ineo noka'ran ka'rama innocurat ikkul iopari iarekine pul ionat u'rupa iokithak ana wakorronnok akwerene ul lon ilaik lathanthan. Ana wokat cik amonane ul wung akucci woppot nti ilon elli.

¹⁷ Ukul wen iopari womakathe oPoluc ana onin th'rek ana wikkatheik aere mpo're cittan itti, “Ul enni iarekine Kapik ikrik waik werenenon lon lokathar anno'rettat.” ¹⁸ Ukul wen wo'rungkwathe nolon len ma'ri moppot. Menik oPoluc puakathe ka kokkul iopari wen akwoprttakathok akwi'rekat u'rupa iokithak itti, “Mpi'rethung ngk'ran koleccuo oMiccie oppothe thapat nti iaak.” Noca'ri cen u'rupa iokithak oppat thapat nti ikkul ipopari accokkot.

¹⁹ Manakka ul ia ukul enni wokat arekine waththiot itti kathar iakin iot akucci ngngin koco'rot, okin thoc-cokathe oPoluc ana oCcila ana okin thonekanthet kin nili keccuk. ²⁰ Okin thonakathe oPoluc ana oCcila tokit konili inance'ret lon cik akin i'rekat nili itti, “Ul enni wo'louth ana okin thaik thakkot lon lokithak noka'ran konnon. ²¹ Okin thaik thangkene ul thathuma ithonu itti thannokkattat nul woRoma ana oron thakannangkot ana okorronno oreko ngngin.”

²² Cungkut coul ca'rntakathe acatta oPoluc ana oCcila ana nili nonoka'ran i'rekat itti okin thue eret akin opoko.

²³ Anakka okin thokkwettat kannan okin thorettakathe ikorrkkor, apul ipakatha lon loul ikorrkkor i'rettakat itti pa'rumo nakin papenang. ²⁴ Anakka pul ipakatha lon loul ikorrkkor pockikothe lon lonili kworrekathe oPoluc okin oCcila cinoppan than ana orpenekin tacok io'ren othakka itti akin okorronno onyaro.

²⁵ Ana thampang thongk'ra oPoluc ana oCcila thikkatheik akin a'rane Kapik nga'rama ana ongwo kinye ana ul w'rek iokat ikorrkkor wokat akkwinekin kunu ncik accikot kin. ²⁶ Ana accokkot acapu ikkat cik aco'rintittako ncik aco'rintittat korrkkor ncik appik, athat worikorrkkor

anyetakat cik appik, anyol inyi'rikikkakot nul apukkat nocapu appik. ²⁷ Anakka pul ipakatha lon loul ikorrkkor purttat nti inthe akwothat k'rittang kung ikukwit akwomekat itti kwakkwot ka kung akka kwaththiot athat wa'ran worikorrkkor awaik ncürük appik. Kwokat akwome itti ul worikorrkkor wopellet nti ikorrkkor appik. ²⁸ Anaruk oPoluc pi'rekathok mpo're cittan itti, “Kirrnni io ka kongo akka onin thaik cene appik.”

²⁹ Apul ipakatha lon loul ikorrkkor ipittat thik othakka itti akwimma cik ngngin akwollat ngngin noppan ikorrkkor akwocukkwat cik tokit koPoluc okin oCcila akwikkat cik akwokkwe ka. ³⁰ Menik akwonakat kin thapat akwi'rekat kin itti, “Pit pin, ngintha akka anokkot ano'rettat?”

³¹ APoluc ana oCcila i'rekathok itti, “Occokothe lon lolli oleccuo nocikit ana ngkwa'rettat ana ul woruan thanang appik.” ³² Ittina okin therekanthok lon lolli ana ul iaik thanung appik. ³³ Ca'ri cen ngko'ra apul ipakatha lon loul ikorrkkor ponekathekin akwimekanthet kin inyi. Nci cınang pul ipakatha ul ikorrkkor ana ul woruan thanung thoccathe mamuthie. ³⁴ Pul ipakatha lon loul ikorrkkor ponekathekin tuan thanung akwonakanthet kin thu'rit, ana kwokat popirat noka akka ook ana ul woruan thanung appik thocckothe lon loKapik.

³⁵ Anakka cingki cuat anili inance'ret lon cik othianthet nili inarran llon itti ili iakatha lon loul ikorrkkor welikko oPoluc ana oCcila. ³⁶ Apul ipakathe lon loul ikorrkkor i'rekat oPoluc ana oCcila itti, “Nili inance'ret lon cik wi'ret itti mpelikko non ana nthaeo lon loporot.”

³⁷ Anaruk oPoluc pi'rekathe itti, “Okin thokkwethenin tokit koul ana manna onin thoul woRoma ana orret nin ikorrkkor ana inenni okin thongothe itti okin thelikko nin nthu'rani? Kirrnni akin anthan ngka ken akin athelikko nin.”

³⁸ Anili inarran othianthet nili inance'ret lon cik lon lopul porikorrkor, anakka okin thocckithe lon itti oPoluc ana oCcila thokat ul woRoma okin thipathe n're. ³⁹ Nili nakkakanthet kin nerekanthet kin thiak then nti ikarak itti nthaccikot kin ana okin thipathekin nti ikorrrkor akin i'rekat kin itti okin thapa'ro cik noka'ran koPilippi. ⁴⁰ Anakka oPoluc ana oCcila thelikkakot nti ikorrkor okin thoingkathe tuan thoLithia nakin thincettothe okin oul iocckothe lon loIeccuo ana okin thop'riekathekin than akin oingkat.

17

OPoluc ana oCcila thaik noka'ran koThocculunukkia

¹ Anakka okin thokkot noka'ran kAmpipolic ana noka'ran kApolinia akin akkakat noka'ran koThocculunukkia na ul woIouth wonat cutthun ca'rama. ²OPoluc pi'rikathe nocutthun ca'rama ammakka akwokkettet ana kwerekathe okin aththungon aCcepith w'rapuruk akwongkene lon nti inatham nolon loKapik. ³ Akwongkene ana i'ret kin itti oMiccie papponu itti kwaccokot thiak ana uroko nti ithio. Akwi'rekat kin itti, "OIeccuo ipa mpaik perenenon lon len ook oMiccie." ⁴ Ul w'rek woIouth wangkathe lon loPoluc ana oCcila mono amakat lon len ana ul woppot iannoka ul woIouth ia'rane Kapik nga'rama wocckothe lon loKapik ana ul iari w'rek ittittik ionu lon ikkun cakuruk.

⁵ Anaruk ul w'rek woIouth wonyirakathe ana wa'rn-tathe ul w'rek iokithak worikathar nuthuk akin okkat cungkut akin erekanthet kin akin ikkat cik akin okkot camutta, okin thollathe tokaman kolaccun akin okwantot oPoluc okin oCcila itti akin onane cungkut coul. ⁶ Anaruk akka okin thanniot oPoluc okin oCcila okin thothathe olaccun ana ul iocckothe lon loIeccuo akin thonekanthet kin nili noka'ran koThocculunukkia akin a'retto akin ome

itti, “Nokatha ul enni wipothe thukungkun cik nocapu ncik appik ana okin thei thaat cene inenni ⁷ ana oIaccun pikkiet kin cik tuan thanung. Okin appik th'rat lon loili oKkaiccer akin ome itti ili w'rek waik woccot k'ran itti oleccuo.” ⁸ Anakka okin thocckithe lon len, ul appik ana ul ittittik wonoka'ran koThocculunukkia wuakathe ka. ⁹ Anaruk nili nelikkathe oIaccun ana ul iocckothe lon loIeccuo akka okin thethet kin akucci iakin thakkmakot nngin.

OPoluc ana oCcila noka'ran koPiria

¹⁰ Ca'ri cen ngko'ra aul iocckothe lon loIeccuo othiat oPoluc akin oCcila noka'ran koPiria. Anakka okin okko tentre okin thoingkathe nocuththun ca'rama colouth.

¹¹ Ana ul noka'ran koPiria wokat wongothe kannan itti waccikot lon noul woThocculunukkia okin thokkwinet lon loKapik kunu ncik papenang ana okin thikkatheik akin okwancot iatham woKapik appinappin akin opekie llon loPoluc akin okatha amma lon ila oPoluc peret laik icat. ¹² Menik aul woppot wolouth occokat lon loKapik ana cakuruk ul iari iannoka wolouth ana iokat wa'rthan ana iokat apellene Kapik ana ul woppot iomura iannoka wolouth.

¹³ Anakka ul wolouth iokat cik noka'ran koThocculunukkia wocckithe itti oPoluc paik pangkene lon loIeccuo noka'ran koPiria okin thomakathok tentre cakuruk, akin ikkat cik akin orumet ul naak. ¹⁴ Ul iocckothe lon loKapik wothiathe oPoluc ca'ri cen nokuthut korok irapangka anaruk oThimiththaoc okin oCcila okwentakat noka'ran koPiria. ¹⁵ Ittina ul iaththarot oPoluc wonakathok noka'ran kAthina ana wopakkanthet oThimiththaoc ana oCcila lon naPoluc itti akin occothok cik accokkot.

OPoluc paik noka'ran kAthina

¹⁶ Anakka oPoluc pokat cik akwo'rikot oThimiththaoc okin oCcila noka'ran kAthina kuakathe ka kannan non-ikkilan ina kwimmat noppatheik noka'ran kAthina appik. ¹⁷ Ittina kwerekanteth kin nocuththun ca'rama ana ul iannoka woIouth ia'rane Kapik nga'rama ana erene ul keccuk appinappin ana erene ul appik iaik than. ¹⁸ Okin thopllarathe llon ncungkut coul inaik nti ica waPikkurin ana woRoakkin ana opilingon thipittathe itti, "Pempi paik papo thon taththa?" Pilingon i're itti, "Kwaik peret Kapik ikaik prek." Okin thi'ret elli akka oPoluc pokat akweret lon iloporot loIeccuo thuro nti ithio. ¹⁹ Ittina okin thipathok akin onakathok nocuththun cAeroppakoc nakin thipittathok itti "Onin thongothe itti onin thina thongkene thang enthi ithie ithangkwaik pangkene. ²⁰ Ngkwaik pananenin lon ilie nocik cin ilanin thannocikot ca'ri c'rek ana onin thongothe itti onin thina lon len." ²¹ Ul wonoka'ran kAthina ana ul wokwat iokat cik noka'ran kAthina wokat akorronno okkot ngre ng'rek, anaruk wokat aikkoik cinang aeret lon ilie ana occikot.

²² Menik aPoluc urokat kapik nocuththun cAerop-pakoc akwi'rekat itti, "Ul wonoka'ran kAthina mpimmat na'ran won appik itti onon tha'rane kapik ikaik prek nga'rama. ²³ Akka mponyarot icarak coman mpokathac-cekathe a'rupu ianon a'rane anga'rama, ana mpiathe tu'rot ta'rama tokurrakot nan itti, LAINE KAPIK IKOM-MAKO. Kapik ikommako ikanon thaik tha'rane nga'rama anon thomma iken akka mpaik patherenthet non lon len.

²⁴ Kapik ikokkothe capu ncik appik ana a'rupu iaik tit appik, iken Ili worothi'rot ana wonocapu ncik appik ana kannikkoik nonupan noKapik inuntat nyaul ionyi. ²⁵ Ana kannorekakine nyaun nyoul ionyi akka kwannangkot pa-p'rek. Kwethet ul thikkoik thung ana utha ana a'rupu

w'rek appik. ²⁶ Kapik kokkothe ul appik iaik nocapu nopul pulukku othakka itti akin ikkoik nocapu ana kwokkanthet kin ma'ri ana cingki ana onekkenthet kin a'ran nakin thonu itti okin thikkoik.” ²⁷ OPoluc pikkathe cik akwere akwi're itti, “Kapik kokkothe lon elli appik othakka itti apul iponyi okwantothok akiothok, kwannoka ciththan naron. ²⁸ Akka oron thaik iaak nthonyaro thonnon ana thikkoik thonnon. Ana ammakka opilingon nti ianon ithathettot lon cik thi'ret itti, ‘Oron thanyukul nyung.’

²⁹ Ana inakka oron thanyukul nyoKapik oron thonu itti oron thannokwarttikot itti Kapik kungkot thaap ana manna mallong ana manna mothok ana manna purrut ipokkattathe mpu'ran popul iponyi ana nthinaik thopul iponyi. ³⁰ Ma'rot Kapik kellaat kit kolon ilokithak loul anaruk inenni komethe ul appik na'ran appik lon lon-thoththomat itti wapa'rine lon cik lon ilokithak. ³¹ Akka kwonekkethe ca'ri cik ica akwathakkma capu ncik appik okorronno okwiet pul mpul ipa kwonekketheik ana kwokenet ul appik itti pul pen okkwen nthurokwiek nti ithio.”

³² Anakka okin thoccikothe lon lothuroko nti ithio apilingon orakkekat lon len anaruk opilingon thi'rekathe itti, “Onin thongothe itti onin thappoccikot lon lang no'ron elli attang.” ³³ Ncinang aPoluc oththekat no-cuththun. ³⁴ Ana ul wotteik wothakkakathe ul iammakot kin akin occokat lon nomikit loIeccuo. Ana nti iul wen oThiniccioe pul ipokat nti icungkut coul wAeroppakoc ana ipopari ipocot k'ran itti oThamaric ana opilingon th'rek.

18

OPoluc paik noka'ran koKurunthuc

¹ Ittina aPoluc oththekat noka'ran kAthina akwoingkat noka'ran koKurunthuc. ² Kwaththiat pul p'rek than

poccot k'ran itti Akkila ponoul woPiniththic okkwi ipokat purnanthan noththok polththalia okin opari iponat k'ran itti oPricikkila akka ili oKklauthioc oKkaiccer pokat paponekkethe lon cik itti ul wolouth wapa'roik noththok poRoma appik. OPoluc poingkanthet kin akwothokatha kin, ³ ana akka oPoluc pokat pina okkot mü'rük moret akkwarthuk ina oKkila ammakka okin thokkothe, kwikkatheik okin aththungon tuan thanen ana okin thikkatheik akin okkettet mü'rük moret. ⁴ OPoluc pikatheik akwerentene ul nocuththun ca'rama noma'ri maCcepith, kwokat cik akwokwancot kathar ika akwokorronno ul wolouth ana iannoka wolouth angat lon loIec-cuo.

⁵ Anakka oCcila ana oThimiththaoc thaat noththok poMakthonia, aPoluc pokat akwongkene ul wolouth noma'ri mung appik ana erene kin kicce itti oIeccuo ook oMiccie. ⁶ Anaruk akka ul wolouth w'rat lon loPoluc ana ocungkok kwokkwathe tu'rupang nnoracok tung akwi'rekat kin itti, “Lon ilainenon laka nokalak kon p'rin mpella lon ncalak cin p'rin ilokithak. Nciki inenni mpaine ul iannoka wIouth.”

⁷ Ittina aPoluc oththekat nocuththun ca'rama akwoingkat napuththut cinang tuan koThiththoc oIucththoc ipokat pannoka ponoul wolouth ipokat akwa'rane Kapik nga'rama ⁸ Aili wonocuththun ca'rama ionat k'ran itti oKkricppoc occokat lon loIli ook ana ul woruan thanung appik ana ul woppot wonoka'ran koKurunthuc iocckithe lon loPoluc wocckathe lon loKapik ana woccathe mamuthie.

⁹ Ngko'ra ng'rek ali akkakanthet oPoluc ithathantako aki'rekathok itti, “Kirrnni ipo n're, ere kirrnni angkoik. ¹⁰ Akka mpaik naung ana pul pella paccokothung itti pieng ka kongo akka mponu ul woppot waik noka'ran

koKurunthuc.” ¹¹ Ittina aPoluc pikkatheik than thuput ana anak w'rakuruk akwongkenekin lon loKapik.

¹² Anakka oKkalion pothakkat ili noththok poKrik, ul woIouth wa'rntakathe ntaPoluc akin onekathok noka'ran kothonce'ret lon cik. ¹³ Akin i'rekat itti, “Pul empi paik perene ul itti wa'rane Kapik nga'rama ngkathar ikanno-makot lon lothonce'ret lon cik.”

¹⁴ Anakka oPoluc okuccekot cik itti kwi're lon, aili oKkalion i'rekat ul woIouth itti, “Amma onon akkonu lo'rek ilokkattathe lokithak laakat loporot itti mpac-cikinthet non annerenin. ¹⁵ Anaruk inakka lon lotho-llarot no'ran ana nolon lothonce'ret lon cik lon, no'ro lon len ngka kon, mpannakkma lon ammakka elli.”

¹⁶ Ana kwokiccekathekin nti iman mothonce'ret lon cik.

¹⁷ Menik okin oprttakat ia ili wonocuththun ca'rama oCo-caththanic akin okkwekathok tokit koman kothonce'ret lon cik. Anaruk oKkalion pellat kit ken.

Pricikkila ana Akkila ana Apolloc

¹⁸ OPoluc pikkatheik papotteik noka'ran koKurunthuc. Ncinang akwoththekat napangon ilon loKapik akwoingkat noththok poCcuria arrot tok irapangka akin oPricikkila ana oKkila. Ana akka kwarthuk eo, akwokekat ca noka'ran koKangkkaria thokeko thokat thothonekket lon cik ila kwokat ponekketheik. ¹⁹ Okin thakkakathe noka'ran kApuccuc na aPoluc poththet noPricikkila ana Akkila. Akweo nocuththun ca'rama akwotherene ul woIouth. ²⁰ Anakka okin thipittothok itti kwikkoik papotteik akin aththut akw'rakat. ²¹ Anaruk akka kweot, akwonekkekanthet kin lon cik itti, “Mpakkaprttako ntan amma Kapik akkongothe.” Akwoththekat noka'ran kApuccuc akweo noka'ran koKaiccaria ikuppu'rung konoi'ri.

²² Anakka kworpotheik noka'ran koKaiccaria, kwoku'rathe akwothomicco ul iocckothe lon loeccu noka'ran koUruccelim akwantuo noka'ran kAnththakkia.

²³ Anakka kwikkot cik noka'ran kAnththakkia papotteik, kurokathe okkette na'ran woKalaththia ana woPricia akwerene ul iammakothok lon ilothopo'riekin than appik.

²⁴ Ana ca'ri cen pul p'rek poIouth ponat k'ran itti Apolloc ponoka'ran koIcikkantharia ipaat noka'ran kApuccuc, kwokat pina ere lon papenang ana ina lon latham woKapik. ²⁵ Kwokat pongkenettat kathar kolli, ana kwongkenet opilingon ana ere ngkathar koporot koKanang ikupupure lon loKapik antoka manna itti kwinat mamuthie moluanna tulluk. ²⁶ Ana kwikkatheik akwere akkwella n're nocuththun ca'rama. Anakka oPricikila ana oKkila thoccikothe akwere, okin thakkarathok tuan thanen ana okin therekanthok kathar kolon loKapik papenang.

²⁷ Anakka Apolloc pokat pongothe itti kwaeo noththok poKrik aul ioccokothe lon loIeccuo noka'ran kApuccuc okurranthet ul ioccokothe lon loIeccuo noththok poKrik ka'rmacak akin othiat Apolloc ngngin akin ikkiek cik papenang. Anakka kweot tentre lalokat loporot kannan akka kwittarotho ul ioccokothe lon loIeccuo nthoporot thoKapik. ²⁸ Akka kwokat palkothe ul woIouth nthopllarot akwokenekat kin tokit koul appik llon nti iatham ipupure itti oleccuo ook oMiccie.

19

OPoluc paik noka'ran kApuccuc

¹ Anakka Apolloc pokat noka'ran koKurunthuc, aPoluc okkat ikathar ikokkot noththok pAccia akwakkakat noka'ran kApuccuc. Kwaththiat ul ioccokothe lon loIeccuo w'rek ² ana kwipittathekin itti, "Onon thoccot Kanang ikupupure akka onon thoccokothe lon loIeccuoi?"

Akin othiat tit itti "Aa, onin thannocikot manna itti Kanang kaik ikupupure."

³ Menik aPoluc appipittat itti, “Ana mamuthie mia imanon thoccot?”

Akin othiat tit itti, “Onin thoccot mamuthie moLuanna.”

⁴ APoluc i'rekat kin itti, “Mamuthie moLuanna mokat mothopa'rine lon cik ilokithak. Kwi'rekathé ul itti okin thaccokot nomikit lokkwi ipaik pammakittothok ook oIeccuo.” ⁵ Anakka okin thocckithe lon elli akin appik occat mamuthie ngk'ran koIli oIeccuo. ⁶ Manakka oPoluc ponekkethe nyaun nakin aKanang ikupupure o'rat nakin ana okin thikkatheik ere karru ikakin thaththoma ere ana okin thikkathe cik akin ere lon loKapik. ⁷ Ana ul wokat cik attul ana ikken ke'ra iomura.

⁸ OPoluc pi'rikathe nocuththun ca'rama ana kwerekathe than anak w'rapuruk ella n're, kwokat cik akwongkene lon longili ngoKapik akin opllarot othakka itti akin occokot lon loIeccuo nomikit. ⁹ Anaruk opilingon th'rakathe lon lung ana okin thorrekathe lon loKapik ana eret kathar koIeccuo llon ilokithak. Ittina oPoluc poththekathe nakin. Kwonekathé ul iammakot lon loIeccuo ana kwikkatheik akwongkenet kin noppa tothongkene toccot k'ran itti Thiranoc. ¹⁰ Thongkene enthi tho'rungkatheik luput le'ra, othakka itti aul woIouth appik ana ul iannoka woIouth iaik ceneket noththok pAccia occikot lon lolli.

¹¹ Kapik kethet oPoluc pu'ran akwokkat lon ilommath-thik laik pellek anganna. ¹² Menik aul onnekat eret ia oPoluc pocciccoithe annekket noul iongo aittiet kin ngngin ana u'rupa iokithak woththeththekathe noul.

¹³ Ul w'rek woIouth iokat anyalle nomo'rong akicce u'rupa iokithak noul, wokat angantet k'ran koili oIeccuo noul ia u'rupa iokithak wo'rot nan. Okin thokat cik akin i're itti, “Ngk'ran koIeccuo ipa oPoluc paik pangkene lon len, mpi'ret non itti nthappot thapat.” ¹⁴ Nyukul

nye're'rapuruk nyoLickkao ipokat pul iprik poul wonopan toKapik nyokat anyokkettet lon len. ¹⁵ Ana ca'ri c'rek au'rupa iokithak i'rekat kin itti, "Onin thina oIec-cuo ana onin thina oPoluc anaruk onon okkwen ngon." ¹⁶ Ittina apul iponat u'rupa iokithak noka irrat takin mono okkwekat kin mono alkat kin akin opellekat nnoppan munthut ana ninyi ana aüccük ollo noka.

¹⁷ Anakka lon len linakot nan nnul woIouth ana ul iannoka woIouth iokat noka'ran kApuccuc, wipathe n're appik ana okin thothiakanthet k'ran kolli oleccuo cik kannan. ¹⁸ Ul wakkakathe woppot iocckothe lon loIeccuo akin ikkat akin ere lon len ilokithak tokit koul ilakin okkettet. ¹⁹ Aul wolurukut a'rntat natham nen nothurukut akin ok'rekat tokit koul appik akin othangantekat cekerek ica natham ekko inok'rot akin othiat itti cekkot akucci athar arrial we'ra ana alkaire (50,000). ²⁰ Ngkathar engki, lon lolli lappaththakatheik ciththan ana alarttakot nan kannan.

²¹ Anakka lon lokatthathe appik aPoluc urokat akwaeo noka'ran koUruccelim okko noththok poMakthonia ana poKrik akwi'rekat itti, "Ina akka mpaik paeo tentre, mponu itti mpakatha ponoka'ran koRoma cakuruk." ²² Akwothiat ul wung we'ra ittathok, oThimiththac ana Aracththoc noththok poMakthonia akwikkoik apoteik noththok pAccia.

Camutta noka'ran kApuccuc

²³ Ana noca'ri cen ul urokiakat camutta nti ilon lokathar kolli. ²⁴ Ana pul p'rek pokat poccot k'ran itti oThimiththrioc okkwi ipokat akwkkot urrut wottot-teik wonoppan tokapik ikopari Arththamic nnomallong. Arththamic ana opilingon ithokat akin okkot lon elli thiathe akucci woppot. ²⁵ Kwakkarathe ul wung appik iakin thaik ire ngulukku ana ul ionu ngre ngungkot ngen akwi'rekat itti, "Ul iomura, onon thinan itti oron thincet

akucci woppot nnore engi. ²⁶ Ana onon thimmat ana ocikot tat akka oPoluc perenet ul woppot ana opa'riekin ma cik noka'ran cene kApuccuc ana manna noththok pAccia appik akkwi're itti a'rupu ikokkattathe nynyaun wannoka Kapik icat ana oron thanna'rane nga'rama. ²⁷ Amma ul wo'rungkothe nan occikot lon lung, okin theret ngre ngin llon lokithak. Ana cakuruk itti tupan irittik tokapik ikopari Arththamic tellako kit ken. Ana ul iaik wa'rane Arththamic nga'rama inenni na'ran appik wAccia ana nocapu ncik appik warakke Arththamic itti kapik ikrük."

²⁸ Anakka ul iakin oreko woccikothe lon len, akin uakat ka kannan akin ikkat cik akin okkot po're cittan akin i're itti, "Arththamic ponoka'ran kApuccuc prik." ²⁹ Ana papotteik aka'ran urokiekat camutta. Aul ollat taKaioe ana Arcciththrikkoc, aul iokat ammakot oPoluc iokat nomothok poMakthonia aththuththe'ra akin ollat oPoluc ngngin akin onakat kin noka'ran na ul a'rntattakot. ³⁰ APoluc omekat itti kwaeo nocungkut aul iammakot oIeccuo o'ramittathok itti kwanneo. ³¹ Ana manna nili n'rek nonoththok opuruko pungon othianthok thon akin o'ramittathok cakuruk itti kwanneo noka'ran ken.

³² Cungkut coul caccocikkittakathe lon ima opilingon thokat akin okkot po're akin ongante lon prek ana opilingon ongante al'rek. Ul woppot wommat itti okin thaththokkot ngimpen ceneket. ³³ Ul wo'louth wothiathe Alekenthaler tokit koul itti akwere lon ilaik ana kwomekathekin itti okin thangoik akwina akka akworrot nolon. ³⁴ Anaruk akka okin thinarok itti kwoul wo'louth okin thokkatho po're tothun itta'rene itti, "Arththamic ponoka'ran kApuccuc prik."

³⁵ Apul ipakurrine ili woricaracoman angkiekat ul cik akwi'rekat kin itti, "Ul wonoka'ran kApuccuc, ul wonocapu ncik appik womma itti pothok pApuccuc akkaik pangwot tupan tokapik tArththamici? Ana ka'ran akkaik

kangwot purrut pung ipapot ntothi'rori? ³⁶ Ana inakka lon elli ilaik icat lomma ocukkwako nan, onon thonu itti nthingkoik ana okorronno okkot camutta. ³⁷ Onon thonat ul enni cene aure'ra okin thannomunye alp'rek nnoppan tokapik konnon Arththamic ana manna ocungkwok. ³⁸ Ittina amma oThimiththrioc ana ul iakin orekon ithakkot kaman komallong thorukwethe pu'rek lon ilokithak ka'ran kothonce'ret lon cik kei akin omakot kathar kothonce'ret lon cik. ³⁹ Ana amma onon thonu lon l'rek loka lonu itti nili nakotto aneret lon len. ⁴⁰ Oron thikko thakkmako nti icamutta icokkattathe inenni. Ittina oron thamma orrot nolon len akka oron thella lon cik ilakorronno aron okkot camutta.” ⁴¹ Ana kwi'rekathe ul itti waeo ana okin thoi ngkathe nonupan nen.

20

OPoluc paik noththok poMakthonia ana poKrik

¹ Anakka camutta coul comttathe aPoluc akkarat ul iammakot oleccuo, anakka kwerenet kin kicce lon lothopo'riekin than. Kwomekat kin itti, “Mpei paeo,” akwurokat akweo noththok poMakthonia. ² Kwokkathe nocik cen akwerene ul ioccoke the lon lo oleccuo akwopo'riekin than puccuk akwakkakat noththok poKrik ³ na kwikkot cik anak w'rapuruk. Anakka kwokat akwoccekot cik itti kwaeo noththok poCcuria kwocikathe itti ul woIouth wokat wonekethe lon cik itti wakkwothok, ittina kwoprattathe lon cik ana kwopakkathe noththok poMakthonia. ⁴ Ul iokat cik aittarothok wokat oCcupaththroc ukul woParc ponoul woPiria, ana Arcciththrikkoc ana oCcokkonttoc ponoul woThocculunukkia, ana oKaioC ponoul woTherpa, ana oThimiththaoc, ana oThikikkoc ana oThthroppimoc noththok pAccia. ⁵ Aul enni oingkat tokit kin noka'ran koThthruac akin otho'rikat nin than. ⁶ Anaruk akka onin

thocothothe kamuthe karrakith iella mü'rükül tit, onin tharrathe ikuppu'rung konoi'ri anin oingkathe noka'ran koPilippi noththok poMakthonia, ana noma'ri ukuluk inoccat kin cik noka'ran koThthruac na nin thikkot cik ma'ri me're'rapuruk.

OPoluc paththokatha ka'ran koThthruac p'r'in

⁷ Noca'ri cocittokit conoma'ri ime're'rapuruk onin thaath tohun anin atho'rko thu'rit thothokwarttikot oIec-cuo. OPoluc perekanthe ul anaruk kwokat cik ak-waeo ngorrot ngen, kwikkatheik akwere puccuk mono athampang thongk'ra akkakat. ⁸ Mu'ru imaccie thik mokat moppot iman imokat to'ra woman nanin thokat cik anin eret. ⁹ Ukul w'rek ioku'rit ionat k'ran itti Apiththikkoc wokat cik aikkoik icürük coriplak poman ana wikkatheik aththukwot akka oPoluc pokat cik ak-were puccuk. Anakka kweot inthe kannan akwapat nci to'ra woman imokat to'ra wokaman ke'ra mono akwiat. ¹⁰ APoluc uat nto'ra akwonekat ukul wen nokapen ak-wi'rekat itti, "Nokorronno opelle kwannio." ¹¹ Ittina aPoluc opakkat tit to'ra akwa'rakat nga'rama nothu'rit thothokwarttikot oIeccuo akwo'rkkat. Akka kwo'rkot p'r'in, akwerekat puccuk mono acingki uakat akwoingkat. ¹² Ul wonekathe ukul ioku'rit tuan akkwannio ana okin thokat thopirat noka kannan.

OPoluc pere okin oul ittittik woul wonoka'ran kApuccuc

¹³ Onin tharrathe ikuppu'rung koni'ri anin arrat anin oingkat noka'ran kAccuc nanin thokat thathipo oPoluc nthan. Kwokkothe lon elli akka kwokat akweo tentre ntacok. ¹⁴ Anakka kwaththiot nin noka'ran kAccuc onin thipathok ngkuppu'rung konoi'ri innoingkat noka'ran koMiththilini. ¹⁵ Ngorrot ngen onin thurokathe ncining innoingkat ana onin thokkathe nocik coKkaic. Ana ngorrot ngen onin thakkathe noththok poCcamoc ana

ngorrot ngen onin thakkakathe noka'ran koMiliththoc. ¹⁶ OPoluc pi'rekathē itti kwaeo okko noka'ran kApuccuc othakka itti akwokorronnooccoik noththok pAccia akka kwokat akwattakoik akweo noka'ran koUruccelim noca'ri cokamuthe kothokio mil' moLouth.

¹⁷ Anakka oPoluc paat noka'ran koMiliththoc, kwothianthet ul ittittik woul ioccoothe lon loleccuo thon noppān toKapik noka'ran kApuccuc itti okin thainok noka'ran koMiliththoc. ¹⁸ Anakka okin thaat akwi'rekat kin itti, "Onon thina papenang tat akka mpikkot cik itho'rkit thon ma'ri emmi appik unnaththut nci noca'ri cocittokit akka mpaat noththok pAccia. ¹⁹ Mporekinet Ili nci nocikit ana nnggeme ikit ana antoka manna itti mpokat pennekkettat anganna nul woppot woLouth. ²⁰ Ana onon thina itti mpannoce're lon nanon iloporot anaruk mpongkenethenon ncinokkit ana ikaman kon. ²¹ Mpokenet ul woLouth ana ul iannoka woLouth itti okin thonu itti okin thaine Kapik nthoco'ro nti ilon ilokithak akin occokot lon loIli wonnon oleccuo.

²² Ana inenni mpomma lon ilaik lathainin noka'ran koUruccelim anaruk mponu itti mpaccikot lon loKanang ikupupure. ²³ Ila mpina tulluk itti na'ran ia mpokkettet tit appik Kanang ikupupure kokat aki'rilen itti korrrkor ana thoccokiettat thiak thaik thacurot iaun. ²⁴ Anaruk mpella kit kothikkoik thin anaruk amma mpamartto ngre ia Ili oleccuo pethin, ngre itti mpere lon iloporot loleccuo ana thoporot thoKapik.

²⁵ Inenni mpina itti pul pella nti ianon itha ampongenet lon longili ngoKapik pappimman attang. ²⁶ Ilen akka ani'renthe non inenni itti mpella lon lopilin nocalak cin p'rīn. ²⁷ Akka mpongkenet non lon loKapik kicce appik. ²⁸ Noccot kit no'ron loka kon ana noul ia Kanang ikupupure konekkenthet non cik itti onon thakatha lon len. Noka ul iu're ul ioccoothe lon loleccuo

ia kwokerot ngüccük ngung. ²⁹ Mpina itti amma mpeot ul wothongkene ngarra wi'riko ianon ere mipa amma mi'rikot ilicok apettat ul cik ioccoothe lon loIeccuo. ³⁰ Ana manna ul w'rek wuroko nti ianon aere ngarra othakka itti akin opa're ul iammakot oIeccuo ma cik ammakot kin. ³¹ Ittina no'rumoik nokwarttikot akka mpokat anerentenenon luput l'rapuruk nokkonokki ana nokk'rokk'ra ngeme ikit.”

³² APoluc o'rungkat nolon akwi'rekat itti, “Inenni mpethet non Kapik ikkun ana lon lothoporot thung ilapo'rienon than annoine ul iothikkiettatt wupupure woKapik. ³³ Mpannogat mallong imallio ana manna thaap ana manna eret wopilin. ³⁴ Onon thina kicce itti mporekot nynyaun nyin othakka itti aniot akucci anokatha ngka kin anokathakat ul ianiin thaik. ³⁵ Lon ila mpokkothe appik mpongkenet non itti ngre iommaththik ammakka engi oron thonu itti oron thittarat ul iella alp'rek, nokwarikot lon ila oIeccuo pi'ret nthon thung itti. ‘Thethiëko thaka thoppot nothethet ul a'rupu nothocco a'rupu.’”

³⁶ Anakka oPoluc pi'ret lon elli kweekat ungu ncik akin aththut appik akin a'rakat nga'rama. ³⁷ Okin thoathe appik akka okin thokat akin thokat cik akin omiccok i'rikikkarothok toperere. ³⁸ Lon iloiet kin kannan ila kwi'ret itti okin thannappimmak p'rïn. Ittina okin thomakathok nokuppu'rung kono'i'ri.

21

OPoluc paeo noka'ran koUrucelim

¹ Anakka onïn thillakot tit inoul wApuccuc ittittik onïn thoingkathe okko irok irapangka eo noththok poKkoc. Ana ngorrot ngen onïn thoingkathe noththok poRothoc ana nceneket anïn oingkat noka'ran koPaththara. ² Onïn

thatthiat kuppuru'ng konoi'ri ikokat cik akeo noththok poPiniccia okko irok irapangka. ³ Anakka onin thimmat pothok poKupruc inthuathe nca opakot nthokkun wothothari amma akatha na acingki ummot ngngin ana onin thoingkathe noththok poCcuria okko irok irapangka. Onin thoco'rathe noka'ran koCcur na kuppuru'ng konoi'ri korpethe a'rupu cik. ⁴ Onin thoingkathe nokuthut korok irapangka anin ikkat cik innoul iammakot oleccuo ma'ri me're'rapuruk ana ngKanang koKapik ikupupure okin thikkathe cik akin oot oPoluc itti kwakannoku'rot Uruccelim. ⁵ Ana akka ma'ri min momttathe onin thurokathe nokurtti kin. Aul iammakot oleccuo ana oparion ana opeion thattharat nin anin eekat ungku ncik nokuthut korok ina'rakat nga'rama. ⁶ Anakka onin thillakot tit p'rin, onin tharrathe ikuppuru'ng konoi'ri ana okin thopakkathe icarak coman.

⁷ Onin thoingkathe noka'ran koCcur ana onin thoco'rathe noka'ran koPaththolimaic inorpat cik inomiccat ul iocokothe lon loleccuo anin ikkat cik ca'ri culukku. ⁸ Ana ngorrot ngen innoingkat innakkakat noka'ran koKaiccaria innikkat cik tuan toPilippic pul pothongkene lon loleccuo nti iakkwion ithe're'rapuruk ithokat thumuntettat itti okin thikket ul thu'rit. ⁹ Kwonat nyukul nyoco'rin inyari inyannitta inyokat anyerente lon loKapik.

¹⁰ Anakka onin thikkot cik ma'ri moppot apu'rek pothernte lon loKapik akkakat ponat k'ran itti Akapoc puot ntan nnoththok polouthia. ¹¹ Apul pothernte lon loKapik akkakat nanin aponekat ku'rat nti ikin koPoluc akwi'rikikkat ntacok tung ana nyaun ana kwi'rekathe itti, "Kanang ikupupure ki'ret itti, 'Ul woIouth woUruccelim wi'rikikko pul poku'rat engki ana okin thethok ul iannoka woIouth ikkun.'" "

¹² Anakka onin thocckithe lon len onin ana ul tentre thoathe oPoluc kannan itti kwannoku'rot noka'ran koU-

ruccelim. ¹³ Ittina aPoluc othianthet kin tit itti, “Onon thontha akka annoo ana ipien thiak nocikit mpokuc-cekotho cik annoka tulluk itti mpi'rikikkako anaruk itti mpiot noka'ran koUruccelim nolon loleccuo.” ¹⁴ Anakka kw'rat occikot lon lin, lellakathe ilanin okkot ana onin thomekathe tulluk itti, “Alon ila ili wongotho itti lakkattat alokkattat.”

¹⁵ Ana akka elli locothakotho, anin okuccekat cik innoingkat oku'rot Uruccelim. ¹⁶ Ul iammakothok w'rek nnoka'ran koKaiccaria wittarathenin ana wonakathenin tuan toManaccon na thokat thathikkoik. Kwokat ponoththok poKupruc ana pul ipommakotho oleccuo ncinomun.

OPoluc paat noka'ran koUruccelim

¹⁷ Anakka onin thaat Uruccelim, opangkingon ilon loleccuo thikkiekathenin cik papenang. ¹⁸ Ngorrot ngen oPoluc akin oplingon nti ianin thoinkathe akin othokatha oIakup. Ana ul ittittik woul iocckotho lon loleccuo noka'ran koUruccelim wokat cik appik. ¹⁹ OPoluc pomicathekin akwerekanthet kin lon kicce appik ila Kapik kokkinthet ul iannoka wolouth nngre ia kwokkothe.

²⁰ Anakka okin thoccikotho lon elli, akin opirakanthet Kapik noka nolon len. Akin i'rekat oPoluc itti, “Pangkin ngkwimmat tat akka ul wolouth wocckotho lon loleccuo athar woppot ana okin cakuruk thomakathe lon lothonce'ret lon cik loMucca. ²¹ Okin therettanet itti ngkwongkenet ul wolouth iaik nnul iannoka wolouth itti akin ocottako nti ilon iloco'rothe cik loMucca ai'ret kin itti okin thakorronno okekkiyet nyukul nyen ana okorronno omakot lon lothathuma then. ²² Ngintha akka aron okkot? Okin thaccikot aththaman itti ngkwaat, ²³ ittina nokko ilanin i'rethung. Ul waik woco'rin ionekenthet lon cik. ²⁴ Oneki ul enni annokattakot ilon lothonthukko

akkenekin akucci akin okeko. Ittina ul wina itti lon lella ilaik icat ilon ilakin ul waik werethung ngngin anaruk onon cakuruk thaik thammakot lon lothonce'ret lon cik loMucca. ²⁵ Anaruk okkwion ithannoka ul woIouth ithoccokothe lon loIeccuo onin thokurrinet kin itti okin thaco'ro nti itho'rko kapa ka'rupu ionguttanet 'ran ana ngüccük ana kapa ka'rupu iannokeccetta ikalak ana tha'ro nul nuthuk.”

²⁶ Ngorrot ngen oPoluc ipat ul akwothothunthakat okin aththut. Ittina kwoingkathe noppa toKapik akwothokene ma'ri mokamuthe kothonthukko macothakot acin ana ul enni wethet a'rupu wothokiot ngüccük cik.

OPoluc poccokittathe

²⁷ Anakka ma'ri ime're'rapuruk mokat cik amomattat p'rïn, ul w'rek woIouth noththok pAccia wimmakathe oPoluc noppa toKapik. Okin therekekathe ul accokathok, ²⁸ akin i're mpo're cittan itti, “Ul woIccereil, nittarot nin, pul empi pikkaik pangkene ul na'ran appik lon ilokithak naron ana nolon lothonce'ret lon cik loMucca ana noka'ran engki ana cakuruk kwonat ul iannoka woIouth noppa toKapik ana kwokittathe ka'ran engki ikokat kupupure.” ²⁹ (Okin thatthimmat oThthroppimoc ipokat ponoul wApuccuc icarak coman, akin i'rekat itti ikkre oPoluc ponarok noppa toKapik.)

³⁰ Ana ul wurokathe ncik noka'ran appik ana wakkakathe ollo ntan akin a'rntakat na oPoluc akin occokathok akin othathok thapat nnoppa toKapik akin unukkat athat. ³¹ Anakka okin thokat akin okwantot kathar ikakin okkwothok ngngin, lon loingkanthet ili irik woul irro woRoma itti ul woricarak coman coUruccelim appik waik icamutta. ³² Aili irik woul irro ummat nili n'rek inarran noul irro ana ul w'rek irro akin ollat uo thocamutta. Anakka camutta coul cimmat ili irik woul

irro woRoma ana ul wung irro, akin oco'rat okorronno okkwe oPoluc.

³³ Ili irik woul irro wakkakathe accokat oPoluc ai'rekat itti, "Ni'rikikkok nynyol nye'ra." Menik akwipittat itti ook okkwen ana ngimpen akka kwokkothe. ³⁴ Ul wocamutta wikkatheik a'rettakot kurekkurek, anakka ili irik woul irro wanniot lon iloco'rotheik akka camutta coul cokat cik, akwi'rekat itti oPoluc panekittat noka'ran koul irro. ³⁵ Anakka oPoluc okko ci norupet okwoku'rot to'ra, aul arttat nocamutta acothakkakat cittik aul irro onekathok tocalak ntokit kocamutta coul. ³⁶ Aul iokat cik am-makothok ikkat cik a'retto puccuk ame itti, "Nokkwothok nokkwothok."

OPoluc perene cungkut coul

³⁷ Anakka ul irro wokat cik anekot oPoluc ikaman koul irro aPoluc ipittat ili irik woul irro itti, "Mpi'ret non lon l'reki?"

Aili i'rekathok itti, "Ngkwere karru koul woKriki?"

³⁸ Annoka oung pul ponoul woMucciri ipokkothe camutta mono oingkat nul athar woco'rin ithampang ithon-thomari ionat k'ran itti ul iangwo ul ma'rot apotteiki?"

³⁹ APoluc othianthok tit itti, "Oun pul ponoul wolouth ponoka'ran koTharccic noththok poKilikia pothok ipinakat papenang. Korronnon anerene ul."

⁴⁰ Akwokorronnathok aPoluc oco'rat norupet akwon-thanthe ul ukun kapik anakka ul wangkot cik akwerekant-thet kin ngkarru kolpranin.

22

¹ "Pangkingon ana ongapan, nantokkwine lon lothrrot nocalak cin unu ncik." ² Anakka okin thocckithe akwerenekin ngkarru kolpranin ana okin thangkatheik icci.

Ittina aPoluc i'rekat kin itti, ³ "Oun pul ponoul wolouth ana mpokwontathe nonoka'ran koTharccic noththok

poKilikia anaruk mpupokkothe cene noththok empi ana mpongkenettathe ikkun woKamalail mpongkenettat lon lothonce'ret lon cik longappan thonnon papenang ana mpokat pongothe Kapik kannan ammakka onon cene inenni appik. ⁴ Mpocokiethe ul thiak manna ongwo iammakot kathar koIeccuo ana occicokot ul iomura ana iari anonekket ikorrkkor. ⁵ Ana manna cakuruk pul iprik ponoppa toKapik ana nili n'rek nimmat lon ngkit ken. Ana manna mpoincenet kin anonekot kin lon anonekine opangkingon noka'ran koThimacakka ana mpeot tentre anothona ul ianekketat ikorrkkor noka'ran koUruccelim akin othocokiettat thiak.”

⁶ APoluc ikkat cik akwere itti, “Ana icingki ippa akka anokko ciki iccik koThimacakka ak'ran k'rek occat naun ntothi'rot kipuk ippuk. ⁷ Mpapathe nocapu anocikat po're api'rethin itti, ‘Caul, Caul, ngkwontha akka accokietthin thiak?’

⁸ Anipittat itti, ‘Ili, ounge oththa?’

Apo're pen i'rekat itti, ‘Oun oleccuo poNaccir ipa ngkwaik paccokiet thiak.’ ⁹ Ul ianin thokat cik wimmat k'ran ken anaruk okin thannina itti pokkwen ipokat apere-nenin.

¹⁰ Anipittat po're pen itti, ‘Ngintha akka anokkot, Ili win?’

Alli i'rekathin itti, ‘Urokothe kapik ai'riko noka'ran koThimacakka ana ngkwerettane lon appik ilonekkat-tanlung cik itti ngkwakkot.’ ¹¹ Aul ianin thokat cik ipathin nynyaun akin onekathin noka'ran koThimacakka ampi'rimathe akka k'ran kakki'rimathin.

¹² Apul p'rek ipocot k'ran itti Anania akkakat apathokathakat naun, pul ipoporot iponat n're noKapik ana ipo'rumot nolon lothonce'ret lon cik ana pinakot papenang ana ul woIouth wothianok cik appik iaik noththok

pen. ¹³ Kwoco'rathe iccik kin akwi'rekathin itti, 'Pangkin oPoluc, immaik.' Ittina animmakat cik ca'ri cen.

¹⁴ Apul pen i'rekat itti, 'Kapik kongappa ponnon kakkarorong itti ngkwina lon lung ana imma oMiccie ipoporot tokit koKapik ana occikot lon nti ithon thung.

¹⁵ Ngkwerene ul lon lung appik ila ngkwimmat ana occikot. ¹⁶ Ngintha akka ngkwaik pappo'rikot? Urokothe kapik acco mamuthie apa're lon lang cik ilokithak, a'rane Kapik nga'rama.'

¹⁷ APoluc ikkat cik akwere itti, "Anakka mpopakkothe noka'ran koUruccelim ana mpokat ana'ra nga'rama noppan toKapik anathantakat ¹⁸ itti mpimmat alli erenin ai'rekathin itti, 'Oththe noka'ran koUruccelim aththaman akka ul wannocikot lon lang ilerethin.'

¹⁹ Anothiat tit itti, 'Ili, ul enni winanan itti mponyallet nomuththun ma'rama anipot ul ikorrkkor ana okkwekin ithocckothe lon lang. ²⁰ Mpokat cik akka ul wokkwothe oCiththippanuc ipiot nti ilon lang, mpokat cik ani'rilet kin lon ilakin okkot ana oun akkokat cik anangwot eret woul iokat akkwothok.'

²¹ Ittina alli i'rekathin itti, 'Ngo, mpaik pathiothung ciththan noul iannoka woIouth.'

OPoluc pul poul woRoma

²² Ul wocamutta wokkwanthet oPoluc kunu ncik kicce puccuk mono akwi'rekat lon elli menik akin urokiekat po're attang akin okkat po're itti, "Nopa'rek cik nocapu kwanneko nan itti kwakkoik."

²³ Anakka okin thokat cik akin okkot po're ana orre eret wen ana orret tu'rupang ithi'rot thokapik. ²⁴ Aili irik woul irro omekat itti oPoluc panekittattent ul irro akwipittakot lon nthopoko othakka itti akwina itti ul woIouth wontha akka akkot po're naak ittina. ²⁵ Anakka ul irro wothorok ana i'rikikkok itti kwapoko, aPoluc i'rekat

ili woul arrial ukuluk irro iokat aco'ro iccik kung itti
 “Loco'rotheik nanon itti nthakkwe pul ponoul woRoma
 ipannincat itti kwokkothe lon l'rek molokoi?”

²⁶ Anakka ili woul arrial ukuluk irro woccikothe menik
 waththerekanthet ili irik woul irro, aili woul arrial ukuluk
 irro i'rekat ili irik itti, “Ngintha akka ngkwaik pathokkot,
 pul empi poul woRoma.”

²⁷ Aili irik woul irro oingkanthet oPoluc ana wipit-
 tathok itti, “I'rethin oung pul poul woRomai?”

APoluc othiat tit itti, “i.”

²⁸ Aili irik woul irro othianthok itti, “Mponekethe
 akucci woppot anocco ka'rmacak kopul poRoma.”

Ana oPoluc pi'rekathok itti, “Anaruk mpokwontat pul
 poRoma.”

²⁹ Aul ocottakat aththaman iarokat itti waik wathipit-
 tot oPoluc lon, aili irik woul irro ipat n're akka kwaththiot
 itti kwonekkethe pul poul woRoma ikorrkkor.

Tokit kocuththun coul woIouth ittittik

³⁰ Ana ngorrot ngen aili irik woul irro angkat itti
 kwina lon ila ul woIouth worukwenthet oPoluc ngngin
 akwopelikkat oPoluc nti ilo'rak akwakkarat ul ittittik woul
 wonoppan toKapik ana cuththun coul woIouth ittittik
 appik. Akwonakat oPoluc akwoce'rekathok tokit ken.

23

¹ APoluc okathakat cuththun coul woIouth ittittik ak-
 wi'rekat itti, “Pangkingon, mpikkot cik ana okkot ana
 orekine Kapik ncikit culukku manna inenni.” ² Menik
 apul iprik ponoppan toKapik Anania i'rekat ul iokat cik
 aco'ro iccik koPoluc itti okin thakkwokok thon. ³ APoluc
 i'rekathok itti, “Kapik kakkwokung oung ipinnikot lon.
 Ngkwikkoik ere kunthong ikipuk ikimentat kicce. Ngk-
 wikkoik ceneket akkman ammakka lon lothonce'ret lon

cik li'ret ana icci oung ngka kang akorronno omakot lon lothonce'ret lon cik llon elli ila ngkwi'ret itti mpakkutta.”

⁴ Okkwion ithokat akin oco'ro iccik koPoluc thi'rekathe itti, “Oung emprik ngkwacungkwo pul iprik ponoppa toKapiki?”

⁵ APoluc othiat tit itti, “Pangkingon mpappommat itti kwokat pul iprik ponoppa toKapik akka lokurrakot itti, ‘Kirrni eret ili woul won llon ilokithak.”

⁶ OPoluc pappinat itti ul iaik nocuththun coul woLouth wokat mothok me'ra tit, p'rek poul woCathukkin ana p'rek poul woPriccin, akwi'rekat lon mpo're cit-tan noka'ran kocuththun coul woLouth ittittik itti, “Pangkingon, oun poPriccin ukul wopul poPriccin mpaik poco'ro cene tokit konili nothonce'ret lon cik akka mpoc-cokothe lon nocikit itti thuroko nti ithio thaik.” ⁷ Anakka kwi'ret lon elli athopllarot urokat ncik nul woPriccin ana woCathukkin ana ul willakatherit nocuththun mungkut me'ra. ⁸ (Cungkut coul woCathukkin ci're itti thuroko nti ithio thella ana manna u'rupa wothothilettat woKapik wella ana manna a'rupu iella ka, anaruk ul woPriccin wocokothe lon len appik nomikit men.)

⁹ Apo're oku'rat ciki ithi'rot thokapik aul w'rek iangkene lon lothonce'ret lon cik loul woPriccin urokat kapik akin ikkat cik akin a'retto kannan akin i'rekat itti, “Oron thanniot lon ilokithak ila pul empi pokkothe, ngintha akkaik amma u'rupa wothothilettat woKapik ana manna pap'rek ipella ka perenok?” ¹⁰ Aul ikkat cik antere kannan mono aili irik woul irro ipat n're athiat ul wung irro akka okin omotto iaPoluc anakathok nti itho'rkut then mpu'ran anakok ikaman koul irro.

¹¹ Ana ngko'ra ngen alli oco'rot iccik koPoluc ak-i'rekathok itti, “Opo'rithan ammakka ngkwerenet ul lon

lin noka'ran koUruccelim menik ngkwonu itti ngkweret noka'ran koRoma cakuruk.”

Camutta cothokkwot oPoluc

¹² Ngorrot ngen ul wolouth wi'rikathe lon len tothun akin okkwat mio itti okin thanno'rkoik ana ikko alp'rek aththik akin okkwot oPoluc kappak. ¹³ Ul iokat wokkothe lon len wokat woppot nomaun arrial we'ra (40). ¹⁴ Okin thoiŋkanthet ul ittittik woul wonoppaŋ toKapik ana ul ittittik woul akin i'rekat itti, “Onin thi'rikot lon ana okkwo mio itti onin thanno'rkoik puccuk inokkwat oPoluc. ¹⁵ Onon ana cuththun coul wolouth ittittik nthonu itti nthi'ret ili irik woul irro akwakkarot oPoluc nocuththun attang othakka itti annipittothok lon. Onin thokuccekotheik, onin thakkwothok akkwarthuk anthan cene.”

¹⁶ Anaruk akka ukul wopang poPoluc ipopari woc-cikothe lon len woingkathe ikaman koul irro athi'rekat oPoluc. ¹⁷ Menik aPoluc akkarat ili w'rek woul irro akwi'rekathok itti, “Oneki ukul enni anekine ili irik woul irro, konu lon lakwi'rethok.” ¹⁸ Ittina wonekanthet ili ukul aili i'rekat ili irik itti, “oPoluc ipaik ikorrkkor pothiothin nukul enni iocura itti mpananung akka wonu lon l'rek lakwi'rethung.”

¹⁹ Aili irik woul irro occokat ukun wokkul athathok thocipit apittathok itti, “Ngintha akka ngkwonu itti ngk-wi'rethin.”

²⁰ Aukul i'rekat itti, “Ul wolouth wi'rikot lon itti okin thipittothung itti ngkwananekin oPoluc ngorrot tokit kocuththun coul wolouth ittittik akin appipittothok lon papenang. ²¹ Anaruk kirrnni occikintheŋ kin itti ngkwananekin oPoluc nocuththun akka ul woppot manna wekko arrial we'ra waik warukwinthok. Okin thokkwot mio itti okin thanno'rkoik ana okorronno ikko ng'ri akin tharthuk okkwothok. Okin thokuccekotheik ana okin thaik tha'rikot thothiŋot thang tit tulluk.”

²² Aili irik woul irro elikkat ukul aeo ai'rekathok tulluk itti, "Kirrnni i'ret opilin itti ngkwerenin."

OPoluc pothilathe noka'ran koKaiccaria

²³ Aili irik woul irro akkarat ul irro we'ra ittarothok akwomekat kin itti, "Nokuccet ul irro cik arrial ukuluk ma'ri me'ra (200) aeo kicce ngko'ra amma cingki cokkothe ukullaco'rin noka'ran koKaiccaria, ana ul irro cakuruk mapprrththa arrial w'rapuruk ana alkaire (70) iarrothe mapprrththa, ana ul arrial ukuluk ma'ri me'ra iokuccettatheik (200) nathuk. ²⁴ Nokuccenthet oPoluc mapprrththa cik imaneko kin akweo poporot akwonekit-tane ili irik oPpelek."

²⁵ Akwokurranthet ili irik ka'ramacac ittina,

²⁶ Lon elli naun oKklauthioc koLicciac,

Laine ili irik oPpelek:

Mpamiccong.

²⁷ Pul empi pokat poccokittathe nul woIouth ana okin thokat cik thakkwothok, anaruk mponakathe ul irro win ana mpo'rekathok, ana mpatththiot itti ook ponoul woRoma. ²⁸ Ana mpangkathe itti mpina lon ilakin orukwethok ngngin ana mponakathok tokit koththun coul woIouth ittittik. ²⁹ Ana mpatththiot itti lon ilakin thaik tharukwethok ngngin lothonce'ret lon cik ana lella ilakin orukwethok ngngin ilekko nan itti kwakkuttat ana manna lella ila kwonekkettat ikorrkkor ngngin. ³⁰ Ana manna mpoccikothe itti okin thonekkethe lon cik itti okin thongothe itti okin thakkwothok ana mpothinthung ngok aththaman ana mpi'rethe ul iaik warukwethok akin ainung akin onanung lon lung ilakin orukwethok ngngin.

³¹ Ittina aul irro occikat lon loili irik woul irro akin onekat oPoluc ngko'ra akin oingkat noka'ran kAnththipaththric. ³² Ana ngorrot ngen aul irro opakkat tuan ana ul irro iaurrothe ipat oPoluc akin oingkat noka'ran koKkaicceria. ³³ Anakka maat noka'ran koKaiccaria akin ekat oPoluc ili oPpelek ana ka'ramacak ika ili wothiothe kin ngngin. ³⁴ Aili akkakkarat ika'ramacak akwipittat oPoluc itti, “Ngkwo noththok piatha?” Ana oPoluc pothianthok tit itti, “Mponoththok poKilikkia.” ³⁵ Ai'rekat oPoluc itti, “Mpaccikot lon lang amma ul iorukwethung waat.” Akwi'rekat ul irro itti okin thangwot oPoluc tuan toili irik oIruthuc ikorrkkor.

24

Thorukwiattat thoPoluc

¹ Anakka ma'ri meot ncik ukuluk, apul iprik ponopan toKapik Anania ana ul ittittik woul woIouth uat noka'ran koKaiccaria ana pul iporrot noul lothonce'ret lon cik oTherththolec akin onakat ili oPpelek lon ilakin thorukethe oPoluc ngngin. ² Anakka oPoluc pakkarakothe tokit koPpelek, pul iporrot noul oTherththolec pikkatheik akworukwet oPoluc llon akwi'ret ili oPpelek itti, “Ili oPpelek, onin thopirat noka nongili ngang ia ngwethet nin inikkoik thoporot ana ngkwothikkiet lon loporot ilokat moloko noththok ponnon. ³ Ana onin thopiranung noka nolon len ila ngkwokkothe noththok appik. ⁴ Anaruk mpannangkot itti mperenung lon loppot anaruk mpipit-tohung itti ngkwaccokot cikit accikinthe t nin lon lin noma'ri emmi motte.

⁵ Onin thiothe pul empi ponu thukungkun, apereket ul iul woIouth nocapu ncik appik. Ook ca cocungkut icocot k'ran itti ‘Ul iammakot pul poNaccir.’ ⁶ Ana cakuruk kwokat pathikkie tupan toKapik irupupure tokithak ana onin thocokathok. ⁷ Anaruk ili woul irro iocot k'ran itti

oLicciac wonekathe nïn ngok nti ikkun mpu'ran. ⁸ Ana amma ngkwipittothok ana ngkwathiot itti lon lïn laik icat ilanïn thorukwethok ngngin.” ⁹ Aul woIouth angkat lon loTharththeloc akin omekat itti laik icat.

¹⁰ Anakka ili oPpelek wi'rethe oPoluc itti kwere, kwi'rekathe itti, “Mpina itti oung akkaik pakkma ul enni, ana ittina mpongothe mprrot noka kin. ¹¹ Ana ngkwina akka aiot lon ngka kang, mponu inenni ma'ri attul ana ikken ke'ra ammakka mpokat poku'rothe tentre noka'ran koUruccelim ampaththa'rane Kapik nga'rama. ¹² Ul iorukwethin llon wanniothin ana'retto iul w'rek noppa toKapik ana manna nocuththun ca'rama ana manna noka'ran k'rek icarak coman. ¹³ Ana okin thella lon cik ilakin okeneng ilakin thaik tharukwethin ngngin inenni. ¹⁴ Anaruk laik icat itti mpa'rane Kapik kongapan thonnon nga'rama ammakka pul ipaik pammakot kathar kolon loIeccuo ikakin thaik thi're itti karra. Mpaik paccot kit nolon appik ilangkothe lon lothonce'ret lon cik loMucca ana ilokurrakot inatham noul wothernte lon loKapik, ¹⁵ ana mponu tho'rikot cik then itti thuroko nti ithio thakaik thoul iupupure ana iokithak. ¹⁶ Ana itti mpaik pakwantot kathar ika anopo'rathan ngngnin ano'rungkot pupure nouce tokit koKapik ana tokit koul.”

¹⁷ OPoluc po'rungskathe nolon akwikkat cik akwi're itti, “Mponu luput loppot ampella noka'ran koUruccelim, ana mpaat ponanet ul win a'rupu akin ikket ul iella a'rupu cik ana cakuruk anathethet Kapik a'rupu wothokiot ngüc-cük cik. ¹⁸ Ana ul woIouth waththiothin ampocothe thonthukkako ampaik itha'rapak thonoppa toKapik. Ul wellat ianïn thokat cik onïn aththut ana mpellat icungkut c'rek cocamutta. ¹⁹ Anaruk ul w'rek waik nnoul wolouth nnoththok pAccia, okin ithonu itti nthanthan tokit kang akin erenung ilakin thorukethin ngngin amma laik. ²⁰ Ana manna okkwion ithaik cene thira there lon ilokithak

ilakin thiothin ngngin akka mpoco'rot tokit kocuththun coul woIouth ittittik cene. ²¹ Katha lon lulluk elli ilulukku ila mperethe tokit ken ilanon thaik tharukwethin inenni ana ilen itti akka mpocckothe lon nocikit itti ul wuroko nti ithio.”

²² Ana oPpelek pappinat kicce lon loul iakkarako itti kathar koIeccuo akwoco'rat tokit koul imakma akwi'rekat itti, “Amma ili irik woul irro waat ioccot k'ran itti oLicciac ana mpakatha itti mpakkothung tat.”

²³ Akwi'rekat ili w'rek woul arrial ukuluk irro itti wang-wot oPoluc anaruk akwokorronno akwoppot thapat ana opakot noppa pelék ana okorronno oce're opurukon akin okatha naak ana manna okkinthok lon ila kwon-gothe.

²⁴ Ana noma'ri motteik aPpelek akkakat akin opari oThruccila ana opari pappokat poul woIouth. APpelek akkarat oPoluc occikat lon lung lothocokot lon loIeccuo oMiccie nocikit. ²⁵ Anakka oPoluc pokat cik akweret thoporot tokit koKapik, ana thocokot ka ana thakkma ithaik thanthan, aPpelek ipat n're akwi'rekat itti, “Lekkot, ngko. Amma oun akkaththiot lon laik ana mpakkarong.”

²⁶ Ana oPpelek pokat ponat lon ica itti oPoluc pethok akucci wotte ana kwikkatheik akwakkakkaro appinappin akwerntenok.

²⁷ Anakka luput leot ncik le'ra, aili oPorkkioc oPoc-ththoc opakkat noili noka'ran koPpelek anaruk akka oPpelek pappongothe itti kwapirie ul woIouth noka akwoththekanthet kin naPoluc ikorrkor.

25

OPoluc pipittot oKkaiccer lon

¹ Akka oPocththoc paat noththok poIouthia othakka itti akwathothakka ili, kwikkatheik ma'ri m'rapuruk

noka'ran koKaiccaria akwantoku'rot noka'ran koUruccelim ² na ul ittittik woul wonoppa toKapik ana ul ittittik woIouth werenthok lon ilakin thokat akin orukwet oPoluc ngngin. ³ Akin uekat ili oPocththoc akin ipittathok itti kwathinthet kin oPoluc nta noka'ran koKaicceria akin othiothok Uruccelim. Anaruk okin thonat lon ica itti okin tharukinthok akin okkwothok nokathar. ⁴ APocththoc othianthet kin tit itti, “OPoluc pikkoik ikorrkkor tentre noka'ran koKaiccaria anaruk mpaik papakkot than noma'ri emmi. ⁵ Anili non n'rek anthan ineo aththut anothere amma pul pen akkokkothe lon lokithak.”

⁶ Anakka kwikkot cik tentre akin aththut ma'ri attul akuat opakot noka'ran koKaiccaria ana ngorrot ngen akwothikkat noka'ran kolon lothonce'ret lon cik akwothiat lon itti okin thakkaru oPoluc. ⁷ Anakka oPoluc paat aul woIouth iaat noka'ran koUruccelim a'rntakat naak akin orukwekathok llon loppot lokitheththak anaruk okin thommakathe okene itti lon len lokat cik tat.

⁸ APoluc urokat akworrot noka kung akwi'rekat itti, “Mpannokot lon ilokithak noppa toKapik ana nolon lothonce'ret lon cik loul woIouth ana naKkaiccer.”

⁹ OPocththoc pangkathe itti kwapirie ul woIouth noka akwipittat oPoluc lon itti, “Ngkwongotho itti ngkwaku'rot Uruccelim aul woIouth othonce'renthung lon cik elli tentrei?”

¹⁰ APoluc othiat tit itti, “Mpaik paco'ro noka'ran kothakkma koKkaiccer na lon lin lonu itti lace'rettat cik. Ngkwina papenang itti lon lella ilokithak ila mpokkinthet ul woIouth. ¹¹ Ana amma okin thonat lon itti mpokkothe lon ilokithak icat manna ilekkot nan itti mpio ana mpakorronno opellene thio. Ana amma ilakin orukwethin ngngin lakorronno oka icat, pul pella ponu lon itti pethin kin ikkun. Mparinthet oKkaiccer lon lin othakka itti akwocikot lon lin.”

¹² APocththoc eretteranthes okin oul ittarothok ire akin i'rekathok itti, "Ngkwipittot itti ngkwongothe itti ngkwaine Kkaiccer, ngkwanekestane oKkaiccer."

OPoluc perene Ili Akrippac ana oPernic

¹³ Anakka ma'ri meot ncik motteik aili irik Akrippac ana pul ipopari oPernic akkatat noka'ran koKaiccaria akin omicco oPocththoc. ¹⁴ Anakka okin thokat akin ikkoik than ma'ri motteik oPocththoc perekanthok lon loPoluc ipaik ikorrkkor akwi'rekathok itti, "Pu'rek paik cene paPpelek pampoththet nan ikorrkkor. ¹⁵ Anakka mpeot Uruccelim aul ittittik woul wonoppa toKapik ana ul ittittik woul woLouth werekanthin lon lopul empi ana okin thorukwethok ana okin thi'rekathin itti konu itti kwakmakō.

¹⁶ Ana mpi'rekathekin itti lon ilaik noul woRoma lonu itti pul pannokkuttat nuthuk amma pannorukwettat llon l'rek ana okin okorronnok akworrot noka kung. ¹⁷ Anakka okin thaat cene mpikkathe cik noka'ran kolon lothoce'ret lon cik accokkot mpakorronnooccoik aththik ana mpakkarathe pul pen ngorrot ngen. ¹⁸ Ana ul iorukwethok llon werekathē lon len, ana lellakathe ilekkot nothorukettot ithakin thorukethok ngngin itha mpokat anoccot kit nan itti okin tharukwethok ngngin. ¹⁹ Anaruk okin thonat lon lothocokot lon nomikit loKapik akin opparat ngngin lopul iponu k'ran itti oleccuo ipiot ana oPoluc pokat akwome itti kwiot anaruk kwaik ngkit thapat pannio. ²⁰ Ana mpommat itti mpipitto lon elli tat, itina mpipittathe oPoluc amma kwongothe itti kwoku'rot Uruccelim akin appotheret lon lothorukwettat thung than. ²¹ Anaruk akka oPoluc pothinthet ili irik oKkaiccer lon lung itti kwakathanok lon elli, mpi'rekathok itti kwikkoik puccuk anothianthok oKkaiccer."

²² Alli oKrippac i'rekat oPocththoc itti, “Mpongothe itti mpaccikot lon lopul empi.”

APocththoc i'rekathok itti, “Ngkwaccikothok ngorrot.”

OPoluc perene Ili Akrippac

²³ Ana ngorrot ngen alli Akrippac okin oPernic okkat kamuthe kittik noppa tocuththun nul ittittik woul irro, ana wikkoik aul okkwet kin itho'rküt ittittik noka'ran koKaiccacia ana nili noul irro aili oPocththoc othiat ul akkarat oPoluc akin onakathok. ²⁴ OPocththoc i'rekat itti, “Ili Akrippac ana ul iaik cene appik, pul empi cene paul woIouth noka'ran koUruccelim ana noka'ran koKaiccacia cene wi'ret mpo're citta itti ponu itti pakkutat. ²⁵ Mpaththiot itti kwannokkot lon l'rek lokithak ilakorronno itti kwakkuttat anaruk inakka kwothinthet ili oKkaiccer noka'ran koRoma itti kwakathanok lon ana ilen akka mpi'renet itti mpathiothok noka'ran koRoma. ²⁶ Anaruk mpella lon ila anokurrine ili oKkaiccer ileret lon loPoluc. Ilen akka mponarok cene tokit kon appik ana kannan tokit kang Ili Akrippac othakka itti aniot lon l'rek ila anokurro. ²⁷ Akka lakannoka loporot naun itti mpathiot pul ipaik ikorrkor appella lon ilorukwettathok ngngin.”

26

OPoluc porrot noka kung tokit kAkrippac

¹ Ittina Akrippac i'rekat oPoluc itti “Ngkwonu itti ngkwere arrot noka kang.”

Ittina aPoluc onthat ukun kapik akwikkat cik akwere akrrot noka kung akwi'rekat itti, ² “Ili Akrippac, mpakatha ka kin ere mponu prran akka mpaik paco'ro tokit kang inenni ampaik anrrot noka kin nothorukwet appik itha ul woIouth worukwethin ngngin, ³ ana manna kannan akka ngkwina thathuma thoul woIouth ana thopllarot

llon ithakin thaik thapllarot. Ittina mpipittohung itti ngkwakkwinin kunu ncik okorronno attakoik.

⁴ Ul woIouth appik wina kathar kothikkoik thin ammakka mpotteik, nci ammakka mpurokot ncik noka'ran kin na ampupokkothe ana cakuruk noka'ran koUruccelim. ⁵ Okin thinan nci ma'rot ana manna okin ngka ken there lon ilakin thimmat ana occikot lin, amma okin akkongothe, laik itti okin thina itti mpokat pul poPriccin icungkut icokat commaththik nomungkut imokat cik. ⁶ Ana inenni mporukwettathe akka mpaik pa'rikot lon ila Kapik konekkenthet ongappan cik. ⁷ Ana thonekket lon cik enthi ithen akka mothok moul woIccereil iattul ana ikken ke'ra maik ma'rikot itti lon len lathakka akin thaik akin a'rane Kapik nga'rama ngko'ra ana icingki. Ili win, tho'rikot cik akkokorronnot ul woIouth arukwethin. ⁸ Onon ithaik cene, nthontha akka nth'rat onekket lon nocikit itti Kapik kurokie ul illet?

⁹ Oun cakuruk pokat anokwarttikot itti mpakkot lon ncik appik an'ra oIeccuo ponoka'ran koNaccir. ¹⁰ Ana ilen accok akka mpokkothe noka'ran koUruccelim. Ana llon ikkun nnoul ittittik woul wonoppa toKapik, mpipothe ul woKapik woppot ikorrkkor itti okin ithokat thakkmakot thangutta ana mpangkothe lon len itti okin thangutta. ¹¹ Mponyarot ma'ri moppot nomuththun ma'rama anociccokot kin anothakkma kin ana onentet kin than akin ocungko oIeccuo. Mpokat pua ka ken manna anikkat cik anomakot kin ci na'ran woul w'rek woka anothokkiet kin thiak."

¹² APoluc ikkat cik akwerenekin itti, "Ana nokurtti k'rek, ampokat cik aneo noka'ran koThimacakka amponu ka'rmacak nnonili ikkun ana koul ittittik woul wonoppa toKapik. ¹³ Ana cik cokat acingki angko ippa, ili win, ana mpokat cik nokathar animmakat k'ran akkaat ntothi'rot kipuk ippuk nocingki akoccat naun ana noul ianin thokat

cik aththut. ¹⁴ Onin thapukkwathe nocapu appik ana mpocckithe apo're erenin ngkarru kolpranin api're itti, 'Caul, Caul ngkwontha akka accokiethin thiak? Lokithak itti ngkworro iaun.'

¹⁵ Ittina anipittat itti, 'Ili, oung oththa?'

Apothiat tit itti, 'Oun oIeccuo ipaccokiet thiak. ¹⁶ Uroki aco'rot kapik mpumminthung ncik itti anothikkieng pul iparekinin ana pul ipathere lon lin ammakka ngkwimmat ana ila anokeneng. ¹⁷ Mpa'rethung nti inyaun nyoul wang ana nyoul iannoka wolouth. Mpaik pathiothung nakin ¹⁸ anyinhet kin kit ana aukkwot kin nti i'rimak anakin nok'ran ana nti ikkun wopul pothopulut anakin ikkun woKapik itti alon len ilokithak occikakot ana akin iot ka'ran itho'rkut thokkwion ithothakkat thupupure nthocokot lon lin nomikit men.' "

¹⁹ APoluc ikkat cik akwerenekin akwi're itti, "Ili Akrippac, mpokat pann'ra lon len ilaat ntothi'rot. ²⁰ Mpongkenet ul woThimacakka cittokit anantongkene ul noka'ran koUrucelim ana noththok polouthia, ana ul iakonnoka wolouth appik anomet kin itti okin tha-pa'rine lon ilokithak cik akin okkaprttakine Kapik ana okkot ngre iakene itti okin thoco'rot nti ilon ilokithak. ²¹ Ilen akka ul wolouth wo'ruminthin noppa toKapik itti okin thakkwothin. ²² Anaruk Kapik kittarothin manna inenni, ana mpaik paco'ro anerene okin itharran ana ul iocokkat cakuruk. Mpaik pere lon ila oMucca peret ana ul wothernte lon loKapik theret itti lathokaik, ²³ itti oMiccie paccokot thiak ana kwaka pul ipuroko cittokit nti iul iilet ana kwangkene ul wolouth ana ul iannoka wolouth appik kathar kotho'rettat."

²⁴ Anakka oPoluc pi'ret elli, aPoctthoc i'rekat lon mpo're citta itti, "Poluc, ngkwonu purrut thakkakkaru thang thaik thikittinung ngath're ngang."

²⁵ APoluc othianthok tit itti, “Ili oPochthhoc, lon ila mpaik pere laik icat ana laik ipangken. ²⁶ Akka Ili Akrippac ia mpaik perene ella n're wina lon elli appik ana mpina itti lo'rek lella ila kwomma akka lon len lannokkattat imakkren nthu'ran. ²⁷ Ili Akrippac, ngkwocokothe lon loul wothernte lon loKapiki? Mpina itti ngkwocokothe lon len.”

²⁸ Akrippac i'rekat oPoluc itti, “Ngkwapri itti ngkwathikkien pul ipocokothe lon loMiccie accokkot ittinai?”

²⁹ APoluc othiat tit itti, “Amma accokkot ana manna okorronno oka accokkot mpongothe itti kannothikkieng prek anaruk ul appik iaik waccikot lon lin itti athakka ammakka oun llon ila mpaik tit anaruk annoka ilo'rak ila mpaik tit.”

³⁰ Alli Akrippac ana oPochthhoc ana pul ipopari oPernic urokat ana ul iokat cik aikkoik akin aththungon mono aingkat. ³¹ Akin erettaranthet akka okin thokat cik akin eo akin i'rekat itti, “Pul empi pannokkot lon l'rek ilokithak ilakorronnok itti kwakkuttat ana onekkettat ikorrkkor.”

³² Akrippac i'rekat oPochthhoc itti, “Pul empi pokat ponu itti pelikkako amma pokat pannohtinthet ili oKkaiccer lon lung.”

27

OPoluc paeo noka'ran koRoma

¹ Anakka lon li'rrikakot itti onin thaeo noththok polththalia, oPoluc ana ul w'rek iokat ikorrkkor wet-takathe ili woul irro ionat k'ran itti oIulioc okkwi iponat lon ikkun loul irro arrial ukuluk (100) ionat k'ran itti 'ul irro woKkaiccer.¹ ² Onin tharrathe kuppuru'ng konoi'ri konoka'ran kAthramith anin eo arrot nokuthut korok irapangka ikaik noththok pAccia. Ana onin thokuccekatheik itti onin thaeo thorok irapangka. Ana Arcciththrikkoc

pokat poul wonoththok poMakthonia noka'ran koThocculunukkia pokat innaththut.

³ Ana ngorrot ngen onin thakkakathe noka'ran koCithon ana ili oJulioc wokat woporot naPoluc akwokorronnat oPoluc akwoine opurukon akin ittarothok na'rupu ia kwongothe. ⁴ Ncinang onin thapproingkat attang thorok irapangka okko iccik kocik iconthomat corirok irapangka coKupruc akka kanang kokat kommakethenin. ⁵ Anakka onin thokkot noththok poKilikkia ana poMipilia onin thorpatheik nokuthut korok irapangka toka'ran koMira irokat noththok poLikkia. ⁶ Aili woul irro iat ngkuppurung koni'ri ikat nnoka'ran koIcikkantharia akeo noththok poIththalia ana kwarriekathenin tit.

⁷ Kuppurung koni'ri koingkathenin ngngin kiccekicce ma'ri moppot akka kanang kokat kommakethenin mono anin akkakat noka'ran koKinithic. Anakka kanang kokat kommakethenin itti onin thaeo, onin thokkathae iccik kocarkan corok irapangka toCalmon nocik iconthomat corirok irapangka coKkrit na kanang kokat kotte. ⁸ Onin thoiengkathae omakat carkan coKkrit mpu'ran kiththik mono anin akkakat noka'ran ikoporot na uppurung wono'ri nakin oco'rittako iccik koka'ran koLiccaia.

⁹ Ma'ri moingkathe moppot ana thonyaro thin noi'ri thokat thommatthik ana kamuthe koThoccikarnthet lon ilokithak kokat keot ncik. Ittina oPoluc perekanthet kin lon len itti, ¹⁰ "Ul, mpaik pakathe ere kurtti konnon kaik kathothakka kommatthik, kikko kieron ka kongo ana kuppurung konnon konoi'ri kurat cik ana a'rupu iaik tit appik ana manna ka konnon cakuruk." ¹¹ Anaruk ili woul arrial ukuluk irro w'rakathe occikot lon loPoluc accikot lon lopul ipallillie kuppurung konoi'ri ana pul iponu kuppurung konoi'ri. ¹² Ana akka ka'ran na kuppurung konoi'ri koko'rot kokat kannoka koporot itti ul wikkoik

nan icpo, ul wi'rekathe appik itti, “Ntrun oththe noka'ran engki aron eo noka'ran koPinic aron othikkoik than icpo.” Ka'ran koPinic kokat nocarkan noththok poKkrit ikakatha tok irapangka iraik na cingki orungko. Ka'ran ken kokat koporot auppung wonoi'ri ikkoik than icpo.

Kanang kokapik norok irapangka

¹³ Anakka kanang kopappat kaat nthokkun wothothari amma akatha na acingki ummot ngngin, okin thomekathe itti lathakkanet kin loporot p'rin itti okin thaeo. Ittina okin thonthathe paponte ipakin ipakorronno kuppung akoco'ro i'ri akin oingkat omakot carkan conoththok poKkrit. ¹⁴ Anaruk papotteik akanang akkakat komaththik na acingki ummot ngngin nocik iconthomat coritho'rikit thorok irapangka akokkurat kin. ¹⁵ Kanang koce'rekathe kuppung konoi'ri ana kommakathe eo na anin thokat thongothe itti onin thaeo, ittina onin thokorronnathe kanang akipo kuppung na kokat cik akeo. ¹⁶ Anakka onin thokkot nocik iconthomat coritho'rikit thorok irapangka icocot k'ran itti Kautha, onin thothathe kuppung konoi'ri ikotte ika anin thokat anin othutho thoceken cokuppung ikrik mpu'ran inonthat ikuppung koni'ri ikrik. ¹⁷ Okin thokkiekathe lo'rak thoceken cokuppung akin ir'rikarot tothun. Okin thonat n're akka kanang othiot kin nocarkan coLipia akin i'rakat ithamur. Ittina okin thorpekathe paponte icu're cokuppung irok othakka akuppung ollo kiccekicce ngkanang akin okorronat kuppung konoi'ri akanang itte. ¹⁸ Kanang ka'rungkwothe menik puccuk, ana ngorrot ngen okin thikkatheik akin orrekat a'rupu ia ikuppung kokat akonneko irok irapangka. ¹⁹ Ana noma'ri im'rapuruk okin thorrekathe a'rupu wokuppung w'rek nnyaun nyen. ²⁰ Manakka onin thikkot cik ma'ri moppot

aniin thannimma cingki ana mothot, ana kanang kokat cik akokkurarot kannan, amikit min ellakat ikarak p'rin aniin ellakat lon lolon itti onin thaik thakkoik.

²¹ Anakka ul wikkot cik ma'ri moppot nti aPoluc urokat kapik akwi'rekat kin itti, "Ul onon thira thaaccikothe lon lin annokorronno uroko noththok poKkrit ana onon thokorronno okittot a'rupu enni. ²² Anaruk mperenenon itti thakorronno ipo n're akka pul pella nti ianon puret ka kung cik anaruk kuppuru'ng konoi'ri kuluk akkakittako. ²³ Maman ngko'ra u'rupa wothothietat woKapik kin ika mpaik parekine woco'rot iccik kin, ²⁴ ai'rekat itti, 'Poluc, kirnni opelle ngkwonu itti ngkwaka tokit koili oKkaicer noka'ran kothonce'ret lon cik ana Kapik kethet non thikkoik appik oung ana ul ianon thaik theo anaththut appik nothoporot thung.' ²⁵ Ittina nokorronno irro mikit nti ikarak akka mpoccoke the lon nocikit loKapik itti lakaik ammakka kwi'rethin. ²⁶ Anaruk oron thee ka ncik nocik iconthomat coritho'rikit thorok irapangka aron i'rakat."

Kuppu'run'g konoi'ri kikikkot ng'ri

²⁷ Anakka ma'ri mothakkat attul ana ikken koco'rin (14), onin thokat ii'ri norok irapangka tAthria irokat itho'rikit tonoththok poKrik ana poIththalia. Ana thampang thongk'ra aul iallillie kuppu'run'g konoi'ri okathakat ere onin thakko napuththut nocarkan corirok. ²⁸ Akin onekat tho'rak thakin thi'rikothe paponte nan akin enneke thokwit thorok irapangka akin iat thukwit thekkot u'ricil arrial w'rakkuruk (120) uo tho'ronthong. Ana papotteik akin appennekkekat akin iat thukwit thothakkat u'ricil arrial woco'rin ana alkaire (90) uo tho'ronthong. ²⁹ Ana okin thipathe n're akka kuppu'run'g konoi'ri ee ka mu'rol i'ri ana nthoeken cokuppu'run'g konoi'ri akin orpekat paponte ipace're kuppu'run'g irok woco'rin akin

a'rakanthet Kapik nga'rama itti acingki ua. ³⁰ Aul iallilie kuppuru'ng konoi'ri i'rekat itti wura akin orpekat kuppuru'ng konoi'ri ikotte ii'ri akin innikot itti okin thathorpet a'rponde cik iace're kuppuru'ng konoi'ri irok irapangka ikrík ntokít. ³¹ Anaruk oPoluc pi'rekathe ili woul arrial ukuluk irro ana ul iallillie kuppuru'ng itti, "Amma ul iallillie kuppuru'ng konoi'ri wella ikuppuru'ng cene ana oron thanno'rettat." ³² Menik aul irro ommothat lo'rak ilocokothe kuppuru'ng konoi'ri ikotte cik akin okorrónnat akapat ii'ri.

³³ Anakka cik cokat carthuk okatto oPoluc pi'rekathe ul itti wa'rkoik akwi'rekat itti, "Noma'ri attul ana ikken koco'rin onon thokat thellat mikít ikarak ana ntho'rungkathe ntí, nthanno'rkkat p'rek aththik. ³⁴ Ineni mpi'ret non itti ngonon o'rko thu'rit thotte. Nthonu itti nthar'ko annokkoik. Pul pella pio ka kongo aththik." ³⁵ Anakka kwerenet kin lon elli kwonekathé arrakith akwa'rakanthet Kapik nga'rama tokít ken akwomithat tit akwikkat cik akwo'rko a'rek. ³⁶ Okin appik thopo'rietkathe than akin o'rkkat thu'rit ngka ken. ³⁷ Onin ithokat ikuppuru'ng konoi'ri maun arrial ukuluk ma'ri me'ra ana ikken arrial w'rapuruk ana alkaire ana ikken k'rakkuruk (276). ³⁸ Anakka okin tho'rkot thu'rit mono omanakat, okin thoorrekathé míl irok irapangka nti ikuppuru'ng konoi'ri akothakka kippappat.

³⁹ Anakka cingki cuat aul iallillie kuppuru'ng konoi'ri ommakat ka'ran nakin okko anaruk akka okin thimmat carkan cotteik akin i'rekat itti okin thathiót kuppuru'ng konoi'ri nan amma okin akkathío. ⁴⁰ Akin okecekat lo'rak ilonat a'rponde nan tho'ronthong irok irapangka akin oththekat nan irok irapangka. Okin thokellekathé lo'rak ili'rikot kwo'ren ikaprtto kuppuru'ng amma okin ollillie. Okin thonthathe kret kapik ikallillie kuppuru'ng konoi'ri ngkanang akin oprttat eo ngngin tocarakan. ⁴¹ Anaruk

kuppu'rung keekathe ca ncarakan cokamur akommakat eo. Ana cu're cen cikkatheik acocotta akka thopangka thoi'ri thokat cik athokkwe kannan.

⁴² Ana ul irro wi'rekathe itti wangwo ul worikorrrkor akka aththouththa aeo tomarakan apelle. ⁴³ Anaruk ili woul arrial ukuluk irro wawongothe itti wakkie oPoluc cik ana kwoce'rekathe ul irro nolon len. Kwi'rekathe itti okkwion ithina oththouththa akin irrot tomarakan tokit. ⁴⁴ Ana opilingon omakittot kin nouruthut ana nomprak wokuppu'rung ikokittakot. Ittina okin thoi'ngkathe appik tomarakan.

28

OPoluc paik nocik coMalththa

¹ Manakka onin thaata tocarakan appik thoporot, apilin i'rekat nin itti cik iconthomat coritho'rikit thorok irapangka coccot k'ran itti Malththa. ² Aul wonocik cen okkanthet nin lon loporot anganna, okin thikkiet nin cik ana okin thokwanthet nin thik akka kapik kokat cik akapo ana cik cokat cik cirruk. ³ Anakka oPoluc pokat cik akwa'rntot o'ren akworret ithik alü okiccekat pinyil apap'rilakat nokkun apok'rathok. ⁴ Anakka ul woncik iconthomat corirok irapangka cen wimmat pinyil apap'rilako nokkun woPoluc akin erettaranthet itti, "Pul empi paththoka ipangwo ul akka amma kwokkot cik nti irok irapangka anaruk lon lothonce'ret lon cik lannokorronnok." ⁵ Anaruk oPoluc pokkwathe pinyil nokkun apapat ithik alo'rek ellakat ilainok. ⁶ Okin thokat akin o'rikothok itti kwaththakat cik ana manna itti kwapot nocapu piot anakka okin tho'rikothe cik itta'rene puccuk mono okathakat itti lo'rek lella akin oprttat lon len cik nak akin i'rekat itti kapik engki.

⁷ Cınang nocik cen oPappilioc ili wonocik cen wonat lampang napuththut. Kwikkiekathenin cik ma'ri m'rapuruk akwokkinthet nin lon loporot. ⁸ Ana oththan poPappilioc pappokat noppa pongo ana kwokat akwangko ippa ana opre. APoluc i'rikathok noppa akwonekkekat nyaun naak akwa'rakat nga'rama akwothakkakat poporot. ⁹ Anakka oPoluc pokkotho menik aul akkakanthok iongo wonocik iconthomat corirok irapngka cen appik akwittiet kin. ¹⁰ Okin thopiriet nin noka ngkathar koppot, anakka onin thokat anin uroko p'rin, okin thipanthet nin a'rupu ikuppu'rung konoi'ri ianin thongothe.

OPoluc paat noka'ran koRoma

¹¹ Anakka anak wothakkat w'rapuruk onin tharrathe kuppu'rung konoi'ri ikokkwothe cpo cinang nocik coMalththa. Kuppu'rung ken kokat koCikkantharia ana tokit kokuppu'rung kwo'ren k'rek kokat cik kokkattathe ere kapik ikokat laro ithonat 'ran itti oKkacththo ana oPolluk. ¹² Ana onin thorpatheik noka'ran koCarakkoc anin ikkat cik nan ma'ri m'rapuruk. ¹³ Anin urokat nthan anin eo omakot carkan corok mono anin akkakat noka'ran koRikion noththok poIththalia ana ngorrot ngen akanang akkakat nthokkun wothothari amma akatha na acingki ummot ngngin innakkakat noka'ran koPutthuli noca'ri culukku. ¹⁴ Onin thiathe ul iocokotho lon loleccuo w'rek than akin omekat nin itti onin thikkoik nakin ma'ri me're'rapuruk. Ittina onin thakkathe noka'ran koRoma. ¹⁵ Ana ul iocokotho lon loleccuo wocckathe noka'ran koRoma itti onin thaata ana okin thakkathe thapat noththok akin othocurot ianin noka'ran kApiuc ikokat ka'ran kokeccuk. Opilingon thaththiat nin noka'ran koccot k'ran itti A'ran W'rapuruk Ikkakoik tit. Ana akka oPoluc pimmat kin kwopirakanthet

Kapik noka ana kwopo'riettakathe than. ¹⁶ Anakka onin thaat noka'ran koRoma akin ikkiekat oPoluc cik noka'ran pellek ana pul p'rek angwothok othakka itti akka akura.

OPoluc pangkene noka'ran koRoma

¹⁷ Anakka ma'ri m'rapuruk meot ncik, oPoluc pakkarathe ul woIouth ittittik. Anakka okin tha'rntakotho tothun, aPoluc i'rekat kin itti, “Pangkingon, antoka manna itti mpannokkinthet ul wonnon lon l'rek lokithak aththik ana manna thathuma thothiki itheot thonnon anaruk ul woIouth woccokothin noka'ran koUruccelim ana okin thethin ul woRoma ikkun. ¹⁸ Okin thokathaccet ilon lin ana okin thomekathe itti okin thelikkon akka lon lellat ilokithak ila mpokkothe ilakorronnon itti mpakkuttat. ¹⁹ Anaruk ul woIouth w'rakathe ana ilen akkokorronnathin anothiöt lon lin tokit koili irik oKkaiccer. Annoka itti mpongothe itti mparukwet ul win llon l'rek. ²⁰ Ana nti ilon elli, mpakkarinet non anatherenenon. Mpi'rikikkot nynyol enyi nti ilon lotho'rikot cik thoIccereil.”

²¹ Akin i'rekathok itti, “Onin thanniot ka'rmacak ik-erethung llon ilokithak nnoththok poIouthia ana ul wella iaat ieret lon ilokithak naung cakuruk. ²² Anaruk onin thongothe itti onin thantoccikot lon lang ila ngkwonu akka onin thina nan itti ul na'ran appik w'rat lon ila ngkwaik pangkene.”

²³ Ana okin thonekkekathe ca'ri cik icakin aine oPoluc ngngin, ana okin thakkakanthok thoppot na kwokat cik akwikkoik. OPoluc pikkatheik akwongkene ana erenekin lon ngili ngoKapik nci ingi'rimak mono acipin apat. Ana akwongkenekin lon loleccuo llon nti iatham woMucca lothonce'ret lon cik ana llon lorinatham noul wothernte lon loKapik. ²⁴ Apilingon thangkathe ana opilingon th'rakathe lon lung. ²⁵ Ul wann'i'rikat lon tothun ana okin wopettakatheik ntuan thanung akka oPoluc pi'rethekin

kin lon elli itti, “Kanang ikupupure ki'rethe oththen lon
 icat akka ki'ret mpul pothernte lon loKapik oIccaia itti,

²⁶ ‘Ngoinet ul ennrík ai'ret kin itti,

Onon thantocikot lon ana onon thannina,

onon thantokathacce cik ana onon thannimmaik.

²⁷ Akka mikít moulenni monthomathe ikarak,

okin thonu unu ana okin thomma occikot cik,

okin thonu kit ana okin thomma immaik.

Akka amma okonnoka ittina okin thaimmat cik

ana occikot cik nunu wen,

ina lon mmikít men

ana opa'rine lon cik ana mpittiet kin.’

²⁸ Ittina mpongothe itti onon thina itti Kapik kothin-
 thet ul iannoka woIouth tho'rettat thung ana okin thac-
 cikot.” ²⁹ [Anakka kwi'ret lon len aul woIouth oppat
 thapat oththe naak akin thokat akin oplarot kannan.]

³⁰ APoluc ikkat cik luput le'ra ikaman akka kwokat
 pethet kin akucci ana kwikkiekathe ul cik appik iainok.

³¹ Kwongkenet ana lon longili ngoKapik ana ere lon lolli
 oIeccuo oMiccie ella n're ana pul pella poce'rekathok.

Lumun
Lumun: Lumun (Bible)

copyright © 2020 Wycliffe Bible Translators, Inc.

Language: Lumun

Contributor: ECS Diocese of Khartoum Translation Department

This text box needs to have content for PT9 to upload is to the DBL.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 8 Feb 2022

b9cb69ce-3694-5d9f-bda5-4a2243faegee